


Jilid II  
Bil. 22



Hari Selasa  
28hb Julai, 1992

MALAYSIA

# PENYATA RASMI PARLIMEN

PARLIAMENTARY DEBATES

DEWAN RAKYAT

*House of Representatives*

PARLIMEN KELAPAN

*Eighth Parliament*

PENGGAL KEDUA

*Second Session*

## KANDUNGAN

JAWAPAN-JAWAPAN MULUT BAGI PERTANYAAN-PERTANYAAN  
[Ruangan 4749]

USUL MENANGGUHKAN MESYUARAT DI BAWAH PERATURAN MESYUARAT  
18:

Kemalangan Industri dan Keselamatan Pekerja—Mengkaji Semula PERKESO—Y.B.  
Tuan Haji Mohamad bin Sabu (Nilam Puri) [Ruangan 4856]

RANG UNDANG-UNDANG:

Rang Undang-undang Hiburan (Wilayah Persekutuan Kuala Lumpur) [Ruangan 4860]

USUL:

Penangguhan Mesyuarat [Ruangan 4939]

UCAPAN-UCAPAN PENANGGUHAN:

Kebajikan Orang Asli—Y.B. Dr. Kua Kia Soong (Petaling Jaya) [Ruangan 4940]

Hak dan Kepentingan Pelabur-pelabur di BSKL—Y.B. Tuan Lim Guan Eng (Kota  
Melaka) [Ruangan 4945]



DICETAK OLEH  
PERCETAKAN NASIONAL MALAYSIA BERHAD,  
IBU PEJABAT, KUALA LUMPUR  
1994

MALAYSIA

## DEWAN RAKYAT YANG KELAPAN

*Penyata Rasmi Parlimen*

PENGGAL YANG KEDUA

AHLI-AHLI DEWAN RAKYAT

Yang Berhormat Tuan Yang di-Pertua, TAN SRI DATO' MOHAMED ZAHIR BIN HAJI ISMAIL,  
P.M.N., S.P.M.K., D.S.D.K., J.M.N.

Yang Amat Berhormat Perdana Menteri dan Menteri Dalam Negeri, DATO' SERI DR  
MAHATHIR BIN MOHAMAD, D.K.I., D.U.K., S.S.D.K., S.S.A.P., S.P.M.S.,  
S.P.M.J., D.P., D.U.P.N., S.P.N.S., S.P.D.K., S.P.C.M., S.S.M.T., D.U.N.M., P.I.S.  
(Kubang Pasu).

„ Timbalan Perdana Menteri dan Menteri Pembangunan Luar Bandar,  
TUAN ABDUL GHAFAR BIN BABA (Jasin).

Yang Berhormat Menteri Pengangkutan, DATO' SERI DR LING LIONG SIK, S.P.M.P.,  
D.P.M.P., D.P.M.S. (Labis).

„ Menteri Tenaga, Telekom dan Pos, DATO' SERI S. SAMY VELLU,  
S.P.M.P., S.P.M.J., D.P.M.S., P.C.M., A.M.N. (Sungai Siput).

„ Menteri Perusahaan Utama, DATO' SERI DR LIM KENG YAIK, S.P.M.P.,  
D.P.C.M. (Beruas).

„ Menteri Kerja Raya, DATUK LEO MOGGIE ANAK IROK, P.N.B.S.  
(Kanowit).

„ Menteri Perdagangan Antarabangsa dan Industri, DATO' SERI RAFIDAH  
AZIZ, S.P.M.P., D.P.M.S., A.M.N. (Kuala Kangsar).

„ Menteri Pendidikan, DATO' DR HAJI SULAIMAN BIN HAJI DAUD, S.I.M.P.,  
P.N.B.S., J.B.S. (Petra Jaya).

„ Menteri Pertanian, DATUK SERI SANUSI BIN JUNID, S.S.S.A., D.S.D.K.,  
D.G.S.M., S.M.K. (Jerlun-Langkawi).

„ Menteri Kewangan, DATO' SERI ANWAR BIN IBRAHIM, S.S.A.P., S.S.S.A.  
(Permatang Pauh).

„ Menteri Perdagangan Dalam Negeri dan Hal Ehwal Pengguna, DATO'  
HAJI ABU HASSAN BIN HAJI OMAR, S.P.M.S., D.P.M.S., S.M.T., P.I.S. (Kuala  
Selangor).

„ Menteri Kesihatan, DATO' LEE KIM SAI, D.S.S.A., P.P.N. (Hulu Langat).

„ Menteri Pertahanan, DATO' SERI HAJI MOHD. NAJIB BIN TUN HAJI  
ABDUL RAZAK (Orang Kaya Indera Shahbandar), S.S.A.P., S.I.M.P.,  
D.S.A.P., P.N.B.S., D.P.M.S. (Pekan).

„ Menteri Penerangan, DATO' MOHAMED BIN RAHMAT, S.P.M.J., S.I.M.P.,  
S.S.S.A., S.S.I.J., D.P.M.J., D.P.M.S., P.N.B.S., K.M.N. (Pulai).

- Yang Berhormat Menteri Kebudayaan, Kesenian dan Pelancongan, DATO' SABBARUDDIN CHIK, S.I.M.P., D.S.A.P., S.M.S., D.P.M.S. (Temerloh).
- „ Menteri Perpaduan Negara dan Pembangunan Masyarakat, DATO' NAPSIAH BINTI OMAR, D.S.N.S. (Kuala Pilah).
- „ Menteri Perusahaan Awam, DATO' DR MOHAMAD YUSOF BIN HAJI MOHAMED NOR, S.P.M.T., D.P.M.T., J.M.N., S.M.T., P.P.T. (Besut).
- „ Menteri Sumber Manusia, DATO' LIM AH LEK, S.I.M.P., D.S.A.P., S.M.T., J.P. (Bentong).
- „ Menteri di Jabatan Perdana Menteri, DATO' ABANG ABU BAKAR BIN DATU BANDAR ABANG HAJI MUSTAPHA, D.S.A.P., P.N.B.S., D.P.T.J., J.M.N. (Kuala Rajang).
- „ Menteri Sains, Teknologi dan Alam Sekitar, TUAN LAW HIENG DING, K.M.N., P.B.S. (Sarikei).
- „ Menteri Perumahan dan Kerajaan Tempatan, DATO' DR TING CHEW PEH, D.P.M.P. (Gopeng).
- „ Menteri Tanah dan Pembangunan Koperasi, TAN SRI DATUK HAJI SAKARAN BIN DANDAI, P.S.M., P.G.D.K., S.P.D.K., J.P., A.D.K. (Semporna).
- „ Menteri di Jabatan Perdana Menteri dan Menteri Undang-undang, DATO' SYED HAMID BIN SYED JAAFAR ALBAR, D.P.M.J., A.M.N., S.M.J. (Kota Tinggi).
- „ Menteri Luar Negeri, DATUK ABDULLAH BIN HAJI AHMAD BADAWI, D.M.P.N., D.J.N., K.M.N. (Kepala Batas).
- „ Timbalan Yang di-Pertua, TUAN ONG TEE KEAT, S.M.S. (Ampang Jaya).
- „ Timbalan Yang di-Pertua, TUAN HAJI JUHAR BIN HAJI MAHIRUDDIN (Kinabatangan).
- „ Timbalan Menteri Dalam Negeri, DATO' MEGAT JUNID BIN MEGAT AYOB, D.P.C.M., D.S.A.P., A.M.P., A.M.K. (Pasir Salak).
- „ Timbalan Menteri Perumahan dan Kerajaan Tempatan, TUAN HAJI DAUD BIN DATO' HAJI TAHA, S.M.J. (Batu Pahat).
- „ Timbalan Menteri Tenaga, Telekom dan Pos, DATO' MOHD. TAJOL ROSLI BIN MOHD. GHAZALI, D.P.M.P., A.M.P. (Gerik).
- „ Timbalan Menteri Perpaduan Negara dan Pembangunan Masyarakat, DATO' ALEXANDER YU LUNG LEE, D.P.M.P. (Batu).
- „ Timbalan Menteri Pertahanan, DATO' WAN ABU BAKAR BIN WAN MOHAMED, D.I.M.P. (Jerantut).
- „ Timbalan Menteri Perusahaan Awam, DATO' DR SITI ZAHARAH BINTI HAJI SULAIMAN, D.I.M.P. (Mentakab).
- „ Timbalan Menteri Kewangan, DATO' LOKE YUEN YOW, D.P.M.P., A.M.P. (Tanjong Malim).
- „ Timbalan Menteri Perumahan dan Kerajaan Tempatan, TUAN OSU BIN HAJI SUKAM (Papar).

- Yang Berhormat Timbalan Menteri Penerangan, TUAN RAILEY BIN HAJI JAFFREY, J.M.N. (Silam).
- „ Timbalan Menteri Pengangkutan, DATIN PADUKA HAJAH ZALEHA BINTI ISMAIL, D.P.M.S., S.M.S., K.M.N. (Selayang).
- „ Timbalan Menteri di Jabatan Perdana Menteri, RAJA DATO' ARIFFIN BIN RAJA SULAIMAN, D.S.D.K., S.M.S. (Baling).
- „ Timbalan Menteri Tanah dan Pembangunan Koperasi, DATO' HAJI MOHD. KHALID BIN MOHD. YUNUS, D.S.N.S. (Jempol).
- „ Timbalan Menteri Pendidikan, DR LEO MICHAEL TOYAD, J.B.S. (Mukah).
- „ Timbalan Menteri Luar Negeri, DATO' DR ABDULLAH FADZIL BIN CHE WAN, D.P.C.M., P.C.M. (Bukit Gantang).
- „ Timbalan Menteri Kewangan, TUAN ABDUL GHANI BIN OTHMAN, S.M.J. (Ledang).
- „ Timbalan Menteri di Jabatan Perdana Menteri, DATO' DR SULEIMAN BIN MOHAMED, D.P.M.S. (Titiwangsa).
- „ Timbalan Menteri Kesihatan, DATO' MOHAMED FARID BIN ARIFFIN, D.S.P.N., (Balik Pulau).
- „ Timbalan Menteri Belia dan Sukan, CIK TENG GAIK KWAN, A.M.N., P.P.N. (Raub).
- „ Timbalan Menteri Sains, Teknologi dan Alam Sekitar, TUAN PETER CHIN FAH KUI, P.B.S., A.B.S. (Miri).
- „ Timbalan Menteri Perdagangan Antarabangsa dan Industri, TUAN CHUA JUI MENG, P.I.S. (Bakri).
- „ Timbalan Menteri Perdagangan Dalam Negeri dan Hal Ehwal Pengguna, DATO' ABDUL KADIR BIN HAJI SHEIKH FADZIR, D.S.D.K. (Kulim Bandar Baharu).
- „ Timbalan Menteri Kerja Raya, TUAN KERK CHOO TING (Taiping).
- „ Timbalan Menteri Perusahaan Utama, DATO' HAJI TENGGU MAHMUD BIN TENGGU MANSOR, D.P.M.T., K.M.N., P.J.C., J.P., P.J.K. (Setiu).
- „ Timbalan Menteri Pembangunan Luar Bandar, TUAN MOHD. YASIN BIN KAMARI, A.M.N., P.D.N., P.I.S., B.S.I. (Sri Gading).
- „ Timbalan Menteri di Jabatan Perdana Menteri, DATO WONG SEE WAH, D.S.N.S. (Rasah).
- „ Timbalan Menteri Kerja Raya, DATUK PETER TINGGOM ANAK KAMARAU, P.N.B.S., K.M.N., A.M.N., P.P.C. (Saratok).
- „ Timbalan Menteri Pendidikan, DR FONG CHAN ONN (Selandar).
- „ Timbalan Menteri di Jabatan Perdana Menteri, DATO DR HAJI ABDUL HAMID BIN HAJI OTHMAN, D.S.D.K., S.M.J., K.M.N., P.P.T. (Sik).
- „ Timbalan Menteri Kebudayaan, Kesenian dan Pelancongan, DATO' CHAN KONG CHOY (Lipis).
- „ Timbalan Menteri Sumber Manusia, DATO' M. MAHALINGAM (Kapar).

- Yang Berhormat Setiausaha Parlimen, Kementerian Kebudayaan, Kesenian dan Pelancongan, DATO' ABDUL RAMAN BIN SULIMAN, D.P.M.P., P.M.P., A.M.P., J.P. (Parit Buntar).
- „ Setiausaha Parlimen di Jabatan Perdana Menteri, TUAN OTHMAN BIN ABDUL, A.M.P., P.P.T. (Pendang).
- „ Setiausaha Parlimen, Kementerian Pembangunan Luar Bandar, DATO MOHAMED BIN JAMRAH, D.P.M.P., A.M.P., P.P.T., J.P. (Bagan Datok).
- „ Setiausaha Parlimen, Kementerian Belia dan Sukan, DATO' ISMAIL BIN SAID, D.P.M.T., S.M.T., A.M.N. (Kemaman).
- „ Setiausaha Parlimen, Kementerian Tanah dan Pembangunan Koperasi, TUAN MOHD. NOH BIN RAJAB (Tampin).
- „ Setiausaha Parlimen, di Jabatan Perdana Menteri, TUAN DOUGLAS UNGGAH EMBAS, A.B.S., P.B.S. (Betong).
- „ Setiausaha Parlimen, Kementerian Pertanian, TUAN MOHD. SHARIFF BIN HAJI OMAR, P.P.T. (Tasek Gelugor).
- „ Setiausaha Parlimen, Kementerian Perpaduan Negara dan Pembangunan Masyarakat, TUAN YONG KHOON SENG (Padawan).
- „ Setiausaha Parlimen, Kementerian Dalam Negeri, TUAN ONG KA TING (Pontian).
- „ Setiausaha Parlimen, Kementerian Penerangan, DATO' HAJI FAUZI BIN HAJI ABDUL RAHMAN, D.I.M.P., A.M.P., P.P.N. (Kuantan).
- „ Setiausaha Parlimen, Kementerian Kesihatan, DATO' K. KUMARAN (Tapah).
- „ Setiausaha Parlimen, Kementerian Perdagangan Antarabangsa dan Industri, TUAN S. S. SUBRAMANIAM, J.S.M., P.J.K., A.M.S. (Segamat).
- „ TUAN ABDOL MULOK BIN AWANG DAMIT (Labuan).
- „ DATO' ABDUL AJIB BIN AHMAD, D.G.S.M., D.P.M.J., B.S.I. (Mersing).
- „ TUAN HAJI ABDUL HADI BIN HAJI AWANG (Marang).
- „ TUAN HAJI ABDUL HAMID BIN ABDUL RAHMAN (Sungai Benut).
- „ DATUK HAJI ABDUL MANAN BIN OTHMAN, D.P.M.T., P.P.T. (Kuala Terengganu).
- „ TUAN ABDUL MALEK MUNIP (Muar).
- „ DATUK HAJI ABDUL RASHID BIN MUHAMMAD (Kuala Nerus).
- „ DATUK PATINGGI TAN SRI HAJI ABDUL TAIB MAHMUD, D.P., D.A., S.P.M.J., P.G.D.K. (Kota Samarahan).
- „ TUAN HAJI NIK ABDULLAH BIN HAJI ARSHAD, S.M.K. (Pengkalan Chepa).
- „ DATO' DR AFFIFUDIN BIN HAJI OMAR, D.S.D.K., J.S.M., K.M.N., B.C.K. (Padang Terap).
- „ TUAN AHMAD BIN NOR (Bayan Baru).
- „ TUAN AHMAD BIN OMAR, P.P.N. (Pagoh).

Yang Berhormat TUAN AHMAD SHUKRI BIN HAJI HASSAN (Machang).

- „ DATO' ALIAS BIN MD. ALI, D.P.M.T., J.S.M., S.M.T., K.M.N., P.J.K. (Hulu Terengganu).
- „ DATUK AMIR KAHAR BIN TUN DATU MUSTAPHA (Marudu).
- „ TUAN HAJI AWANG BIN JABAR, S.M.T., A.M.N., P.J.K. (Dungun).
- „ TUAN HAJI BADRUDDIN BIN AMIRULDIN, B.K.M., P.J.K. (Jerai).
- „ DATUK HAJI BASRI BIN BAJURI, D.S.S.A., K.M.N., S.M.S., P.J.K. (Kuala Langat).
- „ DATUK BERNARD GILUK DOMPOK, P.G.D.K. (Penampang).
- „ TUAN BILLY ABIT JOO (Hulu Rajang).
- „ TUAN HAJI BUNYAMIN BIN YAAKOB (Bachok).
- „ TUAN CHIAN HENG KAI (Bukit Mertajam).
- „ TUAN CHOR CHEE HEUNG (Alor Setar).
- „ TUN DAIM ZAINUDDIN, S.S.M., D.H.M.S., S.S.A.P. (Merbok).
- „ DR V. DAVID (Puchong).
- „ TUAN FONG KUI LUN (Klang).
- „ TUAN FOO PIEW KOK (Batu Gajah).
- „ TUAN GEORGE SANGKIN (Bandau).
- „ TUAN GOOI HOCK SENG (Bukit Bendera).
- „ TUAN HAJI HAMZAH BIN HAJI MOHAMED ZAIN (Tasek Chenderoh).
- „ TUAN HARRISON NGAU LAING (Baram).
- „ TUAN HAJI IBRAHIM BIN ALI (Pasir Mas).
- „ TUAN HAJI IBRAHIM BIN JENDOL, P.J.K. (Alor Gajah).
- „ TUAN HAJI IBRAHIM BIN MAHMOOD (Kuala Krai).
- „ TUAN IBRAHIM BIN PATEH MOHAMAD (Tanah Merah).
- „ CHE IBRAHIM BIN MUSTAFA (Sungai Petani).
- „ LT. KOL. (B) IBRAHIM BIN SAREH (Jelebu).
- „ PUAN HAJIAH ILANI BINTI DATO HAJI ISAHAK (Kota Bharu).
- „ TUAN HAJI ISHAK BIN ARSHAD (Kangar).
- „ DR HAJI JAMALUDDIN BIN HAJI JARJIS (Rompin).
- „ TUAN JAWAH ANAK GERANG (Lubok Antu).
- „ TUAN JAMES JIMBUN ANAK PUNGGU, P.B.S. (Kapit).
- „ TUAN JOSEPH MAUH AK IKEH (Selangau).
- „ TUAN KANG CHOW OH (Kluang).
- „ TUAN R. KARPAL SINGH (Jelutong).

Yang Berhormat TUAN KERK KIM HOCK (Pasir Pinji).

- „ DR KUA KIA SOONG (Petaling Jaya).
- „ TUAN LAI LUN TZEE (Sandakan).
- „ TUAN LAU DAK KEE (Ipoh).
- „ TUAN ROBERT LAU HOI CHEW (Sibu).
- „ TUAN LIEW AH KIM (Seputeh).
- „ TUAN LIM GUAN ENG (Kota Melaka).
- „ TUAN LIM HOCK SENG (Bagan).
- „ TUAN LIM KIT SIANG (Tanjong).
- „ PUAN LIM LAY HOON (Padang Serai).
- „ DATIN LING CHOOI SIENG (Lumut).
- „ TUAN HAJI MAHBUD BIN HAJI HASHIM (Sabak Bernam).
- „ TUAN MAIDOM P. PANSAI (Kota Belud).
- „ DR T. MARIMUTHU (Telok Kemang).
- „ TUAN MICHAEL ASANG, B.S.K. (Jambongan).
- „ TUAN MICHAEL LISA KAYA @ GOR KAYA (Bukit Mas).
- „ DATO' HAJI MOHAMAD BIN ABDULLAH, D.I.M.P., P.J.K. (Maran).
- „ TUAN HAJI MOHAMAD BIN SABU (Nilam Puri).
- „ TUAN MOHAMED KAMAL BIN HUSSAIN (Lembah Pantai).
- „ TUAN MOHAMED KHALED BIN NORDIN (Johor Bharu).
- „ DATO' HAJI MOHAMMAD ABU BAKAR BIN RAUTIN IBRAHIM, D.S.D.K., K.M.N. (Kuala Kedah).
- „ DATO' HAJI MOHD. SHARIF BIN JAJANG, D.P.M.S., A.M.N., P.J.K. (Sepang).
- „ TUAN MOHD. TAMRIN BIN ABDUL GHAFAR (Batu Berendam).
- „ TUAN HAJI MOHD. ZIHIN BIN HAJI MOHD. HASSAN, P.M.P., A.M.P. (Larut).
- „ DATUK MONGGOH OROW, P.G.D.K., K.M.N., A.D.K. (Tuaran).
- „ TUN DATU HAJI MUSTAPHA BIN DATU HARUN, S.M.N., S.P.D.K., S.I.M.P., P.N.B.S., S.P.M.J., S.P.M.P., S.P.C.M., K.C.R.L., K.S.I.J. (Limbawang).
- „ TUAN NASRUDDIN BIN HAJI ALANG SAIDIN, A.M.P. (Parit).
- „ DR NAWAWI BIN MAT AWIN (Tambun).
- „ TUAN NURNIKMAN BIN ABDULLAH (Kimanis).
- „ TUAN ONG TIN KIM (Telok Intan).
- „ DR OSMAN MINUDIN (Kinabalu).
- „ DATUK JOSEPH PAIRIN KITINGAN (Keningau).
- „ TUAN G. PALANIVEL (Hulu Selangor).

Yang Berhormat DR PATAU RUBIS, P.B.S. (Mas Gading).

- „ DATUK DOMINIC JOSEPH PUTHUCHEARY (Nibong Tebal).
- „ DATO' HAJI QAMARUZ ZAMAN BIN HAJI ISMAIL, D.P.M.P., P.C.M., K.M.N., B.C.K., P.J.K. (Bagan Serai).
- „ TUAN RADIN MALLEH (Padas).
- „ PUAN HAJAH RAKIBAH BINTI HAJI ABDUL MANAP (Shah Alam).
- „ TUAN RICHARD RIOT ANAK JAEM (Serian).
- „ PUAN ROHANI BINTI ABD. KARIM (Santubong).
- „ TUAN RUHANIE BIN HAJI AHMAD (Parit Sulong).
- „ Y.B.M. TENGKU TAN SRI RAZALEIGH HAMZAH, D.K., P.S.M., S.P.M.K., S.S.A.P., S.P.M.S. (Gua Musang).
- „ TUAN SAIDIN @ YUSOF BIN ADAM (Tanjong Karang).
- „ DR SANUSI BIN DAENG MARIOK (Rantau Panjang).
- „ TUAN SHAHIDAN BIN KASSIM, A.M.P. (Arau).
- „ TUAN SIM KWANG YANG (Bandar Kuching).
- „ PUAN SITI ZAINABON BINTI ABU BAKAR (Tebrau).
- „ TUAN HAJI SUKRI BIN HAJI MOHAMED (Kok Lanas).
- „ TUAN TAIMIN BIN LUMAING (Pensiangan).
- „ DATUK DANIEL TAJEM ANAK MIRI, P.N.B.S., J.M.N. (Sri Aman).
- „ TUAN TAN KOK WAI (Sungai Besi).
- „ DR TAN SENG GIAW (Kepong).
- „ TUAN THOMAS SALANG SIDEN (Julau).
- „ TUAN WAHAB BIN SUHAILI (Batang Sadong).
- „ WAN HANAFIAH BIN WAN MAT SAMAN (Kota Setar).
- „ WAN JUNAIDI BIN TUANKU JAAFAR (Batang Lupar).
- „ TUAN HAJI WAN MOHD. JAMIL BIN WAN MAHMOOD (Tumpat).
- „ WAN OMAR BIN WAN MAJID (Pasir Puteh).
- „ TUAN WEE CHOO KEONG (Bukit Bintang).
- „ TUAN WONG WING ON (Kampar).
- „ TUAN VUN SHIN CHOI @ JOSEPH VOON (Tanjong Aru).
- „ DATUK AMAR JAMES WONG KIM MIN (Bintulu).
- „ TUAN JASON WONG SING NANG (Lanang).
- „ TUAN WOON SEE CHIN, S.M.J., A.M.N., P.I.S. (Senai).
- „ TUAN GEOFFREY YEE LING FOOK (Tawau).
- „ TUAN YIM CHEE CHONG (Seremban).
- „ TUAN PHILIP YONG CHIEW LIP (Gaya).

## DEWAN RAKYAT

### PEGAWAI-PEGAWAI KANAN

Setiausaha Dewan Rakyat: Dato' Haji Wan Zahir bin Sheikh Abdul Rahman, D.P.M.P.,  
J.S.M.

Ketua Penolong Setiausaha: Haji Taijadin bin Saberan

Penolong Setiausaha: Abdullah bin Abdul Wahab.

Penolong Setiausaha: Zamani bin Sulaiman

### BAHAGIAN PENYATA RASMI PARLIMEN

Pegawai Penerbitan: Ramaswamy.

Penolong Penyunting: Shamsiah binti Md. Yusop.

### *Pelapor Perbahasan Parlimen*

Haji Suhor bin Husin.

Mohd. Saleh bin Mohd. Yusop.

Supiah binti Dewak.

Ismail bin Haji Hassan.

Hajah Kalsom binti Ghazali.

Mohamed bin Osman.

Norishah binti Mohd. Thani.

Zaharah binti Naim.

Su Soon Chuan.

Norwahidah binti Azizi.

Rozita binti Abd. Samad.

Jainah binti Sakimin.

Ahmad Kamal bin Mohd. Yusop.

### BENTARA MESYUARAT

Mejar (B) Mohd. Kassim bin Hashim

## MALAYSIA

## DEWAN RAKYAT

---

Selasa, 28hb Julai, 1992

---

*Mesyuarat dimulakan pada pukul 2.30 petang*

## DOA

(Timbalan Yang di-Pertua  
*mempengerusikan Mesyuarat*)

JAWAPAN-JAWAPAN  
MULUT BAGI  
PERTANYAAN-  
PERTANYAAN

**KURSUS ORIENTASI PRA-  
UNIVERSITI—OBJEKTIF**

**1. Dato' Haji Mohammad Abu Bakar  
bin Rautin Ibrahim** minta Menteri  
Pendidikan menyatakan:

- (a) apakah bentuk dan ciri-ciri orientasi untuk pelajar-pelajar yang akan keluar negara dan untuk pelajar-pelajar ke universiti-universiti dalam negeri yang diluluskan oleh Kerajaan;
- (b) apakah objektif-objektif orientasi tersebut diadakan;
- (c) siapakah yang bertanggungjawab supaya orientasi-orientasi tersebut benar-benar memberi manfaat kepada pelajar-pelajar dan tidak terkeluar daripada garis panduan yang ditetapkan; dan
- (d) adakah perkara-perkara yang tidak diingini berlaku dan apakah tindakan Kerajaan ke atasnya.

**Menteri Pendidikan (Dato' Amar  
Dr. Haji Sulaiman bin Haji Daud):**  
Tuan Yang di-Pertua, bagi menjawab  
soalan bahagian (a) dan (b):

Untuk makluman Ahli Yang Berhormat, pelajar-pelajar yang akan melanjutkan pelajaran keluar negeri di bawah tajaan Kerajaan adalah dikehendaki menjalani satu kursus orientasi sekurang-kurangnya untuk tempoh seminggu.

Di antara perkara-perkara yang ditekankan dan menjadi objektif orientasi tersebut adalah seperti berikut:

- (i) menanamkan semangat cintakan negara;
- (ii) membentuk warganegara Malaysia yang sentiasa dapat menjaga dan mempertingkatkan imej serta maruah negara melalui perlakuan akhlak atau moral yang baik dan pencapaian akademik yang tinggi;
- (iii) memberi kefahaman mengenai dasar-dasar negara supaya pelajar-pelajar dapat memainkan peranan positif dalam pembangunan negara;
- (iv) memberi kefahaman mengenai latar belakang sejarah negara supaya

pelajar-pelajar mengetahui dan menghargai betapa pentingnya semangat toleransi dan bekerjasama di kalangan penduduk-penduduk berbilang kaum dalam usaha mencapai perpaduan dan pembangunan negara;

- (v) melatih pelajar-pelajar supaya berdikari atau self-reliance, dengan izin; dan
  - (vi) melatih pelajar-pelajar dengan kemahiran berkomunikasi supaya mereka dapat memainkan peranan masing-masing sebagai duta kecil yang berkebolehan menyampaikan maklumat mengenai negara;
- (c) Jawatankuasa yang menguruskan kursus orientasi tersebut adalah bertanggungjawab dalam menentukan orientasi yang dijalankan itu benar-benar memberi manfaat kepada pelajar-pelajar yang terlibat dan tidak terkeluar daripada garis panduan yang ditetapkan.
- (d) Kursus bimbingan agama juga diberikan penekanan dalam program orientasi kepada pelajar-pelajar yang akan keluar negeri dan begitu juga kursus penyesuaian terhadap cara hidup di luar negeri daripada perspektif seorang Malaysian dan kursus kendalian maklumat untuk pelajar secara berkesan.
- (e) Setakat ini semua kursus orientasi yang dianjurkan telah berjalan dengan memuaskan dan setakat yang saya tahu tidak ada perkara-perkara yang tidak

diingini berlaku yang menjejaskan perjalanan kursus tersebut.

**Tuan Haji Ishak bin Arshad:** Tuan Yang di-Pertua, soalan tambahan. Kita telah mendengar tentang pengaruh-pengaruh luar termasuk penukaran agama oleh segolongan pelajar-pelajar di luar negeri. Soalan tambahan saya ialah sama ada pihak Kementerian bercadang ataupun telah melaksanakan tindakan lanjut bagi menentukan bahawa kursus yang dilaksanakan terhadap pelajar-pelajar kita itu dapat dimanfaatkan dengan sepenuhnya.

Soalan yang kedua ialah apakah pihak Kementerian berhasrat untuk melaksanakan kursus-kursus yang serupa bagi pelajar-pelajar tajaan swasta?

**Dato' Amar Dr. Haji Sulaiman bin Haji Daud:** Tuan Yang di-Pertua, memanglah menjadi hasrat dan kehendak kita supaya segala apa yang kita berikan kepada pelajar-pelajar itu dimanfaatkan oleh mereka. Sebab itulah Kerajaan kita berbelanja begitu banyak wang ringgit untuk menentukan supaya mereka itu dibekalkan dengan perkara-perkara yang boleh mempertahankan diri mereka daripada apa-apa ancaman.

Dalam soal penukaran agama, Tuan Yang di-Pertua, jawapannya telahpun diberi dalam Dewan ini dan saya rasa suatu perkara atau cara yang lebih berkesan ialah dengan mengisikan apa yang saya panggil "anti-body" dalam badan seseorang pelajar itu; kalau ada serangan tentulah "anti-body" itu akan menyerang balik segala antigen yang cuba menyerang mereka.

Jadi, mengenai cadangan untuk memberikan didikan kepada pelajar-pelajar yang bukan tajaan Kerajaan, sekarang ini belum ada cadangan

sebegitu. Walau bagaimanapun, kalau difikirkan perkara ini perlu, maka insyaa Allah kita akan berbuat demikian.

**Tuan Haji Wan Mohd. Jamil bin Wan Mahmood:** Tuan Yang di-Pertua, soalan tambahan. Sebagaimana kita ketahui seorang Pegawai Agama telah pun dilantik di Malaysian Students Department (MSD). Apakah kesannya daripada perlantikan Pegawai Agama tersebut? Apa yang saya lihat, Pegawai Agama itu bukannya mengawal pelajar-pelajar tetapi dia kawal pelajar-pelajar dakwah. Jadi, akibat kesannya suatu bala yang besar telah diberi oleh Tuhan kepada kita sebagaimana berita yang kita ketahui daripada Kelab UMNO sendiri yang memberitahu bahawasanya melebihi daripada 41 orang telah bertukar agama.....

**Timbalan Yang di-Pertua (Tuan Ong Tee Keat):** Apakah soalnya, Yang Berhormat?

**Tuan Haji Wan Mohd. Jamil bin Wan Mahmood:** Tuan Yang di-Pertua, soalan saya apakah peranan Pegawai Agama yang dilantik selama ini. Apakah benar dakwaan pihak tertentu yang mengatakan bahawasanya Pegawai Agama ini bukan menjaga atau mengawal pelajar-pelajar yang liar tetapi sebaliknya dia mengawal pelajar-pelajar yang berdakwah, yang bergiat di bidang dakwah?

**Dato' Amar Dr. Haji Sulaiman bin Haji Daud:** Tuan Yang di-Pertua, peranan Pegawai Agama di Jabatan Penuntut kita di luar negeri sama ada di England, di Amerika ataupun di mana-mana sahaja ialah dengan tujuan supaya mereka dapat memberi bimbingan kepada anak-anak kita khususnya anak-anak Islam dan bukanlah tujuan mereka untuk mengawal pendakwah-pen-

dakwah sepertimana yang dikatakan oleh Yang Berhormat itu. Itu adalah tidak benar sama sekali. Kalau ada mereka mengawal begitu, mungkin ada di kalangan pendakwah itu adalah amat ekstrim sekali dan Islam sendiri tidak mengajar kita sebagai ekstrimis.

Mengenai tuduhan mengatakan ada lebih 41 orang daripada pelajar-pelajar yang menukar agama, telah dijelaskan oleh saya sendiri beberapa kali dalam akhbar; ini adalah tidak betul. Tidak ada bukti-bukti yang jelas, khususnya di England, menyatakan adanya di kalangan pelajar-pelajar ini telah menukar agama.

**Timbalan Yang di-Pertua (Tuan Ong Tee Keat):** Yang Berhormat Tuan Geoffrey Yee Lung Fook.

*(Soalan No. 2 Y.B. Tuan Geoffrey Yee Lung Fook tidak hadir)*

#### PENGIJAUAN BUMI TAMAN PERUMAHAN

**3. Tuan Chor Chee Heung** minta Menteri Perumahan dan Kerajaan Tempatan menyatakan:

- (a) apakah tindakan akan diambil oleh pihak Kerajaan dalam pelaksanaan konsep "Penghijauan Bumi" mengenai skim perumahan;
- (b) bagaimana arahan tentang pelaksanaan konsep "Penghijauan" ini dapat dipatuhi oleh pemaju-pemaju perumahan keseluruhannya dengan berkesan; dan
- (c) adakah Akta Town and Country Planning atau Akta Kerajaan Tempatan mempunyai peruntukan mengenai tanaman pokok dan bunganya dalam skim perumahan yang akan dimaju.

**Timbalan Menteri Perumahan dan Kerajaan Tempatan (Tuan Osu bin Haji Sukam):** Tuan Yang di-Pertua, untuk makluman Ahli Yang Berhormat, suka saya menerangkan bahawa Akta Perancang Bandar dan Desa 1974, sudahpun ada peruntukan yang membolehkan pihak berkuasa tempatan mengenakan syarat lanskap terhadap pemaju perumahan. Ini selaras dengan konsep "Penghijauan Bumi".

Pihak Kementerian sedang menyediakan garis panduan mengenai lanskap dan penanaman pokok di kawasan perumahan untuk dikenakan oleh Pihak Berkuasa Tempatan terhadap pemaju perumahan. Ini akan meliputi juga perlindungan pokok-pokok yang sedia ada supaya tidak ditebang sewenang-wenangnya. Sekiranya pemaju tidak mematuhi syarat ini, tindakan undang-undang boleh diambil terhadap mereka oleh Pihak Berkuasa Tempatan.

**Tuan Lau Dak Kee:** Tuan Yang di-Pertua, soalan tambahan. Saya ingin tahu sejauh manakah tindakan-tindakan yang telah diambil oleh Kerajaan terhadap pemaju-pemaju yang tidak melaksanakan konsep "Penghijauan Bumi" yang telah ditentukan oleh Kerajaan dan saya hendak tahu sejauh manakah pembeli-pembeli akan menjadi mangsa apabila kos untuk "penghijauan Bumi" yang akan ditanggung oleh pembeli-pembeli, bukan pemaju?

**Tuan Osu bin Haji Sukam:** Tuan Yang di-Pertua, Kerajaan serius terhadap syarat yang dikenakan oleh Pihak Berkuasa Tempatan untuk menghijaukan kawasan-kawasan perumahan. Sebagai misalan satu pemaju perumahan di Pulau Pinang telah dibawa ke mahkamah dan telah disabitkan kesalahan sebab tidak melaksanakan syarat-syarat yang telah dikenakan oleh Pihak Berkuasa Tempatan. Selain daripada itu juga, jika sekiranya pemaju perumahan enggan

melaksanakan arahan ini maka sijil penghuni, kelulusan untuk menghuni tidak akan dikeluarkan. Jika sekiranya sijil penghuni dikeluarkan, pihak pemaju perumahan dikenakan membayar deposit kepada pihak Berkuasa Tempatan supaya apabila keperluan-keperluan untuk penanaman-penanaman pokok dan kawasan-kawasan yang dikhaskan untuk dihijaukan selesai seperti yang diluluskan di dalam Pelan Pembangunan, barulah wang deposit itu diserahkan balik kepada pemaju itu.

**Dr. Kua Kia Soong:** Tuan Yang di-Pertua, saya ingin tahu apa sekatan boleh dikenakan terhadap pemaju-pemaju yang bukan sahaja tidak patuhi pelaksanaan konsep "Penghijauan", tetapi yang lebih serius bila projeknya menyebabkan banjir seperti yang berlaku di kawasan saya di Petaling Jaya di mana projek Vincent Tan, kawan rapat Perdana Menteri—Tropicana Golf and Country Resort—menyebabkan banjir yang teruk sekali di Kampung Cempaka dalam kawasan saya, dan saya difahamkan di tiap-tiap projek, simpan deposit seperti. . . .

**Timbalan Yang di-Pertua (Tuan Ong Tee Keat):** Yang Berhormat.

**Dr. Kua Kia Soong:** . . . seperti yang dikatakan oleh. . . .

**Timbalan Yang di-Pertua (Tuan Ong Tee Keat):** Yang Berhormat, soal terus ya, Yang Berhormat.

**Dr. Kua Kia Soong:** Untuk menjamin tiada kerosakan dan erosion apa sanction diberi kepada pemaju-pemaju tersebut?

**Tuan Osu bin Haji Sukam:** Tuan Yang di-Pertua, kita membincangkan konsep "Penghijauan Bumi". Jika sekiranya seseorang pengusaha yang telah mendapat kelulusan untuk membangunkan sesebuah kawasan segala syarat yang dikenakan hendaklah

dipatuhi, tetapi sekiranya syarat-syarat ini tidak dilaksanakan oleh pemaju yang mana mengakibatkan, seperti kata Yang Berhormat tadi berlakunya banjir dan sebagainya, maka sudah tentulah perkara ini akan dibawa ke Pihak Berkuasa Tempatan atau Dewan Bandaraya untuk pegawai-pegawai yang bertanggungjawab mengambil tindakan supaya pemaju perumahan tersebut diminta untuk melaksanakan apa juga kerja-kerja yang perlu untuk mengelakkan perkara ini terus berlaku dan jika sekiranya pihak pemaju enggan melaksanakan arahan yang dibuat oleh pihak berkuasa tempatan, maka ianya boleh sama ada dikompau atau didakwa di mahkamah.

**BANJIR KILAT—  
MENDALAMKAN SUNGAI  
KERAYONG**

**4. Tuan Liew Ah Kim** minta Menteri Pertanian menyatakan sama ada Jabatan Pengairan dan Saliran akan mengambil langkah-langkah melurus, mengorek dan mendalamkan Sungai Kerayong di Jalan Chan Sow Lin hingga ke Jalan Klang Lama, bagi mengatasi masalah banjir kilat di kawasan terbabit. Jika ia, bilakah langkah-langkah segera akan diambil dan jika tidak, kenapa?

**Timbalan Menteri Pertanian (Dato' S. Subramaniam):** Tuan Yang di-Pertua, Jabatan Pengairan dan Saliran sedang mengambil langkah-langkah yang perlu untuk melurus dan mendalamkan Sungai Kerayong. Satu tender untuk membaiki Sungai Kerayong dari Jambatan Jalan Loke Yew hingga ke Jambatan Jalan Sungai Besi akan dipanggil pada hujung bulan ini. Kawasan ini adalah termasuk Sungai Kerayong berhampiran Jalan Chan Sow Lin.

Kerja-kerja melurus dan mendalamkan Sungai Kerayong dari Jambatan Jalan Sungai Besi sehingga Jambatan Konkrit berhampiran Stor JKR Wilayah Persekutuan telahpun disiapkan pada tahun 1991. Pada masa ini Jabatan

Pengairan dan Saliran sedang mengambil langkah-langkah yang perlu untuk memanggil kontrak untuk membaiki Sungai Kerayong dari Jambatan Konkrit berhampiran Stor JKR Wilayah Persekutuan sehingga pertemuan Sungai Klang. Kontrak ini dijangka akan dipanggil pada hujung tahun ini.

**Tuan Liew Ah Kim:** Soalan tambahan. Mengikut jawapan yang diberi oleh Timbalan Menteri yang berkenaan bahawa projek itu dari Jalan Loke Yew hingga ke Jalan Sungai Besi akan dilaksanakan, saya ingin tahu berapakah jumlah peruntukan itu dianggarkan dan bilakah kerja-kerja dijangka siap?

**Dato' S. Subramaniam:** Tuan Yang di-Pertua, bagi kerja yang dicadangkan iaitu bagi membaiki Sungai Kerayong dari Jambatan Jalan Loke Yew ini, tender akan dipanggil dan amaun yang sebenarnya belum diketahui. Walau bagaimanapun, butiran kos projek adalah lebih kurang \$3 juta buat masa sekarang.

**PENDATANG TANPA IZIN—  
OPERASI PENDAFTARAN**

**5. Tuan Ahmad bin Omar** minta Menteri Dalam Negeri menyatakan:

- (a) laporan lengkap mengenai operasi pendaftaran pendatang tanpa izin yang tamat pada Jun 30, 1992; dan
- (b) apakah cadangan Kerajaan bagi mengatasi isu pendatang tanpa izin di masa hadapan.

**19. Dato' Haji Mohamad bin Abdullah** minta Menteri Dalam Negeri menyatakan:

- (a) berapa ramaikah pendatang asing tanpa izin telah berdaftar dengan pihak Imigresen sehingga 30-6-1992. Adakah Kerajaan bercadang untuk melanjutkan tempoh pendaftaran kerana ramai lagi yang belum mendaftar; dan

- (b) berapa ramaikah dianggarkan pendatang asing tanpa izin yang masih belum berdaftar sehingga sekarang. Apakah tindakan-tindakan akan dikenakan ke atas mereka yang tidak berdaftar tersebut.

**32. Tuan Lau Dak Kee** minta Menteri Dalam Negeri menyatakan:

- (a) berapakah jumlah pendatang haram yang telah didaftar setakat hari ini;
- (b) pecahan bilangan pendatang haram mengikut nasionaliti yang didaftar setakat hari ini; dan
- (c) apakah langkah-langkah berkesan dan tindakan Kerajaan akan diambil kepada pendatang haram yang tidak atau belum didaftar apabila ditahan kelak.

29-7-92

**14. Tuan Haji Ibrahim bin Mahmood** minta Menteri Dalam Negeri menyatakan berapakah anggaran buruh asing di Malaysia sekarang dan berapa pula yang mendaftarkan diri sehingga tarikh tutup pendaftaran mereka pada 30 Jun lalu. Apakah tindakan Kerajaan selanjutnya terhadap mereka yang gagal mendaftarkan diri.

30-7-92

**14. Tuan Abdol Mulok bin Awang Damit** minta Menteri Dalam Negeri menyatakan:

- (a) bilangan pekerja rakyat asing yang telah didaftarkan di seluruh negara dan pecahannya mengikut negeri;
- (b) apakah Kerajaan akan melanjutkan tarikh pendaftaran pekerja asing yang masih ramai belum sempat didaftarkan;
- (c) apakah tindakan yang akan diambil kepada majikan dan pekerja asing yang tidak berdaftar; dan

- (d) mengapakah pendaftaran pekerja rakyat asing tidak dilaksanakan di Sabah dan Wilayah Persekutuan Labuan.

**27. Tuan Nasruddin bin Haji Alang Saidin** minta Menteri Dalam Negeri menyatakan bilangan pendatang haram yang ditangkap kerana tidak mendaftar mengikut negara asal mereka dan apakah tindakan yang akan diambil terhadap mereka memandangkan hubungan baik antara negara kita dengan negara asal mereka.

3-8-92

**47. Tuan Tan Kok Wai** minta Menteri Dalam Negeri menyatakan:

- (a) berapakah jumlah syarikat yang menjalankan agensi pendaftaran pekerja asing yang dibenarkan oleh Kementerian untuk beroperasi dan namakan syarikat dan pemilikinya dan bayaran yang dikutip daripada para pekerja asing yang berdaftar;
- (b) berapakah jumlah levi yang berjaya dikutip oleh Kerajaan ke atas pekerja asing sehingga 30-6-92; dan
- (c) sejauh manakah amalan rasuah berlaku semasa gerakan pendaftaran berjalan, jika ada apakah tindakan yang dibuat kepada mereka yang terlibat.

**Setiausaha Parlimen Kementerian Dalam Negeri (Tuan Ong Ka Ting):** Tuan Yang di-Pertua, memandangkan soalan ini hampir serupa dengan 6 soalan yang lain, izinkan saya menjawabnya bersama-sama dengan soalan-soalan yang dikemukakan oleh:

- (i) Yang Berhormat dari Ipoh pada 28hb Julai;
- (ii) Yang Berhormat dari Maran pada 28hb Julai;
- (iii) Yang Berhormat dari Kuala Kerai pada 29hb Julai;

- (iv) Yang Berhormat dari Labuan pada 30hb Julai;
- (v) Yang Berhormat dari Parit pada 30hb Julai; dan
- (vi) Yang Berhormat dari Sungai Besi pada 3hb Ogos.

**Timbalan Yang di-Pertua (Tuan Ong Tee Keat):** Baiklah.

**Tuan Ong Ka Ting:** Sehingga 30hb Jun, 1992 seramai 353,739 orang PATI telah didaftar di Jabatan Imigresen Malaysia, terdiri daripada 205,545 orang dalam sektor pembinaan, 105,242 orang dalam sektor ladang dan 42,952 orang dalam sektor perkhidmatan pembantu rumah. Bilangan PATI dalam sektor perkilangan dan lain-lain perkhidmatan yang melapor belum diketahui kerana Jabatan Imigresen sedang memprosesnya. Walau bagaimanapun, Kerajaan telah memutuskan bahawa jika layak, mereka ini akan dibenarkan bekerja.

Kerajaan tidak akan melanjutkan lagi tempoh pendaftaran kerana tempoh yang diberi iaitu selama 6 bulan adalah mencukupi. Pada masa ini, pendaftaran PATI hanya dibuat di Semenanjung. Pendaftaran di Sarawak akan dibuat kemudian. Di Sabah ianya tidak dilakukan kerana Pasukan Petugas Khas Perskutuan telah dan sedang membuat perkara yang serupa. Kerajaan tidak pernah melantik agen atau syarikat untuk menguruskan pendaftaran PATI. Mereka hendaklah didaftar oleh majikan sendiri.

PATI ataupun Pekerja Asing Tanpa Izin yang mendaftar dikehendaki memenuhi syarat-syarat yang ditetapkan oleh Jabatan Imigresen sebelum pas kerja dikeluarkan kepada mereka, antaranya membayar wang cagaran dan pemeriksaan kesihatan. Setakat ini Kerajaan tidak dapat memastikan bilangan PATI yang tidak mendaftar atau melapor. Mereka ini sedang dikesan oleh pihak Polis dan Imigresen dalam operasi yang dipanggil "Ops Nyah II".

Tuan Yang di-Pertua, untuk melancarkan operasi mengesan dan menangkap PATI yang tidak mendaftar atau melapor, Kerajaan telah mengarahkan 4 Battalion Pasukan Polis Hutan seramai 1,500 anggota dan 565 orang pegawai Imigresen. Mereka dibantu oleh Pegawai-pegawai Polis Tugas Am, Pasukan Polis Udara, Polis Marin dan Unit Kawalan Kawasan (UKK). Sehingga 21hb Julai, 1992 seramai 48,361 orang PATI telah diperiksa yang mana daripadanya seramai 2,166 orang telah ditangkap dan ditahan di 10 buah depoh Imigresen. Mereka akan dihantar keluar dari negara ini. Walau bagaimanapun, PATI yang pernah mendaftar boleh ditimbang untuk diberi kepada majikan yang berkehendakkan mereka. Kerajaan juga membenarkan majikan mengambil PATI yang tidak mendaftar tetapi mereka dikehendaki keluar dahulu dan masuk kembali dengan mempunyai dokumen perjalanan dan pas kerja yang sah.

Tuan Yang di-Pertua, bagi mengatasi masalah kemasukan Pendatang Tanpa Izin (PTI) ke negara ini, beberapa langkah telah dan sedang diambil oleh Kerajaan, antaranya:

- (i) meningkatkan rondaan dan kawalan di kawasan-kawasan perairan dan sempadan negara; dan
- (ii) mengambil tindakan undang-undang terhadap PTI dan orang-orang yang bersubahat membawa masuk mereka ke negara ini.

**Tuan Sim Kwang Yang:** Tuan Yang di-Pertua, soalan tambahan. Apakah benar bahawa 30% dari pekerja-pekerja atau pendatang asing tanpa izin ini adalah pembawa HIV yang akan menyebabkan AIDS, seperti yang diumumkan oleh Yang Berhormat Timbalan Menteri Dalam Negeri semalam? Apakah asasnya? Apakah kajian ataupun bancian telah dijalankan untuk menentukan suatu keadaan yang

begitu menghairankan? Adakah dia betul? Oleh sebab pekerja-pekerja asing itu sama ada haram atau sah merupakan suatu risiko dari segi kesihatan, khususnya di negeri Sarawak dan Sabah, mereka membawa malaria. Maka apakah langkah akan diambil oleh pihak Kementeriannya supaya ujian kesihatan akan merupakan salah satu syarat untuk mengeluarkan permit supaya mereka mendapat kerja di Malaysia ini untuk menjamin bahawa mereka tidak akan membahayakan kesihatan rakyat Sarawak dan rakyat Malaysia keseluruhannya.

**Tuan Ong Ka Ting:** Tuan Yang di-Pertua, kenyataan yang saya dapat baca dalam akhbar hari ini tidak dapat saya mengesahkan oleh kerana ini adalah di dalam bidang Kementerian Kesihatan di mana hanya merekalah dapat mempunyai satu rekod yang lengkap mengenai berapa ramai daripada mereka yang sebenarnya adalah pembawa HIV. Jadi saya kena serahkan soalan ini untuk Kementerian Kesihatan nanti.

Mengenai risiko kesihatan yang mungkin akan disebabkan oleh pendatang atau pekerja asing, memang adalah satu kehendak di bawah Akta Imigresen bahawa sebelum mereka ditimbang untuk diberi pas kerja, mereka mesti terlebih dahulu menjalani pemeriksaan perubatan dan untuk disahkan supaya mereka tidak mempunyai apa-apa penyakit yang boleh membawa apa-apa kesan buruk kepada negara kita, sebelum mereka boleh ditimbangkan untuk dibenarkan bekerja di sini secara sah. Jadi dari segi kawalan itu, memang sudah ada sistem kawalannya.

**Dato' Dr Affifudin bin Haji Omar:** Tuan Yang di-Pertua, soalan tambahan. Menyambung soalan daripada Yang Berhormat dari Bandar Kuching tadi, saya ingin tahu mengapakah pendatang-pendatang haram ini yang didapati

mempunyai HIV positif dihantar balik sebelum dibuat siasatan yang lebih lanjut mengenai dengan kontek-kontek yang mereka buat di masa mereka di negara kita, kerana itu merupakan satu kesan yang mana jikalau mereka dihantar pulang ke Indonesia, kita tidak tahu apakah kesannya kepada masyarakat yang mereka telah membuat kontek masyarakat setempat.

Yang kedua, Tuan Yang di-Pertua, di dalam laporan akhbar ada juga mengatakan bahawa pendatang-pendatang yang didapati mempunyai rekod jenayah akan juga dihantar balik. Adakah langkah ini satu langkah yang arif yang mana siasatan-siasatan lanjut perlu dibuat sebelum mereka dihantar balik supaya dapat kita menyelesaikan masalah-masalah jenayah yang dilakukan oleh pendatang-pendatang tanpa izin ini.

**Tuan Ong Ka Ting:** Tuan Yang di-Pertua, pihak yang berkuasa tidak menghantar mereka balik begitu sahaja, sama ada mereka itu pembawa HIV positif ataupun mempunyai rekod jenayah.

Sebenarnya Jabatan Imigresen dengan kerjasama jabatan-jabatan yang lain akan membuat siasatan, jika sekiranya dapat menahan mana-mana satu pendatang tanpa izin yang melanggar Akta Imigresen termasuk yang mempunyai penyakit ataupun sudahpun melakukan jenayah. Tindakan-tindakan akan diambil dan penjenayah-penjenayah itu kita akan masukkan dia ke dalam penjara untuk dibicarakan, didakwa sehingga hukuman sudah dijatuhkan dan selepas hukuman sudah dijalani barulah kita lepaskan untuk mereka kembali kepada negaranya, maknanya kita tidak lepaskan penjenayah-penjenayah begitu sahaja. Ini adalah satu perbezaan yang jelas di mana pendatang tanpa izin yang melakukan kegiatan jenayah akan dimasukkan ke dalam penjara; lain-lain yang tidak ada rekod jenayah sahaja yang

akan ditempatkan di pusat-pusat Imigresen tahanan sementara. Jadi, untuk HIV positif ini juga kita akan rujuk kepada Kementerian Kesihatan, dan semua langkah-langkah kawalan memang diambil perhatian.

**Tuan Chor Chee Heung:** Tuan Yang di-Pertua, soalan tambahan. Memandangkan apa yang telah dijelaskan oleh Yang Berhormat Setiausaha Parlimen, saya ingin tahu apakah dasar Kementerian berkenaan dengan pendatang asing khususnya mereka yang ingin bekerja sebagai pembantu rumah, yang mana mereka telah masuk ke negara kita dan telah didaftarkan di Pejabat Imigresen, tetapi masih menunggu permit kerja. Oleh yang demikian, apakah dasar Kerajaan berkenaan dengan status mereka, adakah tempoh masa mereka dalam pas khas dilanjutkan sampai mereka mendapat permit kerja ataupun hingga hujung bulan ini sahaja? Sila berikan sedikit penerangan.

**Tuan Ong Ka Ting:** Tuan Yang di-Pertua, dasar Kementerian mengenai pas khas yang telah dikeluarkan untuk mereka yang telah mendaftar sebelum 30hb Jun sama ada dalam sektor perkhidmatan pembantu rumah, pembinaan ataupun perkilangan, semua mereka itu akan terus dilanjutkan lebih daripada hujung bulan ini. Dan satu arahan telahpun dikeluarkan oleh Kementerian Dalam Negeri untuk memastikan perkara ini akan diteruskan supaya tujuan asal kita mendaftarkan pekerja-pekerja itu dapat dicapai.

#### JAMBATAN DI LONG SAN— PEMBINAAN OLEH SYARIKAT PEMBALAKAN

**6. Tuan Harrison Ngau Laing** minta Menteri Kerja Raya menyatakan:

- (a) sama ada sebuah jambatan yang dipunyai/dibina oleh Syarikat Samling Timber Sdn. Bhd.

menyeberangi sungai Baram di Long San, dapat kelulusan dari Kementerian/Jabatan Kerja Raya;

- (b) mengapakah jambatan seperti ini boleh dibina walaupun ia membahayakan keselamatan penduduk-penduduk rumah panjang di Baram yang bergantung penuh kepada pengangkutan Sungai dalam menjalankan kegiatan seharian mereka; dan
- (c) apakah langkah-langkah yang telah, sedang dan akan diambil oleh Kementerian Kerja Raya untuk menghentikan pembinaan jambatan-jambatan oleh Syarikat balak yang menyeberangi serta menghalang laluan pengguna-pengguna sungai di seluruh Sarawak.

**Timbalan Menteri Kerja Raya (Datuk Peter Tinggom anak Kamarau):** Tuan Yang di-Pertua, untuk makluman Ahli Yang Berhormat:

- (a) kelulusan untuk membina jalan dan jambatan pembalakan bukan di bawah bidang kuasa Kementerian Kerja Raya. Pembinaan jalan dan jambatan pembalakan ini adalah di bawah bidang kuasa Kerajaan Negeri Sarawak. Jambatan di Long San ini telah dibina dan dimiliki oleh Syarikat Samling Timber Sdn. Bhd. Jambatan ini diguna untuk mengangkut balak merentasi Sungai Baram. Oleh kerana jambatan ini jambatan persendirian, ianya tidak perlu mendapat kelulusan dari Jabatan Kerja Raya (JKR).
- (b) dari segi struktur, jambatan ini direkabentuk bagi kegunaan kenderaan berat yang membawa balak. Ia mempunyai 8 span yang panjangnya 24 meter dan 1 span yang panjangnya 60 meter. Oleh

itu, dalam keadaan arus sungai yang biasa, ia tidak menghalang laluan bot melalui Sungai Baram.

- (c) Kementerian Kerja Raya tidak mempunyai kuasa untuk menghalang syarikat pembalakan dari membina jambatan-jambatan persendirian bagi kegunaan pengangkutan balak. Laluan keluar (termasuk melintasi sungai) bagi syarikat konsesi pembalakan telah ditetapkan dalam "General Harvesting Plan" yang mana diluluskan oleh Kerajaan Negeri Sarawak.

#### IKLAN BARANGAN— PENYELEWENGAN DAN DISKRIMINASI

**7. Puan Hajah Rakibah binti Haji Abdul Manap** minta Menteri Perdagangan Dalam Negeri dan Hal Ehwal Pengguna menyatakan memandangkan iklan barangan mempunyai pengaruh yang besar terhadap masyarakat, dan penyelewengan dan diskriminasi dalam pengiklanan tidak sepatutnya berlaku, apakah tindakan yang beliau ambil supaya orang ramai tidak tertipu dengan iklan-iklan seperti ini.

**Timbalan Menteri Perdagangan Dalam Negeri dan Hal Ehwal Pengguna (Dato' Abdul Kadir bin Haji Sheikh Fadzir):** Tuan Yang di-Pertua, Kementerian Perdagangan Dalam Negeri dan Hal Ehwal Pengguna sedar akan pengaruh iklan terhadap masyarakat. Bagi menentukan agar tiada penyelewengan, diskriminasi atau penyalahgunaan dalam urusan pengiklanan, Kementerian telah dan sedang mengambil langkah-langkah berikut:

- (a) menyemak dan meneliti iklan-iklan yang disiarkan melalui media massa, brochure, katalog, pamphlets dan sebagainya bagi

menentukan kesahihan setiap iklan itu. Dalam hubungan ini Kementerian mempunyai unit khas bertempat di Bahagian Penguatkuasa bagi mengawasi segala bentuk pengiklanan dan siasatan sewajarnya diambil jika mendapati mana-mana iklan yang mengelirukan atau palsu. Di bawah Akta Perihal Dagangan 1972 adalah menjadi satu kesalahan bagi sesiapa yang menyiarkan iklan yang palsu atau mengelirukan.

- (b) kita menganjurkan ceramah dan dialog dengan persatuan-persatuan peniagaan dan agensi-agensi pengiklanan bagi menjelaskan kehendak dan peruntukan undang-undang berkaitan dengan pengiklanan.
- (c) menganjurkan seminar dan pameran bertujuan menerangkan kepada pengguna akan hak-hak dan tanggungjawab mereka sebagai pengguna; dan
- (d) menyiasat semua aduan yang diterima serta mengambil tindakan undang-undang terhadap mana-mana pihak yang didapati melakukan kesalahan.

**Tuan Lim Guan Eng:** Tuan Yang di-Pertua, soalan tambahan. Saya hendak bertanya Yang Berhormat Timbalan Menteri bagi menyatakan bilangan atau jumlah tindakan yang telah diambil ke atas syarikat-syarikat yang membuat pengiklanan yang palsu khususnya sama ada pihak Kementerian bersedia mengambil tindakan ke atas PLUS, kerana telah membuat dakwaan atau tuntutan yang palsu dalam pengiklanan mereka, di mana mereka menyatakan bahawa perjalanan atau masa perjalanan di antara Tol Plaza Sungai Besi ke Air Keroh memakan masa 1 jam 20 minit, sedangkan masa perjalanannya sekarang memakan masa lebih kurang 2 1/2-3 jam.

Soalan yang kedua, Tuan Yang di-Pertua. Saya hendak bertanya juga Yang Berhormat Timbalan Menteri, bolehkah beliau menyatakan sama ada pihak Kementerian telah menyasiat mengapa Kementerian Pengangkutan khususnya Yang Berhormat Menteri Pengangkutan iaitu Presiden MCA selalu memberikan iklan-iklan untuk mencegah atau mengurangkan kemalangan jalan raya kepada satu syarikat sahaja, iaitu Media House Publishing. Adakah beliau sedar bahawa lebih kurang \$15 juta wang Kerajaan telah diberikan kepada syarikat ini dan sama ada ia merupakan suatu penyelewengan oleh Yang Berhormat Presiden MCA, dan mengapakah satu tender terbuka tidak diambil? (*Disampuk*) Sekian, terima kasih. Ada monyet di sana.

**Dato' Abdul Kadir bin Sheikh Fadzir:** Tuan Yang di-Pertua, memang dari semasa ke semasa kita telahpun mengambil tindakan di atas beberapa pengiklanan palsu. Misalnya saya hanya ada angka dari tahun 1986-1987, kita telahpun mengambil tindakan terhadap 143 kes.

Mengenai soal PLUS, sebagaimana yang kita tahu kadang-kadang soal pengiklanan dalam tiap-tiap akhbar begitu banyak sekali. Sungguhpun pihak Kementerian ada mempunyai satu unit yang sentiasa mengawalsedia dan juga menyasiat segala iklan-iklan yang dibuat dari semasa ke semasa, maka pihak kementerian memang memerlukan kerjasama masyarakat, jika mereka dapat bukti bahawa sesuatu iklan itu memang palsu ataupun tidak tepat, maka mereka bolehlah membuat aduan dan insya Allah kita akan ambil tindakan, memang kita memerlukan kerjasama dari masyarakat.

Keduanya mengenai Kementerian Pengangkutan yang memberi tugas pengiklanan hanya kepada satu syarikat, itu saya tidak ada butir-butir lanjut.

**Dr. Tan Seng Giaw:** Tuan Yang di-Pertua, soalan tambahan. Setakat ini adakah satu pasukan khas untuk meneliti iklan-iklan seperti ada di jalanraya-jalanraya, iklan mengenai misalnya Nestle ataupun Dutch Lady dengan susu misalnya. Dia kata susu "low fat" dan sebagainya serta dianggap sebagai susu yang paling sesuai. Adakah pihak Kementeriannya membuat siasatan ke atas iklan-iklan seperti ini kerana biasanya ada setengah-setengah itu tidak betul. Kerana hendak buat iklan sahaja untuk menarik pelanggan tetapi tidak bertanggungjawab. Adakah Kementeriannya berkemampuan untuk mengatasi ke semua ini? Dan adakah pihak Kementeriannya berkoordinasi dengan Kementerian Pendidikan misalnya, kerana memang ada bahan-bahan yang dibekalkan kepada sekolah-sekolah seperti susu yang tidak mengikut standard-standard yang ditetapkan?

**Dato' Abdul Kadir bin Haji Sheikh Fadzir:** Tuan Yang di-Pertua, sebagaimana yang telah saya nyatakan tadi memang Kementerian mempunyai satu unit khas di Bahagian Penguatkuasa untuk sentiasa menyasiat segala iklan-iklan yang dibuat termasuk iklan-iklan di tepi-tepi jalan dan sebagainya. Dan jika terdapat sesuatu iklan palsu maka memang kita ambil tindakan dan kita sudahpun mengambil tindakan. Pada tahun 1987 seratus lebih kes. Jadi kalaulah pihak rakyat mempunyai bukti-bukti yang mungkin telah terlepas dari pengetahuan kami bahawa sesuatu iklan itu palsu ataupun tidak tepat, maka kita mengalu-alukan aduan ataupun kerjasama.

**COMMONWEALTH WOMEN  
PARLIAMENTARIAN  
GROUP (CWPG)—DELEGASI  
WANITA**

8. Datin Ling Chooi Sieng minta Menteri Luar Negeri menyatakan memandangkan CPA telah bercadang menubuhkan satu "Steering Committee"

di bawah "Commonwealth Women Parliamentarian Group (CWPG)" dan satu persidangan akan diadakan di Bahamas dalam bulan September, 1992. Sama ada beliau bercadang menghantar sekumpulan ahli-ahli wanita Parlimen untuk menghadiri persidangan itu. Sejak manakah Kementerian beliau telah bertindak untuk memaklumkan sedunia terhadap perwakilan wanita di semua pejabat Kerajaan yang memuaskan.

**Timbalan Menteri Luar Negeri (Dato' Dr. Abdullah Fadzil bin Che Wan):** Tuan Yang di-Pertua, Persatuan Parlimen Komanwel Cawangan Malaysia merupakan sebuah badan yang bertanggungjawab dalam menentu dan melaksanakan sebarang keputusan yang berkaitan dengan persatuan melalui bidang kuasa yang ada padanya.

Perkara sama ada wanita akan dipilih untuk menyertai delegasi ke persidangan yang akan diadakan itu haruslah ditentukan oleh Persatuan Parlimen tersebut.

Malaysia sering menggunakan kesempatan yang ada padanya di forum antarabangsa seperti Commonwealth atau Pertubuhan Bangsa-Bangsa Bersatu bagi menonjolkan penglibatan dan penyertaan aktif wanita dalam keseluruhan aktiviti-aktiviti pembangunan negara.

**Puan Siti Zainabon binti Abu Bakar:** Soalan tambahan. Saya ingin tahu dalam lawatan-lawatan yang diaturkan oleh Kementerian Luar Negeri, mengapakah dalam rombongan Malaysia didapati biasanya tiada atau sangat kekurangan wakil-wakil wanita? (*Tepuk*) Apakah sebabnya dan adakah Kementerian akan memperbaiki keadaan ini?

Yang kedua, bagaimana dan apakah yang telah dilakukan oleh Kementerian Luar Negeri untuk memaklumkan

kepada dunia bahawa wanita-wanita di Malaysia tidak ketinggalan atau tertindas? (*Tepuk*)

**Dato' Dr. Abdullah Fadzil bin Che Wan:** Tuan Yang di-Pertua, saya ingin menyatakan bahawasanya tidaklah betul dan tepat bahawasanya wanita diketepikan sama sekali dalam lawatan-lawatan yang dianjurkan oleh Wisma Putra, sesungguhnya ada dari masa ke semasa. Oleh kerana jumlah Ahli Parlimen wanita tidak berapa banyak sangat maka mungkin tidak ternampak. Tetapi spesifiknya dan jumlah yang terperinci tidak dapat saya beri sekarang ini tetapi boleh saya siasat selepas ini dan saya beri kepada Yang Berhormat. Tetapi untuk masa-masa muka ini saya percaya pihak Wisma Putra akan memberi pertimbangan yang lebih kepada wakil-wakil Parlimen daripada wanita.

Keduanya, tentang peranan Wisma Putra terhadap menonjolkan kepada dunia yang wanita-wanita di Malaysia ini tidak ketinggalan. Tidak payah kita pertonjolkan lebih sebab dunia pun tahu yang mana dasar negara kita amat baik, amat saksama terhadap wanita oleh kerana jumlah wanita dalam Kabinet contohnya, dalam badan-badan tertinggi di bawah Kerajaan ada melihatkan peratusan wanita yang agak memuaskan kalau dibandingkan dengan lain-lain negara.

Dalam lain-lain bidang pun kita boleh lihat di negara kita, contohnya peranan dan tempat-tempat tertentu yang diberikan kepada wanita adalah agak baik kalau dibandingkan dengan lain-lain negara.

**Puan Hajah Rakibah binti Haji Abdul Manap:** Tuan Yang di-Pertua, soalan tambahan. Memandangkan apa yang dikatakan oleh Timbalan Menteri tadi iaitu berhubung dengan pengiktirafan Kerajaan Malaysia terhadap wanita begitu baik, kita akui. Rasanya

wanita di Malaysia pun berasa bangga berada di dalam negara Malaysia cuma tidak Kerajaan Negeri Kelantanlah.

Jadi oleh kerana kita berasa bangga berada di negara Malaysia ini, elok juga satu pendedahan (exposure), apakah program-program pendedahan serta penglibatan wanita Malaysia yang diadakan di peringkat antarabangsa terutama melalui persidangan CPA?

**Dato' Dr. Abdullah Fadzil bin Che Wan:** Tuan Yang di-Pertua, cara kita hendak mendedahkan....(Ketawa) wanita Malaysia di peringkat antarabangsa itu ialah melalui menghadiri dan menganggotai delegasi Malaysia dalam apa bentuk sahaja persidangan yang ada yang Malaysia mengambil bahagian.

Seperti juga dalam persidangan CPA ini saya percaya pihak yang bertanggungjawablah yang menentukan senarai delegasi yang pergi ke CPA ini akan juga tidak ketinggalan menyenaraikan juga nama kaum-kaum wanita untuk sama-sama menyertai delegasi tersebut. Mungkin kalau tidak cukup ditambahkan lagi.

Umumnya saya kira penglibatan wanita masa kini kita mengiktirafi bahawasanya di negara kita pun tanpa wanita memberi sokongan tidak dapat kerajaan Barisan Nasional memerintah bukan? Maka kita akan tetap memberi perhatian kepada wanita untuk mendapat tempat yang sewajarnya di peringkat persidangan antarabangsa dari masa ke semasa.

#### **HOSPITAL LADANG— PENGAMBILANALIH PENTADBIRAN**

**9. Tuan G. Palanivel** minta Menteri Kesihatan menyatakan sama ada Kementeriannya mengambilalih pentadbiran semua hospital ladang (60 kesemuanya) di negara ini bagi memperbaiki kemudahan dan kesihatan.

Kalau tidak apakah Kerajaan akan mempertimbangkan supaya menyediakan bekalan perubatan dan pegawai kesihatan kepada ladang-ladang untuk meninggikan lagi perkhidmatan perubatan. Kemudahan kesihatan yang lebih baik akan memberi dorongan kepada pekerja ladang untuk terus menetap di ladang dan bukan berhijrah ke bandar-bandar besar.

**Timbalan Menteri Kesihatan (Dato' Mohamed Farid bin Ariffin):** Tuan Yang di-Pertua, Kementerian Kesihatan tidak bercadang untuk mengambilalih pentadbiran semua hospital ladang di negara ini. Pada masa ini Kementerian Kesihatan belum lagi bersedia untuk menyediakan bekalan perubatan dan Pegawai-pegawai Kesihatan kepada ladang-ladang kerana undang-undang yang sedia ada iaitu Akta Standard Minimum (Perumahan dan kemudahan) pekerja 1990 menyatakan penyediaan perkhidmatan perubatan adalah di bawah tanggungjawab pihak pengurusan ladang-ladang tersebut.

Walau bagaimanapun, Kementerian menyediakan kemudahan kesihatan dan juga memberi perkhidmatan kesihatan kepada semua penduduk termasuk pekerja ladang untuk menikmatinya. Pihak majikan perlu mengatur dan membenarkan pekerja-pekerja mereka mendapatkan perkhidmatan yang disediakan. Kementerian Kesihatan juga memperkembangkan aktiviti-aktiviti dalam program-program khas seperti Program Rancangan Kawalan Penyakit Bawaan Vektor dan dengan izin Universal Child Immunization Programmes, Kawalan Penyakit dan Sanitasi Estet.

**Tuan Fong Kui Lun:** Tuan Yang di-Pertua, soalan tambahan. Adakah Yang Berhormat Timbalan Menteri sedar bahawa ada hospital ladang hanya diurus oleh Pembantu Hospital sahaja dan doktor hanya datang sekali seminggu seperti di Pulau Carey dan kemudahan

hospital serba tidak lengkap. Jika sedar, apakah tindakan yang Kementerian Yang Berhormat akan ambil untuk memperbaiki keadaan ini?

**Dato' Mohamed Farid bin Ariffin:** Tuan Yang di-Pertua, kita sedar banyak hospital-hospital estet pada masa ini mempunyai fasiliti-fasiliti yang kurang termasuk di tempat yang disebutkan oleh Yang Berhormat. Kita memberi ke-longgaran sedikit kepada hospital-hospital tersebut kerana memandangkan keadaan yang mungkin banyak ladang-ladang sudah tidak dapat menyediakan fasiliti-fasiliti yang lengkap.

Walau bagaimanapun, kita membenarkan pekerja-pekerja ladang ini terus menggunakan perkhidmatan daripada Kementerian Kesihatan, tentu sekali jika sekiranya mereka dirujuk kepada hospital ataupun fasiliti Kementerian.

**Tuan Lim Guan Eng:** Tuan Yang di-Pertua, soalan tambahan. Saya bertanya Yang Berhormat Timbalan Menteri untuk menyatakan jumlah wang yang telah dibelanjakan oleh pihak Kerajaan untuk memberikan perkhidmatan kesihatan kepada hospital-hospital ladang ini. Dan juga jumlah atau bilangan kakitangan yang telah dihantar ke ladang-ladang tersebut. Kalau tidak, adakah pihak Kerajaan bercadang untuk menambah apa yang sedia ada?

Yang kedua, adakah Yang Berhormat Menteri Kesihatan dan Yang Berhormat Timbalan Menteri sendiri pernah melawat hospital-hospital ladang ini dan kalau tidak adakah beliau bercadang untuk berbuat demikian supaya lebih sedar dan lebih tahu tentang keadaan yang wujud di hospital-hospital tersebut?

**Dato' Mohamed Farid bin Ariffin:** Tuan Yang di-Pertua, soalan yang pertama agak irrelevant, dengan izin, sebab saya telah menjawab pada peringkat awal bahawa tanggungjawab

menyediakan kemudahan kesihatan adalah terkawal di bawah undang-undang yang dinamakan Akta Standard Minimum (Perumahan dan Kemudahan Pekerja) 1990 yang memberi tanggungjawab kepada pengurusan estet-estet tersebut untuk menyediakan perkhidmatan perubatan. Walau bagaimanapun, saya telah menyatakan dengan jelas tadi bahawa kita terus juga memberi perkhidmatan kepada pekerja-pekerja estet tersebut melalui beberapa program tertentu termasuk program bekalan air bersih, program immunisasi dan sebagainya.

Untuk soalan yang kedua, saya sendiri telah melawat satu-dua kali tetapi tidak mengaku boleh melawat semua, tetapi sekiranya ada satu tempat yang perlu saya lawat melalui permintaan Yang Berhormat, saya boleh mengikuti Yang Berhormat bersama-sama.

#### **ANCAMAN AMERIKA KE ATAS LIBYA-PENDIRIAN MALAYSIA**

**10. Tuan Haji Mohamad bin Sabu** minta Menteri Luar Negeri menyatakan:

- (a) apakah pendirian Malaysia berhubung dengan tekanan yang dikenakan oleh Amerika Syarikat menggunakan Majlis Keselamatan Bangsa-bangsa Bersatu terhadap Libya berikutan dengan isu dua rakyat Libya yang didakwa terlibat dalam serangan bom pesawat Pan Am di ruang angkasa Lockerbie, Scotland pada tahun 1988;
- (b) oleh kerana masih terdapat ancaman yang begitu ketara dari Amerika ke atas Libya, adakah Malaysia akan mengulangi pendirian untuk menyetujui serangan ke atas Libya melalui suatu ketetapan Bangsa-bangsa Bersatu jika Amerika menyeret dunia ke arah itu; dan
- (c) adakah Malaysia selaku anggota OIC berpendapat bahawa OIC perlu bertindak segera untuk

memastikan rancangan Amerika untuk menjahanankan sebuah lagi negara umat Islam dapat dibendung dan dipatahkan melalui forum-forum antara bangsa. Jika ia, bilakah langkah tersebut akan diambil. Jika tidak, mengapa.

**Dato' Dr. Abdullah Fadzil bin Che Wan:** Tuan Yang di-Pertua:

- (a) Malaysia sebagai sebuah negara anggota Pertubuhan Bangsa-bangsa Bersatu telah menjelaskan perasaan kekesalan kita atas tekanan yang merupakan sekatan (sanction), dengan izin, oleh Pertubuhan Bangsa-bangsa Bersatu terhadap Libya kerana tindakan tersebut dibuat agak tergesa-gesa memandangkan usaha-usaha diplomatik masih dan sedang dijalankan antara beberapa pihak bagi mencari jalan penyelesaian ke atas isu tersebut;
- (b) pendirian kita adalah jelas. Penyelesaian sesuatu konflik antarabangsa hendaklah dibuat melalui perundingan secara aman tanpa perlu menggunakan tindakan ketenteraan. Oleh itu, kita berharap isu tersebut akan dapat diselesaikan secara aman tanpa menggunakan kekerasan ke atas Libya;
- (c) Pertubuhan Persidangan Islam (OIC), di sidang kemuncaknya yang keenam di Dacca, Sinegal yang diadakan pada penghujung tahun lalu telahpun mengambil ketetapan menggesa Amerika Syarikat supaya tidak mengambil tindakan ketenteraan ke atas Libya dalam menyelesaikan isu tersebut. Sidang kemuncak itu menggesa agar isu berkesan diselesaikan secara aman.

**Tuan Haji Mohamad bin Sabu:** Tuan Yang di-Pertua, memandangkan tindakan ketenteraan terutama daripada

kuasa besar menjadi-jadi mutakhir ini, apakah Malaysia yang menjadi anggota OIC tidak mahu mempelopori supaya OIC di samping mengeratkan tali persahabatan kebudayaan, juga menjadikan OIC sebagai suatu kuasa tentera pada masa yang akan datang-ikatan tentera?

**Dato' Dr. Abdullah Fadzil bin Che Wan:** Tuan Yang di-Pertua, pihak negara kita tidak ada minat untuk membawa atau mempengaruhi OIC supaya menjadi suatu kuasa tentera.

**Wan Junaidi bin Tuanku Jaafar:** Tuan Yang di-Pertua, Malaysia sebagai salah seorang ahli dalam OIC, jadi masalah OIC ialah kadang-kadang agree to disagree. Macam manakah? Adakah tindakan yang begini ataupun keadaan yang begini mendatangkan kelemahan kepada tindakan-tindakan yang dibuat oleh OIC itu sendiri kepada negara-negara lain.

**Dato' Dr. Abdullah Fadzil bin Che Wan:** Tuan Yang di-Pertua, dalam isu penggunaan kekerasan atau ketenteraan terhadap Libya itu pihak OIC sebulat suara berdiri di belakang pendirian yang telah saya sebut sebentar tadi. Berkenaan dengan lain-lain perkara itu, mengikut keadaan dan suasana, tetapi pada kes soalan yang berkenaan yang ditanyakan pada kali ini, pihak OIC dan anggota-anggotanya semua sepakat tentang pendirian yang telahpun dibuat.

**Tuan Haji Hamzah bin Haji Mohamed Zain:** Tuan Yang di-Pertua, berkaitan dengan tekanan yang dilakukan oleh Amerika Syarikat dengan menggunakan Majlis Keselamatan Bangsa-bangsa Bersatu adakah Malaysia bercadang supaya Majlis Keselamatan ini dirombak strukturnya bagi mengelakkan tekanan-tekanan seperti ini. Bagaimanakah usaha Malaysia itu dan setakat ini setakat

manakah sokongan daripada negara-negara lain termasuk kumpulan OIC, kumpulan negara-negara berkecuali, dunia ketiga dan sebagainya ke atas usaha untuk merombak struktur yang ada sekarang ini?

**Dato' Dr. Abdullah Fadzil bin Che Wan:** Tuan Yang di-Pertua, walaupun ketika ini pihak negara tertentu ingin menggunakan ketenteraan terhadap Libya, tetapi di atas desakan atau pressure, dengan izin, digunakan oleh kita dan lain-lain negara membangun dan negara-negara anggota OIC, maka hajat dan hasrat negara berkenaan untuk melaksanakan kuasa tenteranya tidak dilaksanakan hingga kini. Maka walaupun dia cuba, tetapi tidak berhasil dan berjaya pada ketika ini.

Keduanya,....

**Tuan Haji Hamzah bin Haji Mohamed Zain:** Struktur Majlis Keselamatan itu sendiri.

**Dato' Dr. Abdullah Fadzil bin Che Wan:** Keduanya, tentang rombakan Majlis Keselamatan Bangsa-bangsa Bersatu merupakan soalan nombor dua, yang mana saya telahpun menjawab sedikit semalam di mana saya menyatakan bahawanya Kerajaan Malaysia telahpun menyampaikan pandangan kita bahawasanya sekiranya perlu dirombak mengikut keadaan semasa, tetapi ini baru sahaja kita mencadangkannya melalui ucapan Perdana Menteri di Rio baru-baru ini dan ini memerlukan proses yang agak lama juga untuk kita pergi "melobby" ke negara-negara di seluruh dunia yang menjadi anggota kepada Pertubuhan Bangsa-bangsa Bersatu.

#### PENYELUDUPAN BARANG BERDUTI-NILAI KERUGIAN

**11. Tuan Haji Ibrahim bin Jendol** minta Menteri Kewangan menyatakan:

(a) berapakah jumlah nilai kerugian yang dialami oleh pihak Kerajaan akibat dari penyeludupan dan

penyelewengan barang-barang berduti sejak lima tahun yang lepas; dan

(b) apakah langkah-langkah pencegahan yang diambil oleh Kementerian supaya kes-kes penyeludupan dan penyelewengan ini dapat dikurangkan ke tahap yang minimum atau dihapuskan.

**Timbalan Menteri Kewangan (Dato' Loke Yuen Yeow):** Tuan Yang di-Pertua:

(a) berdasarkan tangkapan yang dibuat oleh pihak Jabatan Kastam, nilai kerugian yang dialami oleh Kerajaan akibat daripada penyeludupan dan penyelewengan barang-barang berduti sejak lima tahun yang lepas, bernilai kira-kira \$59 juta. Pecahan adalah seperti berikut:

<i>Tahun</i>	<i>Kerugian</i>
1987	\$9,252,240.00
1988	\$10,446,061.00
1989	\$8,362,531.00
1990	\$13,032,108.00
1991	\$17,961,807.00

(b) Langkah-langkah yang telah diambil oleh Jabatan Kastam untuk mengurangkan kes-kes penyeludupan dan penyelewengan ke tahap yang minimum adalah seperti berikut:

- (i) mengadakan kempen-kempen, dialog serta pencerangan kepada pihak awam mengenai perlunya kerjasama mereka dalam membantu Jabatan membanteras penyeludupan di kawasan mereka.
- (ii) mengadakan rondaan-rondaan darat dan laut di seluruh kawasan yang telah dikenalpasti sebagai laluan penyeludupan;

- (iii) mendapatkan bekalan peralatan logistik yang moden dan mencukupi bagi membantu kakitangan Jabatan untuk menjalankan aktiviti-aktiviti pencegahan;
- (iv) mengadakan latihan untuk meningkatkan pengetahuan serta kemahiran pegawai-pegawai pencegahan ke tahap yang maksimum;
- (v) mewujudkan kerjasama dengan agensi-agensi lain seperti Polis, Imigresen, Jabatan Pengangkutan Jalan, Jabatan Pendaftaran Negara dan Pendaftaran Syarikat;
- (vi) mengadakan kerjasama dengan negara jiran seperti Indonesia dan Thailand untuk mengatasi penyeludupan di kawasan sempadan;
- (vii) menjalankan kajian untuk membuka stesen-stesen pencegah yang baru serta pertambahan kakitangan di kawasan-kawasan yang aktif dengan kes penyeludupan;
- (viii) meningkatkan Cawangan Perisikan Jabatan bagi mengesan trend-trend penyeludupan, *modus operandi* serta langkah-langkah pengawalan yang diperlukan.

**Tuan Ahmad bin Nor:** Tuan Yang di-Pertua, adalah diketahui bahawa penyeludupan yang dilakukan oleh penyeludupan-penyeludupan kolar putih di negara ini adalah meluas dan lebih berat daripada penyeludupan yang dibawa masuk oleh penyeludupan-penyeludupan melalui laut, udara mahupun darat secara terus. Apakah langkah yang telah diambil oleh

Kementerian bagi menentukan bahawa kegiatan penyeludupan-penyeludupan kolar putih yang menggunakan secara merendahkan nilai harga ataupun memainkan kod-kod Kastam yang telah digunakan untuk mengelakkan cukai yang selama ini sedang berlaku?

**Dato' Loke Yuen Yow:** Tuan Yang di-Pertua, berkenaan perkara yang dibangkitkan oleh Yang Berhormat dari Bayan Baru mengenai penyeludupan kolar putih, saya di sini ingin memberitahu Ahli Yang Berhormat yang berkenaan bahawa ada apa dikatakan aduan-aduan berkenaan apa yang dibangkitkan dan Kerajaan kita ini telah memberi perhatian supaya apabila kita mendapat cukup maklumat berkenaan apa yang dibangkitkan, Kerajaan akan mengambil tindakan yang sewajarnya.

**Tuan Chor Chee Heung:** Tuan Yang di-Pertua, soalan tambahan. Saya ingin bertanya kepada Yang Berhormat Timbalan Menteri sejak lima tahun yang lepas ini kebanyakan apakah jenis barang-barang ataupun komoditi yang berduit yang telah diseludup masuk ke negara kita tanpa membayar duit yang mengakibatkan nilai kerugian yang paling tinggi sekali? Yang kedua, adakah benar bahawa banyak buah kereta-kereta mewah yang telah diseludup masuk ke negara kita untuk dijual adalah perbuatan syarikat pengimport kereta yang mempunyai AP yang sah? Dan jika benar, adakah pembeli-pembeli kereta-kereta tersebut yang telah menjadi mangsa boleh dipersalahkan lagi dalam pembelian ini?

**Dato' Loke Yuen Yow:** Tuan Yang di-Pertua, oleh kerana soalan ini adalah sedikit teknikal, saya minta mengulangi soalan itu.

**Tuan Chor Chee Heung:** Tuan Yang di-Pertua, soalan saya adalah macam ini. Tadi Yang Berhormat Timbalan Menteri telah memberitahu banyak barang-barang komoditi yang telah diseludup

masuk ke negara kita sejak lima tahun yang lepas ini, dan saya ingin tahu apakah jenis barang-barang ataupun komoditi yang berduti tetapi telah diseludup ke negara kita tanpa dibayar duti yang mengakibatkan nilai kerugian yang paling tinggi sekali? Apakah jenis barang-barang ataupun komoditi? Yang kedua, adakah benar bahawa banyak kereta-kereta mewah yang telah diseludup masuk ke negara kita tanpa membayar duti adakah perbuatan pengimport kereta yang mempunyai AP yang sah? Dan jika benar adakah pembeli-pembeli kereta tersebut, yang telah menjadi mangsa, boleh dipersalahkan lagi dari segi undang-undang?

**Dato' Loke Yuen Yow:** Tuan Yang di-Pertua, barangan-barangan yang diseludup ke dalam negara kita ini dengan tidak membayar duti yang telah mengakibatkan Kerajaan kita ataupun negara kita hilang ataupun rugi duti, seperti apa yang telah saya jawab tadi, adalah barang-barang seperti tekstil, elektronik dan sebagainya. Saya tidak ada senarai barangan yang lengkap ini, tetapi barang yang banyak sekali diseludup adalah barangan tekstil. Jabatan Kastam telah mengambil tindakan supaya barangan seperti ini yang sentiasa diseludup ke dalam negara kita ini tidak akan berlaku. Sepertimana yang saya telah jawab tadi, Langkah-langkah telah dan sedang diambil oleh Jabatan Kastam dalam perkara ini.

Soalan kedua berkenaan dengan pengimport-pengimport kereta yang menggunakan AP yang sah, kemungkinan mereka pun menyeludup kereta yang berkenaan. Di sini saya tidak dapat menjawab mengenai siapakah dipersalahkan ataupun sama ada pembeli kereta itu disalahkan. Ini bergantung kepada case to case. Jadi, saya mintalah, jikalau Yang Berhormat menjumpai kes seperti ini, supaya membawanya ke Jabatan Kastam ataupun Kementerian Kewangan, dan kita akan mengkaji kes tersebut.

**Timbalan Yang di-Pertua (Tuan Ong Tee Keat):** Masa untuk Pertanyaan-pertanyaan bagi Jawab Mulut telah pun tamat.

*(Masa untuk Pertanyaan bagi Jawab Mulut telah cukup dan Jawapan bagi Pertanyaan No. 2 dan No. 12 hingga 67 adalah diberi di bawah ini)*

### PENGGAJIAN PEKERJA INDONESIA DI SABAH

**2. Tuan Geoffrey Yee Ling Fook** minta Menteri Sumber Manusia menyatakan sama ada beliau sedar bahawa untuk mengambil seorang pekerja Indonesia di Sabah, kita dikehendaki melalui sekurang-kurangnya enam buah jabatan Kerajaan seperti berikut:

- (a) MMFB (Malaysian Migration Fund Board): untuk memohon job order.
- (b) Jabatan Buruh: untuk memohon lesen buruh.
- (c) Jabatan PERKESO: untuk memohon insuran buruh.
- (d) MMFB (Malaysian Migration Fund Board): untuk membayar M\$1.00 setiap bulan untuk seorang buruh.
- (e) Konsulat Indonesia: Kebenaran untuk mengambil buruh Indonesia.
- (f) Jabatan Imigresen: untuk membayar M\$250.00 deposit untuk mengambil seorang buruh Indonesia,

dan dengan demikian menghabiskan lebih kurang lima hari kerana urusan untuk mengambil seorang buruh:

- (i) mengapakah Kerajaan mempunyai begitu banyak Jabatan dan Red Tape untuk mengambil hanya seorang buruh;

- (ii) bolehkah Kerajaan mempertimbangkan untuk mengurangkan hanya sebuah Jabatan Buruh dan Jabatan Imigresen mengendalikan langkah untuk mengambil buruh; dan
- (iii) sama ada majikan di Semenanjung Malaysia seharusnya melalui proses yang sama untuk mengambil buruh.

**Timbalan Menteri Sumber Manusia (Dato' M. Mahalingam):** Prosedur pengambilan dan penggajian pekerja dari Indonesia di Sabah adalah seperti berikut:

- (i) majikan hendaklah memastikan dengan Jabatan Tenaga Rakyat ada atau tidak pekerja warganegara tempatan untuk mengisi kekosongan jawatan yang diperlukan.
- (ii) setelah mendapat perakuan Jabatan Tenaga Rakyat bahawa tiada warganegara tempatan untuk mengisi kekosongan tersebut, majikan dikehendaki mendapatkan lesen menggaji pekerja pendatang dari Jabatan Buruh Sabah;
- (iii) majikan kemudian dikehendaki mendaftar dan memohon pengambilan buruh Indonesia melalui job order daripada Lembaga Kumpulanwang Perpindahan Malaysia;
- (iv) Lembaga Kumpulanwang Perpindahan Malaysia akan membuat surat sokongan kepada Jabatan Imigresen untuk pengeluaran pas kerja kepada buruh berkenaan untuk membenarkan dia bekerja dengan majikan yang berkenaan.

Daripada keterangan ini, proses pengambilan pekerja dari Indonesia hanyalah melibatkan empat buah agensi Kerajaan sahaja.

Proses pengambilan pekerja dari Indonesia ini mesti melalui jabatan-jabatan atau agensi yang disebutkan sebab jabatan-jabatan atau agensi berkenaan mempunyai peruntukan-peruntukan undang-undang yang khusus di samping mempunyai fungsi-fungsi tertentu yang khusus di samping mempunyai fungsi-fungsi tertentu mesti dilaksanakan atau dikuatkuasakan berhubung dengan penggajian pekerja-pekerja pendatang di negeri ini.

Dengan wujudnya jabatan-jabatan dan agensi-agensi tertentu seperti tersebut di atas, maka pengambilan dan penggajian pekerja asing akan lebih terkawal melalui penguatkuasaan peruntukan undang-undang dan pelaksanaan fungsi-fungsi tertentu yang sedia ada. Ini adalah untuk memastikan supaya peluang-peluang pekerjaan untuk warganegara tempatan tidak terjejas dan sentiasa diberi keutamaan.

Proses pengambilan pekerja di Semenanjung Malaysia adalah berbeza dengan proses pengambilan di negeri Sabah oleh kerana perundangan buruh yang berbeza di antara Semenanjung Malaysia dan Sabah.

#### **HUKUM HUDUD—JAMINAN KEADILAN KEPADA BUKAN ISLAM**

**12. Tuan R. Karpal Singh** minta Perdana Menteri menyatakan sama ada Kerajaan bersedia untuk menjamin bahawa ia tidak akan memudahkan pelaksanaan hukum Hudud ke atas rakyat bukan beragama Islam di mana-mana bahagian negara memandangkan negara ini berbilang agama. Jika tidak, beri sebab-sebabnya.

**Timbalan Menteri di Jabatan Perdana Menteri (Dato Dr Haji Abdul Hamid bin Haji Othman):** Gagasan pelaksanaan hukum hudud adalah merupakan rancangan disuarakan oleh Kerajaan Negeri Kelantan di bawah pimpinan Parti PAS.

Setiap undang-undang yang akan dilaksanakan di negara ini akan melalui proses undang-undang yang sedia ada. Perlembagaan Malaysia menjamin bahawa setiap undang-undang yang dilaksanakan tidak akan menganiayai mana-mana pihak.

#### TARIF LETRIK DI SABAH

**13. Tuan Joseph Voon** minta Menteri Tenaga, Telekom dan Pos menyatakan sam ada pihak Kementerian beliau bercadang untuk menurunkan tarif letrik di Sabah dan bilakah penurunan ini akan dilaksanakan. Kalau tidak kenapa.

**Menteri Tenaga, Telekom dan Pos (Dato' Seri S. Samy Vellu):** Tuan Yang di-Pertua, cadangan bagi menurunkan tarif elektrik di Sabah tidak dapat dipertimbangkan pada masa ini oleh kerana sebab-sebab berikut:

- (i) Negeri Sabah adalah sebuah negeri yang besar dan luas dan mempunyai kadar kependudukan yang rendah, berselerak dan tinggal di kawasan-kawasan terpencil. Oleh yang demikian, perbekalan kuasa di Sabah sebahagian besarnya bergantung kepada set-set penjanaan kecil yang bersendirian dan menggunakan bahan bakar disel. Oleh itu, tidak terdapat ekonomi di dalam penjanaan dan penghantaran kuasa elektrik;
- (ii) di samping itu, harga bahan bakar disel yang tinggi meningkat lagi kos pengendalian Lembaga Letrik Sabah;

- (iii) Lembaga Letrik Sabah terpaksa mensubsidikan pengguna-pengguna domestik di kawasan luar bandar sebanyak 74 sen seunit kerana kos penjanaan bagi setiap unit ialah \$1.00 sedangkan pengguna-pengguna hanya dikenakan bayaran 24 sen seunit.

Untuk makluman Ahli Yang Berhormat, kos pengeluaran di negeri Sabah ialah 25 sen seunit—19.5 sen seunit bagi kos kendalian dan 5.4 sen seunit bagi kos kewangan. Walau bagaimanapun, purata kadar tarif perindustrian yang dikenakan ialah 24 sen seunit. Sebanyak 83% daripada keseluruhan pengguna adalah pengguna kediaman. Kebanyakan mereka menggunakan tenaga elektrik di antara 100 hingga 400 unit dan dikenakan bayaran di antara \$ 19.20 hingga \$86.40 bergantung kepada jumlah unit yang digunakan. Berbanding dengan pengguna-pengguna kediaman di Semenanjung yang menggunakan tenaga elektrik dalam lingkungan unit yang sama dikenakan bayaran di antara \$20 hingga \$89. Ini bermakna sebahagian besar daripada pengguna-pengguna di Negeri Sabah membayar tarif yang lebih rendah daripada pengguna di Semenanjung.

Kesemua ini jelas menunjukkan bahawa Kerajaan Pusat telah berusaha untuk mengurangkan beban tarif bagi pengguna-pengguna di negeri Sabah dengan memberikan subsidi. Malah, akibat daripada pemberian subsidi-subsidi itu, Lembaga Letrik Sabah telah mengalami kerugian penjanaan seperti berikut:

<i>Tahun</i>	<i>Kerugian (M\$)</i>
1986	14,247,797
1987	20,897,448
1988	25,465,452
1989	6,393,956
1990	12,362,129

Maka dengan mengambil fakta-fakta ini di dalam pertimbangan Kementerian Tenaga, Telekom dan Pos tidak bercadang untuk mengurangkan kadar tarif di negeri Sabah pada masa ini sehinggalah kos penjanaaan dan penghantaran kuasa elektrik dapat dikurangkan. Pada masa ini, Lembaga Letrik Sabah sedang berusaha untuk menurunkan kos penjanaannya dengan mengalihkan penggantungannya ke atas bahan bakar disel kepada sumber hidro.

### BAHAN MENTAH—MONOPOLI IMPORT

**14. Datuk Haji Basri bin Bajuri** minta Menteri Perdagangan Antarabangsa dan Industri menyatakan:

- (a) sama ada beliau sedar bahawa masalah utama pengusaha-pengusaha kecil dan sederhana dalam sektor pembuatan ialah bahan mentah (terutama bahan mentah yang diimport) yang dimonopoli oleh satu-satu pihak tertentu sahaja dan mereka juga yang menentukan harga; dan
- (b) apakah usaha Kerajaan untuk memecahkan monopoli seperti itu supaya harga bahan-bahan mentah itu "competitive".

**Setiausaha Parlimen Kementerian Perdagangan Antarabangsa dan Industri (Tuan S.S. Subramaniam):**

- (a) Pihak Kementerian sememangnya menyedari bahawa masalah utama pengilang kecil dan sederhana (IKS) di negara ini ialah kesukaran mendapatkan bahan mentah yang berkualiti, secara kredit dan pada paras harga yang rendah. Ini adalah kerana kedudukan sebahagian besar syarikat-syarikat IKS masih diragukan oleh pengilang atau pengedar bahan mentah berkenaan disebabkan oleh saiz syarikat-syarikat IKS itu sendiri terutamanya dari segi modal,

pasarannya, keupayaan pengeluaran dan pengurusan, penggunaan bahan mentah yang kecil serta rekod perniagaan yang baik. Oleh yang demikian, syarat-syarat pembelian secara tunai atau "Letter of Credit at sight", dengan izin, dan paras jualan yang lebih tinggi dikenakan oleh kebanyakan pengedar bahan mentah. Tambahan pula sudah menjadi amalan perniagaan di kalangan sebahagian besar pengusaha sektor pengilangan untuk melantik agen-agen pengedar tunggal atau pemegang franchise sama ada berasaskan negara, wilayah atau negeri yang dirujuk sebagai amalan monopoli.

Selain dari itu, IKS juga menghadapi beberapa masalah yang lain iaitu kesukaran mendapatkan pasaran tempatan dan eksport, teknologi yang lama, keupayaan pengeluaran yang agak terhad dan sukar untuk memenuhi permintaan pelanggan dan pengedar dari segi kuantiti dan kualiti barangan serta sering mengalami masalah lewat membekal dan gagal membekal. Barangan IKS tidak berdaya saing dari segi kualiti dan harga sekiranya dibandingkan dengan barangan keluaran syarikat-syarikat besar. Sebahagian besar dari mereka juga tidak mempunyai sistem pengurusan yang "cost-effective", dengan izin. Saiz modal dan aset yang kecil serta rekod perniagaan yang kurang kemas menyukarkan mereka mendapat kemudahan pinjaman dan kredit dari institusi kewangan.

- (b) Menyedari hakikat ini, Kerajaan menerusi Kementerian Perdagangan Antarabangsa dan Industri dan lain-lain agensi telah mengadakan berbagai program

dalam usaha membantu pengusaha-pengusaha IKS bagi mengatasi masalah-masalah yang dihadapi seperti yang telah dinyatakan termasuklah masalah bekalan bahan mentah. Di antara program-program yang telah dilaksanakan ialah:

- (i) Program Pemasaran Bersepadu Konsep Payung;
- (ii) Vendor Development;
- (iii) Skim Komponen Proton;
- (iv) Subcontracting Exchange;
- (v) program pembangunan tapak-tapak perindustrian IKS;
- (vi) Tabung Bantuan Teknikal Perindustrian kecil dan Seerhana (ITAF);
- (vii) Pusat Maklumat Teknologi Perindustrian (MITIC);

#### **KERETAPI/LANDASAN— PEMBERIAN KONTRAK**

**15. Tuan Haji Mohd. Zihin bin Haji Mohd. Hassan** minta Menteri Pengangkutan kenapakah kontrak bagi keretapi baru dibeli dari Korea dan kontrak landasan diberi kepada India. Apakah ciri-ciri istimewa kontrak landasan diberi kepada India sehingga berlakunya kegelinciran di Kuang baru-baru ini.

**Menteri Pengangkutan (Dato' Seri Dr Ling Liong Sik):** Kontrak bagi koc keretapi baru diberikan kepada syarikat dari Korea kerana ianya merupakan tawaran yang terbaik dari segi harga terendah serta memenuhi spesifikasi teknikal.

Kontrak bagi pembaharuan landasan dari Slim River ke Seremban dan Paloh ke Singapura telah diberikan kepada Indian Railway Contruction (IRCON)

dari India pada tahun 1988. Ini merupakan runding terus atas dasar Kerajaan Persekutuan bagi mengimbangkan perdagangan timbal-balas di antara negara India dan negara Malaysia.

Kes kegelinciran di Kuang yang lalu masih dalam peringkat penyiasatan dari semua aspek. Oleh itu, pihak yang bertanggungjawab atau sebab-sebab berlakunya kegelinciran tersebut belum lagi dikenalpasti. Oleh yang demikian, adalah tidak wajar dikaitkan kegelinciran tersebut setakat ini dengan pihak kontraktor landasan.

#### **DEPOT TIRAM KIMIA SHELL PELABUHAN KELANG— KAWALAN KESELAMATAN**

**16. Tuan Ahmad bin Nor** minta Menteri Sumber Manusia menyatakan:

- (a) adakah Kementerian mengambil sebarang tindakan awal untuk mengawal keselamatan industri di Depot Shell, Pelabuhan Kelang sebelum terjadi kebakaran besar yang baru lalu; dan
- (b) apakah tindakan Kementerian selanjutnya bagi memastikan tidak wujud lagi sebarang kelemahan dari segi kawalan dan penguatkuasaan ke atas semua jenis tempat-tempat kerja untuk menjamin keselamatan industri yang sempurna.

**Timbalan Menteri Sumber Manusia (Dato' M. Mahalingam):**

- (a) Depot Tiram Kimia Shell di Pelabuhan Kelang adalah sebuah installasi yang telah didaftarkan sebagai sebuah kilang oleh Jabatan Kilang dan Jentera Selangor, Wilayah Persekutuan sejak tahun 1962. Di bawah Akta Kilang dan Jentera 1967 yang dikuatkuasakan, pihak Jabatan telah menjalankan pemeriksaan

ke atas kilang, jentera-jentera serta pemasangan yang terdapat di kilang tersebut dari masa ke semasa. Pemeriksaan terakhir ke atas jentera di kilang tersebut pada 8hb Jun 1992 dan jentera tersebut adalah didapati di dalam keadaan memuaskan. Sebelum ini, satu pemeriksaan khas telah diadakan pada 9hb Julai, 1989 bagi mengambil butir-butir mutakhir bahan-bahan kimia yang disimpan di situ bagi kajian aktiviti 'major accident hazards.'

Pihak Jabatan juga ada menguatkuasakan sebahagian dari Akta Keselamatan Petroleum 1984 mengenai pengangkutan petroleum melalui talian paip. Untuk maksud ini, satu pemeriksaan ke atas talian paip serta tangki penyimpan bahan kimia serta petroleum telah dijalankan pada 23hb Februari, 1988 dan didapati memuaskan.

(b) Untuk mengatasi keselamatan dari segi kawalan dan penguatkuasaan ke atas semua jenis tempat kerja, pihak jabatan, kilang dan jentera di bawah Kementerian Sumber Manusia akan mengambil langkah-langkah seperti berikut:

- (i) menguatkuasakan peraturan khusus bagi mengawal bahaya atau bencana industri besar seperti yang terjadi di Tiram Shell di Pelabuhan Kelang.
- (ii) menjalankan perkhidmatan khas ke atas instalasi serta kilang-kilang yang dianggap merbahaya dengan kadar yang segera oleh pemeriksa-pemeriksa kanan jabatan.

(iii) menguatkuasakan Akta Keselamatan dan Kesihatan Pekerja yang baru yang akan dapat mengatasi kelemahan-kelemahan yang terdapat di dalam Akta Kilang dan Jentera sekarang, terutamanya dari aspek pengurusan keselamatan.

#### **NAZIR SEKOLAH PERSEKUTUAN— KELAYAKAN**

17. Dr T. Marimuthu minta Menteri Pendidikan menyatakan apakah syarat minimum yang dikenakan bagi pegawai-pegawai perkhidmatan pendidikan yang dipilih untuk menjawat jawatan sama ada sebagai Jemaah Nazir Sekolah Persekutuan atau pensyarah di Maktab Perguruan. Sejauhmanakah syarat ini dapat memastikan tahap kemahiran profesional mereka dalam bidang yang berkaitan. Apakah latihan petugas dan lanjutan yang diberi kepada mereka untuk membolehkan mereka bertugas secara berkesan.

**Timbalan Menteri Pendidikan (Dr Leo Michael Toyad):** Untuk makluman Ahli Yang Berhormat, bagi menjawat jawatan sebagai Nazir Sekolah Persekutuan, seseorang pegawai itu mestilah memenuhi syarat-syarat berikut:

- (i) sekurang-kurangnya mempunyai pengalaman selama lima tahun sebagai guru;
- (ii) arif terhadap bidang mata pelajaran yang dipohon;
- (iii) mempunyai rekod perkhidmatan yang bersih dan baik;
- (iv) permohonannya disokong oleh Pengetua atau Guru Besar.

Latihan petugas yang disediakan untuk Nazir-nazir baru yang dipilih adalah:

- (i) bimbingan memeriksa sekolah melalui sistem mentor, iaitu Nazir baru yang dipilih dipandu dan dibimbing oleh Nazir-nazir kanan.
- (ii) dua jenis kursus/pendedahan akan diberi kepada nazir-nazir yang baru dipilih ini, iaitu kursus induksi/kursus orientasi sebagai pengenalan kepada sistem pendidikan dan keperluan adanya Jemaah Nazir Sekolah Persekutuan. Kursus kedua diberi bagi memastikan setiap Nazir itu pakar dalam bidang mata pelajaran pengkhususan masing-masing.
- (iii) kursus dalaman diadakan dari semasa ke semasa bagi menentukan setiap Nazir itu sentiasa kemaskini dengan perkembangan pendidikan dan tugas-tugas mereka.

Bagi jawatan pensyarah PPP Siswazah Tingkatan Biasa di maktab perguruan pula, calon mestilah mempunyai:

- (i) pengalaman mengajar sebagai guru, PPP Siswazah Tingkatan Biasa sekurang-kurangnya 5 tahun dan telah disahkan dalam jawatan;
- (ii) kelayakan ikhtisas sekurang-kurangnya di peringkat Diploma Pendidikan daripada universiti yang dikhtiraf atau yang setaraf dengannya;
- (iii) kelulusan akademik yang sesuai dengan mata pelajaran yang diajar di maktab;
- (iv) kemahiran dan kursus khas yang dipunyai oleh pensyarah dengan mata pelajaran yang diajar di maktab;
- (v) prestasi yang baik di sekolah sebelum ditempatkan di maktab;

- (vi) mempunyai minat yang tinggi dalam bidang perguruan.

Latihan yang disediakan untuk pensyarah-pensyarah baru yang dipilih adalah:

- (i) Kursus Orientasi Pensyarah baru.
- (ii) Kursus Dalaman (in-house) di peringkat maktab.
- (iii) Kursus Dalam Perkhidmatan anjuran Bahagian Pendidikan Guru, Kementerian Pendidikan.
- (iv) peningkatan dari segi akademik ke kursus lanjutan di peringkat Sarjana dan Doktor Falsafah.

#### **LEBUHRAYA TASEK AMPANG-ULU LANGAT— PEMBUANGAN SAMPAH**

**18. Dr Kua Kia Soong** minta Menteri Perumahan dan Kerajaan Tempatan menyatakan:

- (a) sama ada kebenaran telah diberikan kepada pembuangan sampah sarap di sepanjang Lebuhraya Tasek Ampang-Ulu Langat;
- (b) siapa yang bertanggungjawab terhadap pembuangan sampah-sarap ini;
- (c) bilakah pesalah dan pihak berkuasa tempatan akan dihukum;
- (d) bilakah sampah-sarap berkenaan akan dibersihkan.

**Timbalan Menteri Perumahan dan Kerajaan Tempatan (Tuan Haji Daud bin Dato' Haji Taha):**

- (a) Semua Pihakberkuasa Tempatan tidak pernah memberi sebarang kebenaran untuk mana-mana pihak melupuskan sampah di tepi-tepi jalan, apatah lagi jalan

yang dinyatakan itu adalah merupakan jalan protokol. Untuk makluman Ahli Yang Berhormat, Lebuhraya Tasek Ampang masih belum dibuka untuk kegunaan orang awam dan pihak Jabatan Kerja Raya hanya memberi kelulusan kepada Majlis Daerah Ulu Langat untuk mereka melupuskan sampah di tempat yang telah dikhaskan oleh Kerajaan Negeri dan letaknya berhampiran dengan jalan tersebut.

- (b) Pembuangan sampah sarap di sepanjang Lebuhraya Tasek Ampang-Ulu Langat adalah perbuatan pemungut-pemungut sampah persendirian dan juga penduduk-penduduk kawasan persekitaran Lebuhraya tersebut. Bagi pemungut-pemungut sampah Pihakberkuasa Tempatan terutama sekali Majlis Daerah Hulu Langat, kesemua sampah sarap yang dipungut dilupuskan di tapak pelupusan sampah Majlis.
- (c) Berkaitan dengan hukuman terhadap pesalah-pesalah yang dimaksudkan oleh Yang Berhormat, bidangkuasa untuk mengenakan hukuman adalah terletak di bawah kuasa Pihakberkuasa Tempatan yang mentadbir kawasan-kawasan tersebut seperti yang terkandung dalam Seksyen 47, Akta Jalan, Parit dan Bangunan 1974. Walau bagaimanapun, adalah sukar untuk Pihakberkuasa Tempatan mengenalpasti pesalah-pesalah berkenaan kerana Pihakberkuasa Tempatan berkaitan tidak mempunyai kakitangan untuk mengawasi perbuatan-perbuatan yang kurang sihat itu setiap masa.
- (d) Sampah sarap yang dilupuskan di sepanjang jalan berkenaan sedang dibersihkan oleh Majlis

Daerah Ulu Langat dan pembersihan ini akan dilakukan dari masa ke semasa sehinggalah jalan ini dibuka kepada orang ramai di mana semua kerja-kerja kebersihan dan penyenggaraannya akan diurus oleh Jabatan Kerja Raya.

*(Soalan No. 19 oleh Y.B. Dato' Haji Mohamad bin Abdullah—Sila lihat jawapan kepada Soalan No. 5)*

#### UBAT TERNAKAN—KAWALAN

20. Tuan Lim Hock Seng minta Menteri Pertanian menyatakan sama ada Kerajaan untuk mengawal penggunaan ubat-ubat di bidang ternakan:

- (a) sejauhmanakah “Beta-agonist” didapati diguna;
- (b) sejauhmanakah “Antibiotic” didapati diguna; dan
- (c) lain-lain ubat yang boleh membawa kesan buruk kepada pengguna daging.

**Timbalan Menteri Pertanian (Dato' S. Subramaniam):**

- (a) Beta-agonist telah digunakan secara meluas oleh kebanyakan penternak-penternak khinzir terutamanya di kalangan mereka yang mengeksport.

Jabatan Perkhidmatan Haiwan (JPH) telah mengeluarkan arahan secara pekeliling perkhidmatan dan menerusi perjumpaan dan perbincangan dengan para penternak khinzir, persatuan-persatuan penternak dan pihak pengilang makanan ternakan, mengharamkan penggunaannya secara langsung atau tidak langsung.

Di samping itu, langkah-langkah susulan yang telah dan akan terus dilaksanakan adalah:

- (i) menjalankan tinjauan ke ladang-ladang untuk memastikan tiada penyalahgunaan Beta-agonist.
  - (ii) tidak membenarkan mana-mana ladang yang melanggar arahan untuk tujuan eksport;
  - (iii) tidak membenarkan penyembelihan ternakan dan penjualan daging dari ladang-ladang yang terlibat.
- (b) Penggunaan antibiotik dalam industri ternakan adalah perlu bagi tujuan rawatan dan pencegahan penyakit. Antibiotik ini digunakan secara campuran dalam makanan ternakan terutama ayam dan khinzir, pada kadar yang lebih rendah, ataupun melalui suntikan atau air. Arahan pekeliling dan perbincangan telah juga diadakan untuk kawalan penggunaan antibiotik.
- JPH juga menjalankan pemeriksaan dan pengambilan contoh-contoh daging atau organ ayam-ayam yang telah diproses di loji-loji pemerrosan ayam seluruh negara, tidak terlibat pasar basah untuk mengesah residu antibiotik. Sebagaimana-pun, sehingga kini adalah didapati tahap residu antibiotik pada paras yang tidak membimbangkan dan tidak mengandungi residu yang melebihi had ditetapkan.
- (c) Selain Beta-agonist dan beberapa jenis antibiotik jenis-jenis ubat ternakan yang boleh membawa kesan buruk kepada pengguna daging ternakan ialah:
- (i) Nitrofurazone;
  - (ii) Furazolidone.

## PEKERJA LADANG—KAJIAN KOMPREHENSIF TERHADAP KEKURANGAN

21. Tuan Ruhanie bin Haji Ahmad minta Menteri Sumber Manusia menyatakan:

- (a) pernahkah satu kajian komprehensif dijalankan untuk memastikan bahawa kekurangan tenaga kerja dan buruh di ladang-ladang dan kilang-kilang sekarang adalah satu fenomena yang 'real' atau benar;
- (b) berapa ramaikah buruh asing yang telah didaftarkan sehingga akhir Jun 1992 dan beri pecahannya mengikut negara asalnya; dan
- (c) adakah pihak Kementerian pernah menerima aduan tentang kes-kes di mana sesetengah buruh wanita asing telah diperkosa dan dizalimi oleh pihak majikannya, dan mereka yang Islam pula tidak diberi makanan yang halal tetapi sebaliknya dipaksa memakan makanan haram.

Dato' M. Mahalingam:

- (a) Adalah sukar bagi Kerajaan untuk menjalankan satu kajian yang komprehensif bagi memastikan kekurangan tenaga kerja di ladang-ladang memandangkan bilangan dan kedudukan tenaga kerja bagi sektor ini sentiasa berubah-ubah. Walau bagaimanapun, berasaskan permintaan-permintaan tenaga kerja dari sektor ini, serta sektor ini merupakan sektor yang kurang diminati oleh penduduk tempatan untuk bekerja, maka Kerajaan sedia mengetahui sektor ladang mengalami

kekurangan tenaga kerja terutama sekali bagi ladang-ladang yang jauh terpencil dan tidak mempunyai kemudahan asas. Bagi tidak menjejaskan pengeluaran sektor ini, Kerajaan telah membenarkan pengambilan pekerja asing.

Kementerian Sumber Manusia pada awal tahun ini ada menjalankan kajian ke atas sektor perkilangan untuk mengetahui kekurangan tenaga kerja di sektor tersebut. Hasil kajian ke atas 1,420 syarikat menunjukkan sebanyak 714 syarikat di sektor perkilangan memerlukan seramai 18,034 pekerja dari kumpulan pekerjaan pengeluaran dan kumpulan profesional dan teknikal. Dari kajian ini juga adalah didapati negeri-negeri yang menghadapi masalah kekurangan tenaga kerja ialah negeri Selangor, Sabah, Wilayah Persekutuan Kuala Lumpur, Johor dan Pulau Pinang.

Penemuan ini menunjukkan masalah kekurangan pekerja yang dihadapi oleh majikan adalah ketara sekali di negeri-negeri yang mempunyai zon kawasan perindustrian yang besar dan telah wujud beberapa tahun. Bagi sektor perkilangan, Kerajaan telah pun membenarkan sektor perkilangan dibuka secara selektif kepada pekerja asing termasuk di peringkat mahir, separuh mahir, teknikal dan profesional mengikut merit sesuatu kes dan tertakluk kepada syarat-syarat yang ditetapkan dari semasa ke semasa.

(b) mengikut rekod Jabatan Imigresen bilangan pekerja asing tanpa izin (PATI) yang telah

didaftarkan sehingga 30hb Jun, 1992 mengikut negara asal mereka adalah seramai 353,739 orang seperti berikut:

<i>Negara</i>	<i>Jumlah (Orang)</i>
Indonesia	293,187
Bangladesh	17,998
Thai	22,315
Myanmar	9,236
India	7,926
Pakistan	1,337
<b>Jumlah:</b>	<b>353,739</b>

(c) seperti disahkan oleh Kementerian Dalam Negeri, setakat ini tiada aduan diterima daripada pembantu rumah asing mengenai penganiayaan yang telah dibuat oleh majikan terhadap mereka.

#### **PELANGGARAN SYARAT TANAH—LAPORAN KETUA AUDIT NEGARA**

22. Tuan Haji Nik Abdullah bin Nik Arshad minta Perdana Menteri menyatakan bahawa laporan Ketua Audit Negara menyebutkan adanya permohonan tanah daripada kediaman kepada bangunan perdagangan yang dibuat oleh sebuah syarikat dalam tahun 1987 dan diluluskan oleh JKTWP dalam bulan Februari 1989 tetapi sebuah pasar raya telah pun didirikan di atas tanah itu sejak akhir 1987 lagi; dan sebuah syarikat minyak telah mohon menukar syarat dari tanah pertanian kepada bangunan perdagangan dalam April 1988 dan diluluskan dalam bulan September 1988 tetapi dalam bulan

Ogos 1988 sebuah stesyen minyak telah pun hampir siap dibina walaupun tukar syarat belum diluluskan:

- (a) bagaimana DBKL boleh membiarkan pelanggaran syarat penggunaan tanah berlaku begitu mudah dan bagaimana tindakan tidak diambil terhadap pihak yang melanggar syarat itu; dan
- (b) apakah tindakan yang diambil terhadap pentadbiran DBKL yang tidak mengambil apa-apa tindakan terhadap kedua-dua kes di atas.

**Timbalan Menteri di Jabatan Perdana Menteri (Dato' Drs Suleiman bin Mohamed):** Saya akan menjawab pecahan soalan (a) dan (b) secara serentak kerana kedua-dua soalan ini adalah berkaitan.

Tidak terdapat sebarang pelanggaran syarat tanah di atas tapak yang mana sebuah pasar raya telah didirikan kerana tanah-tanah yang terlibat adalah merupakan tanah-tanah yang telah dikeluarkan hakmilik sebelum berkuatkuasanya Kanun Tanah Negara 1965 di mana mengikut Seksyen 53(3) Kanun Tanah Negara tanah-tanah yang sedemikian boleh digunakan sama ada untuk bangunan kediaman atau perdagangan. Oleh itu, tidak timbul soal untuk mengambil tindakan kepada mana-mana pihak.

Bagi pertanyaan yang berkaitan dengan pertukaran syarat daripada pertanian kepada tapak stesyen pam minyak pula, Jabatan ini menyedari bahawa pembinaan bangunan stesyen pam minyak tersebut telah didirikan lebih awal sebelum kelulusan tukar syarat diperolehi. Walau bagaimanapun, pemohon telah diberi notis supaya pelanggaran syarat tanah tersebut diperbetulkan dan telah dipatuhi di mana permohonan kepada tukar syarat tanah telah diluluskan dan pemohon telah menjelaskan bayaran premium tambahan pada 15hb Januari, 1990.

### SEKOLAH BERASRAMA— PEMBEKALAN MAKANAN MENTAH

**23. Tuan Haji Wan Mohd. Jamil bin Wan Mahmood** minta Menteri Pendidikan menyatakan:

- (a) sepanjang tahun 1988, 1989 dan 1990 sebahagian besar dari pembekal makanan mentah kepada sekolah-sekolah berasrama tidak memenuhi spesifikasi yang ditentukan oleh Kementerian. Apakah masalah yang dihadapi oleh Kementerian hingga masalah ini tidak terkawal dan membiarkan keadaan demikian begitu lama;
- (b) adakah masalah ini tidak dibawa kepada pengetahuan PIBG dan jika tidak, mengapa. Dan mengapa PIBG tidak mengambil perhatian dalam perkara ini; dan
- (c) makanan yang sempurna mempunyai hubungan kesihatan dan kecerdasan otak dalam menerima pelajaran. Sejauh manakah hal ini diperhatikan oleh Kementerian dan sejauh manakah pula mutu pelajaran murid-murid telah terjejas dengan masalah ini.

**Dato' Amar Dr Haji Sulaiman bin Haji Daud:** Untuk makluman Ahli Yang Berhormat,

- (a) Hanya terdapat sebahagian kecil sahaja kontraktor yang membekalkan makanan mentah yang kurang menepati spesifikasi yang telah ditetapkan di antara tahun 1988-1990. Hanya terdapat 15 daripada 111 buah sekolah, 13.6% yang terlibat dalam kes ini. Tindakan sewajarnya telah pun diambil untuk memperbaiki keadaan ini termasuk pembatalan kontrak jika perlu.

- (b) semua perkara mengenai murid biasanya dibawa ke pengetahuan PIBG.
- (c) Kementerian Pendidikan memang sentiasa mengambil berat tentang makanan dan pemakanan murid-murid sekolah sama ada yang belajar di sekolah-sekolah berasrama ataupun tidak.

Di antara usaha yang dilakukan termasuk:

- (i) menyediakan menu-menu bagi penghuni asrama sekolah dengan kerjasama pegawai zat makanan dari Kementerian Kesihatan;
- (ii) mengadakan Buku Garis Panduan Kantin Sekolah dan Buku Panduan Asrama Sekolah bagi memastikan makanan yang dijual di kantin sekolah dan yang disediakan di asrama sekolah adalah berkhasiat dan seimbang;
- (iii) mengelolakan kursus-kursus khas untuk pengetua/guru besar, tukang masak, warden asrama, guru agama, pembekal makanan dan pengusaha kantin sekolah;
- (iv) mengusahakan pendidikan pemakanan secara formal dan tidak formal kepada semua pihak yang termasuk di atas.

Sehingga kini tidak ada data yang jelas bagi menunjukkan murid-murid terjejas pelajaran mereka daripada makanan di sekolah.

### **LELAKI BERAMPUT PANJANG— MELUASKAN LARANGAN**

24. Tuan Haji Buniyamin bin Yaakob minta Menteri Penerangan menyatakan adakah Kerajaan bercadang supaya arahan larangan kepada artis-artis lelaki berambut panjang membuat persembahan di RTM diperluaskan kepada semua sektor pekerjaan dalam negara ini. Jika ya, bilakah ia akan dikuatkuasakan. Jika tidak, mengapa larangan itu dikhususkan kepada artis sahaja.

**Timbalan Menteri Penerangan (Tuan Railey bin Haji Jaffrey):** Kerajaan tidak bercadang untuk meluaskan larangan lelaki berambut panjang kepada semua sektor pekerjaan di negara ini. Dalam konteks itu, Kerajaan tidak ingin campur tangan dalam dasar-dasar mendisiplinkan pekerja di sektor swasta. Adalah terpulang kepada kreativiti setiap sektor swasta untuk meningkatkan daya produktiviti masing-masing dengan cara yang teratur supaya budaya kerja tidak melahirkan sebarang kesan yang buruk yang akan menjejaskan kebudayaan yang dianuti dalam negara ini.

### **LAWATAN MENTERI LUAR NEGERI KE REPUBLIK ISLAM ASIA TENGAH—HASIL**

25. Dr Sanusi bin Daing Mariok minta Menteri Luar Negeri menyatakan hasil lawatannya ke republik-republik Islam yang baru merdeka di Asia Tengah. Apakah bentuk perjanjian dan kerjasama yang telah dijalinkan.

**Timbalan Menteri Luar Negeri (Dato' Dr Abdullah Fadzil bin Che Wan):** Lawatan Yang Berhormat Menteri Luar Negeri ke Republik-republik Islam di Asia Tengah, iaitu Kazakhstan, Kyrgyzstan, Uzbekistan dan Turkmenistan telah berjaya

membuka jalan bagi mengeratkan hubungan dua hala yang lebih erat dan bermanfaat bersama:

- (i) Di Kazakhstan, Yang Berhormat Menteri Luar Negeri telah mengadakan perbincangan dengan Perdana Menteri, Timbalan Presiden, Timbalan Menteri Luar Satu dan Timbalan Menteri Perhubungan Ekonomi Luar Negeri Satu. Perbincangan dilakukan meliputi soal perjanjian yang ditandatangani oleh Malaysia dengan USSR yang turut melibatkan Kazakhstan, dan bersetuju ianya bolehlah diubahsuai mengikut kehendak semasa dan ditandatangani pada suatu masa yang sesuai kelak. Kazakhstan memohon diadakan kerjasama di bidang pertanian dan berhasrat menghadiri kursus di institusi-institusi Malaysia di bidang ekonomi kewangan dan industri kecil dan sederhana.
- (ii) Di Kyrgyzstan, pertemuan diadakan dengan Presiden, Pengerusi Jawatankuasa Perhubungan Luar Negeri, Timbalan Pengerusi Kementerian Ekonomi, Menteri Luar Negeri dan Perdana Menteri Kyrgyzstan. Perbincangan yang dilakukan meliputi kerjasama di bidang-bidang industri mikrochip, pembuatan kristal, industri elektronik, pembangunan industri bijih timah, carigali minyak, latihan di bawah program MTCP di bidang pentadbiran, kewangan diplomasi dan lain-lain bidang yang berkenaan.
- (iii) Di Uzbekistan, pertemuan diadakan dengan Presiden Islam Karimov, Menteri Luar Negeri, Timbalan Menteri Perhubungan Ekonomi Satu Uzbekistan. Perbincangan diadakan meliputi latihan di bawah program MTCP,

pengambilan pelajar-pelajar oleh Universiti Islam Antarabangsa, latihan kepada guru-guru oleh MARA, usahasama carigali minyak dan gas, pembukaan bank komersil, pembangunan industri pembuatan dari kapas serta perdagangan dua hala. Pihak Uzbekistan turut memaklumkan cadangan mereka untuk membuka pejabat di Kuala Lumpur tidak lama lagi.

- (iv) Di Turkmenistan, pertemuan diadakan dengan Presiden, Menteri Luar Negeri, Menteri Kesihatan, Pengerusi Jawatankuasa untuk Perhubungan Ekonomi dan Menteri Kebudayaan Turkmenistan. Perbincangan meliputi kerjasama dengan "Turkmen Oil Authority" di bidang carigali minyak dan gas, pemasaran minyak kelapa sawit, program penswastaaan, penjagaan kesihatan dan kebudayaan.

Pada keseluruhannya, lawatan oleh Yang Berhormat Menteri Luar Negeri ke Republik-republik Islam Asia Tengah merupakan satu titik permulaan kepada hubungan dan kerjasama dua hala yang akan membawa manfaat kepada kedua-dua pihak. Ia menepati dasar dan objektif hubungan luar negeri yang dipegang oleh Malaysia bagi mengeratkan hubungan dengan negara-negara di rantau tersebut di samping menyediakan peluang-peluang perdagangan yang luas yang boleh diterokai oleh ahli-ahli perniagaan Malaysia

#### SETINGGAN—LANGKAH PENEMPATAN SEMULA

**26. Tuan Tan Kok Wai** minta Perdana Menteri menyatakan:

- (a) berapakah jumlah rumah setinggan dalam Kuala Lumpur dan jumlah penduduknya sehingga 30-6-1992;

menggalakkan usahawannya melabur di Malaysia. Jika sedar, apakah punca kempen tersebut dan apa pula tindakan balas Kementerian.

**Setiausaha Parlimen Kementerian Perdagangan Antarabangsa dan Industri (Tuan S.S. Subramaniam):** Soalan yang dikemukakan oleh Yang Berhormat ini adalah berkaitan dengan soalan yang telah dijawab oleh saya pada 22-7-92 ketika dikemukakan oleh Yang Berhormat Puan Lim Lay Hoon dari kawasan Padang Serai. Oleh yang demikian, saya tiada apa-apa maklumat tambahan yang hendak disampaikan.

#### **CUKAI PENDAPATAN—KADAR PELEPASAN**

**37. Tuan Wee Choo Keong** minta Menteri Kewangan menyatakan:

- (a) sama ada beliau sedar bahawa potongan-potongan yang dibenarkan di bawah Akta Cukai Pendapatan, 1967, adalah ketinggalan zaman dan tidak selaras dengan kehidupan dalam tahun sembilan puluhan;
- (b) sama ada beliau bertujuan untuk menaikkan elaun-elaun dan/atau potongan yang dibenarkan. Jika tidak, sila nyatakan sebab-sebabnya kenapa tidak; dan
- (c) oleh kerana Perdana Menteri telah menggalakkan rakyat untuk mempunyai lebih ramai anak untuk mencapai sasaran populasinya iaitu 70 juta, oleh yang demikian, Menteri Kewangan sepatutnya menambahkan elaun sehingga lima orang anak dalam satu keluarga. Kenapa ini tidak dilakukan oleh Menteri Kewangan. Sila nyatakan sebab-sebabnya.

**Dato' Loke Yuen Yow:** Sukacita dimaklumkan bahawa pelepasan-pelepasan cukai yang diberi kepada pembayar cukai bukan bertujuan untuk

menampung perbelanjaan-perbelanjaan yang dilakukan olehnya. Pelepasan-pelepasan tersebut adalah bertujuan semata-mata untuk meringankan bebanan cukai bagi individu-individu yang berkenaan. Untuk makluman, struktur cukai pendapatan individu termasuk pelepasan-pelepasan tertentu telah disemak semula melalui Belanjawan 1991 dan 1992. Dalam semakan semula tersebut, kadar-kadar cukai pendapatan telah dikurangkan seperti berikut:

- (i) kadar cukai terendah dikurangkan dari 5% kepada 4%;
- (ii) kadar cukai tertinggi dikurangkan dari 40% kepada 35%;
- (iii) lain-lain kadar cukai dikurangkan di antara 1% hingga 3%; dan
- (iv) cukai keuntungan berlebihan sebanyak 5% bagi pendapatan yang dikenakan cukai melebihi \$3000,000 di hapuskan.

Bagi pelepasan cukai pula, pelepasan cukai untuk isteri dan anak-anak dipinda seperti berikut:

	<i>Kadar dahulu</i> \$	<i>Kadar baru</i> \$
Pelepasan untuk isteri	2,000	3,000
Pelepasan untuk anak-anak—		
Anak pertama	650	800
Anak kedua	750	800
Anak ketiga	800	800
Anak keempat	800	800
Anak kelima	800	800

Di samping itu, pelepasan cukai untuk anak cacat telah dinaikkan dari \$400 kepada \$1,600 untuk anak cacat tanpa mengira umur anak berkenaan. Juga pelepasan cukai tidak lebih dari \$1,000 diberi untuk belanja rawatan perubatan bagi ibu bapa. Tambahan juga, pelepasan sehingga \$3,000 juga diberi kepada individu-individu yang membeli peralatan bagi diri mereka, isteri mereka, ibu bapa mereka atau anak-anak mereka yang cacat.

Ingin ditegaskan di sini bahawa kajian semula tahun 1991 dan 1992 ini telah mengambilkira kos saraan hidup yang kian meningkat serta kedudukan kewangan negara. Sukacita dimaklumkan juga bahawa struktur cukai pendapatan adalah sentiasa di dalam perhatian Kementerian Kewangan dan akan dikaji dari masa ke semasa mengikut keperluan.

Mengenai pelepasan untuk anak, sukacita dimaklumkan bahawa pelepasan yang kini diberikan adalah sebenarnya untuk lima orang anak.

#### PELAJAR MALAYSIA MURTAD—TINDAKAN

**38. Tuan Haji Abdul Hamid bin Abdul Rahman** minta Menteri Pendidikan menyatakan:

- (a) jumlah pelajar Malaysia di seberang laut yang telah didapati murtad;
- (b) apakah sebab-sebab atau punca-punca berlakunya gejala ini;
- (c) apakah tindakan Kerajaan terhadap mereka ini; dan
- (d) apakah langkah-langkah Kerajaan seterusnya bagi mengawal dan mencegah gejala tersebut.

**Timbalan Menteri Pendidikan (Dr Leo Michael Toyad):** Untuk makluman Ahli Yang Berhormat, jawapan bagi (a) (b) dan (c),

Melalui Jabatan Penuntut Malaysia di luar negeri, Kementerian Pendidikan telah membuat siasatan yang rapi berkaitan dengan laporan mengenai pelajar-pelajar wanita Melayu yang menukar agama. Sehingga masa ini, hasil daripada siasatan itu didapati tidak ada maklumat yang mengesahkan adanya mana-mana pelajar Melayu Malaysia yang menukar Agama Islam kepada agama-agama lain.

- (d) Buat masa ini, Kementerian Pendidikan tidak membuat sebarang pindaan perakuan berkaitan penghantaran pelajar ke luar negeri, kerana peruntukan yang sedia ada telah menetapkan syarat-syarat yang ketat. Antaranya pelajar-pelajar tajaan Kerajaan tidak dibenarkan berkahwin melainkan mendapat kebenaran Kerajaan terlebih dahulu semasa di dalam pengajian sama ada di dalam atau luar negeri. Syarat-syarat tersebut telah dimasukkan ke dalam Surat Perjanjian Biasiswa pelajar berkenaan. Walau bagaimanapun, untuk mengelakkan perkara ini berlaku, Kementerian Pendidikan bercadang untuk mempertingkatkan kursus-kursus bimbingan agama dan menyediakan buku-buku panduan agama bagi pelajar-pelajar yang akan bertolak ke luar negeri dan juga bagi yang sedia berada di luar negeri. Program orientasi bagi pelajar-pelajar yang akan ke luar negeri juga akan dipertingkatkan.

#### KWSP—PEMBAYARAN BALIK

**39. Tuan Nasruddin bin Haji Alang Saidin** minta Menteri Kewangan menyatakan mengapa Kerajaan membayar balik hanya separuh sahaja dari jumlah caruman KWSP kepada pencarum-pencarum apabila mereka bersara atau mencapai umur 55 tahun.

**Dato' Loke Yuen Yow:** Untuk makluman Ahli Yang Berhormat, caruman majikan kepada Kumpulan Wang Simpanan dan penerimaan bayaran pencen adalah merupakan faedah-faedah persaraan yang boleh diberi oleh majikan kepada pekerja-pekerjanya.

Oleh yang demikian, selaras dengan peruntukan Peraturan 10(1), Peraturan-peraturan Pencen 1980, apabila

seseorang pegawai Kerajaan berpencen bersara, apa-apa caruman yang dibuat oleh Kerajaan sepanjang tempoh perkhidmatan yang dimasukkan ke dalam Kumpulanwang Simpanan beserta dengan dividen yang terakru akan dikembalikan balik kepada Kerajaan. Peruntukan ini hanyalah meliputi pegawai-pegawai Kerajaan yang bertaraf berpencen kerana pegawai-pegawai Kerajaan ini akan menerima faedah persaraan dalam bentuk pembayaran pencen.

Untuk makluman Ahli Yang Berhormat, pencarum-pencarum KWSP dari sektor swasta akan menerima keseluruhan carumannya apabila mereka bersara atau mencapai umur 55 tahun.

#### PERKESO—JUMLAH PAMPASAN

40. Tuan Wong Sing Nang minta Menteri Sumber Manusia menyatakan:

- (a) bilangan pekerja mendapat manfaat daripada Skim SOCSO dan jumlah pampasan yang telah dibayar kepada mereka pada tahun 1991 dan 1992;
- (b) sama ada Kementerian sedar bahawa pejabat SOCSO di Sibul sedang menghadapi kekurangan kakitangan yang ketara. Jika ya, apakah langkah yang akan diambil untuk mengatasi keadaan ini;
- (c) bilangan pekerja yang mendapat manfaat di bawah SOCSO di bahagian Sibul, Sarikei, Kapit di Sarawak dan jumlah pampasan yang dibayar kepada mereka setiap bulan; dan
- (d) sama ada kementerian sedar bahawa banyak syarikat industri gagal mendaftarkan pekerja-pekerja mereka dengan Skim SOCSO. Jika ya, apakah tindakan yang akan diambil terhadap pengusaha syarikat tersebut.

**Dato' M. Mahalingam:**

- (a) Bilangan penerima faedah PERKESO bagi tahun 1991 ialah seramai 129,481 orang. Sehingga bulan Mac 1992 bilangan penerima faedah ialah seramai 132,783 orang. Jumlah pampasan yang dibayar untuk tahun 1991 ialah sebanyak \$114,034,517. Sehingga Mac 1992 jumlah pampasan dibayar ialah sebanyak \$31,903,678.
- (b) PERKESO sedar akan kekurangan kakitangan di pejabat tempatannya di Sibul, dan langkah awal telah diambil untuk melicinkan beban tugas kakitangan di sana dengan menempatkan dua orang kakitangan sambilan. Lembaga PERKESO juga telah meluluskan dua orang pegawai kerani di pejabat berkenaan.
- (c) Bilangan penerima faedah di kawasan Sibul, Sarikei dan Kapit, Sarawak adalah seperti berikut:

	Sibu	Sarikei	Kapit
Sehingga tahun 1991	1,421	95	202
Sehingga Januari 1992	1,431	97	208
Sehingga Februari 1992	1,434	98	210
Sehingga Mac 1992	1,439	98	211

Pampasan-pampasan yang dibayar untuk ketiga-tiga kawasan itu adalah seperti berikut:

Bagi tahun 1991	\$771,781
Untuk bulan Januari 1992	\$89,665
Untuk bulan Februari 1992	\$63,111
Untuk bulan Mac 1992	\$123,852

- (d) Pada bulan Mac 1992 yang lalu, pihak PERKESO telah melancarkan pemeriksaan pintu ke pintu di seluruh Sabah dan

Sarawak untuk menentukan bahawa semua majikan yang layak didaftarkan. Jika didapati bahawa majikan-majikan yang layak itu gagal mendaftarkan perusahaannya, maka mereka itu akan didakwa di bawah Akta Keselamatan Sosial Pekerja 1969.

#### **PROJEK EMPANGAN HIDRO— ELEKTRIK DI SARAWAK**

41. Tuan Wong Sing Nang minta Menteri Sains, Teknologi dan Alam Sekitar menyatakan:

- (a) menurut kenyataan Menteri Tenaga, Telekom dan Pos serta Ketua Menteri Sarawak bahawa Empangan Hidro-Elektrik Murun serta projek-projek Empangan lain di Belagus pasti akan dibina oleh Kerajaan di Kawasan Bakun di Bahagian Tujuh Sarawak. Akan tetapi, pada 11hb Julai 1991, mengikut kenyataan Menteri Sains, Teknologi dan Alam Sekitar, apabila menjawab soalan mulut kepada saya, beliau menegaskan bahawa cadangan pembinaan Empangan Hidro-elektrik Pelagus di Belaga, Sarawak tidak ada dalam rekod Jabatan Alam Sekitar. Menurut kedua-dua kenyataan ini terdapat maklumat bercanggah sama ada projek ini akan diteruskan atau tidak. Apakah alasan Kementerian mengenai perkara ini;
- (b) sekiranya tiada rekod mengenai projek ini di Jabatan Alam Sekitar, maka apakah langkah di bawah undang-undang yang boleh diambil mengenai penyelidikan Penilaian Alam Sekitar (EIA) di kawasan tersebut sebelum projek diteruskan; dan
- (c) maklumat menyatakan bahawa Kementerian Sains, Teknologi dan Alam Sekitar mempunyai

hak untuk membuat keputusan akhir dan muktamad mengenai sesebuah projek yang ada berkaitan dengan alam sekitar. Apakah pandangan Kementerian ini mengenai Projek Hidro-elektrik di Murun.

**Menteri Sains, Teknologi dan Alam Sekitar (Tuan Law Hieng Ding):** Untuk makluman Ahli Yang Berhormat:

- (a) Kenyataan Menteri Sains, Teknologi dan Alam Sekitar pada 11hb Julai, 1991 masih kekal.
- (b) Tanpa merujuk secara khusus kepada projek-projek berkenaan, adalah dimaklumkan bahawa sebarang projek empangan hidro-elektrik yang akan menenggelami kawasan melebihi keluasan 40 hektar dan mempunyai empangan melebihi ketinggian 15 meter, atau mempunyai kolam takungan air melebihi 400 hektar adalah tertakluk kepada Seksyen 34A, Akta Kualiti Alam Sekeliling, 1974 yang menghendaki penggerak projek mengemukakan Laporan Penilaian Kesan Kepada Alam Sekeliling (EIA) untuk pertimbangan kelulusan oleh Jabatan Alam Sekitar.
- (c) Perkara ini tidak berbangkit.

#### **HOSPITAL—KEKURANGAN TENAGA DAN PENGAMBILAN KAKITANGAN ASING**

42. Dr Tan Seng Giaw minta Menteri Kesihatan menyatakan pada 30-6-92 jumlah bilangan kekurangan kakitangan hospital dan klinik Kerajaan termasuk pembantu hospital, jururawat, pegawai perubatan dan pakar perubatan. Berapa jururawat dan doktor telah diambil dari luar negara. Sila sebutkan negara-negara dan doktor telah diambil dari luar negara. Sila sebutkan negara-negara asalnya.

Apakah sebabnya sukar mendapat tenaga-tenaga ini dari seberang laut. Apakah langkah-langkah yang berkesan dilaksanakan untuk menyelesaikan kekurangan tersebut.

**Timbalan Menteri Kesihatan  
(Dato' Mohamed Farid bin Ariffin):**

- (i) Bilangan kekosongan jawatan di hospital dan klinik Kerajaan pada 30-6-1992 adalah seperti berikut:

<i>Jawatan</i>	
(a) Pembantu Hospital	305
(b) Pengajar Pembantu Perubatan	7
(c) Juru X-Ray	32
(d) Pengajar Juru X-Ray	5
(e) Jurupulih Perubatan	71
(f) Pengajar Jurupulih Perubatan	5
(g) Jururawat Desa	346
(h) Penolong Jururawat	859
(i) Jururawat	1,088
(j) Pengajar Bidan/ Jururawat	62
(k) Pegawai Perubatan	1,181
(l) Pakar Perubatan Pelbagai disiplin)	403
Jumlah . .	4,164

- (ii) Belum ada seorang pun Jururawat yang telah diambil dari luar negara untuk berkhidmat di negara ini. Sungguhpun begitu, pengambilan Jururawat dari luar negara sedang diuruskan sekarang.

Bilangan Pegawai Perubatan yang telah diambil bertugas dari negara luar adalah seramai 179 orang. Bilangan mengikut negara asal mereka adalah seperti berikut:

(a) Indonesia	9
(b) Pakistan	5
(c) India	95
(d) Myanmar	53
(e) New Zealand	1

(f) Singapura	5
(g) Sri Lanka	4
(h) Bangladesh	4
(i) Britain	1
(j) Kanada	1
(k) Australia	1

Jumlah: 197

- (iii) Sebab sebenarnya kesukaran mendapatkan tenaga-tenaga ini dari Seberang Laut tidaklah dapat dipastikan, tetapi mereka mungkin tidak berminat bekerja di negara ini. Bagi Pegawai Perubatan dan Pakar Perubatan pula, kesukaran mendapatkan mereka adalah kerana kebanyakan ijazah asas mereka tidak memenuhi syarat untuk diiktiraf oleh Majlis Perubatan Malaysia.
- (iv) Langkah-langkah yang dilaksanakan untuk menyelesaikan kekurangan tenaga ini ialah dengan menambah pengambilan pelatih-pelatih dan tidak menyokong pegawai-pegawai yang ingin bersara secara pilihan sendiri pada umur kurang dari 50 tahun.

Bagi Pegawai Perubatan dan Pakar Perubatan pula, langkah-langkah yang telah diambil adalah dengan menyediakan peluang lebih ramai Pegawai Perubatan melanjutkan latihan kepakaran. Di samping itu, Kementerian juga telah menyediakan peluang kenaikan pangkat yang mencukupi untuk Pegawai Perubatan Pakar (Gred U2 ke atas untuk pelbagai disiplin). Untuk menampung kekurangan ini, pengambilan perkhidmatan Pakar Perubatan luar negeri secara kontrak adalah diteruskan.

### KOLEJ SWASTA—ATURAN DAN PERATURAN

**43. Dr Tan Seng Giaw** minta Menteri Pendidikan menyatakan prosedur yang diperlukan untuk mengadakan sebuah kolej swasta. Berapa sekolah, kolej atau akademi yang mempunyai permit yang sah di negara ini. Bagaimana beliau mengawalseliaan semua akademi ini untuk memastikan segala aktiviti adalah teratur. Apakah kedudukan Kolej TAFE.

**Dr Leo Michael Toyad:** Untuk makluman Ahli Yang Berhormat, penubuhan dan pengendalian sesebuah kolej swasta yang menjalankan kursus-kursus di peringkat pendidikan tinggi hendaklah dibuat kepada Timbalan Pendaftar Besar Sekolah dan Guru atau Pendaftar Negeri di mana Kolej itu hendak ditubuhkan. Ini adalah sejajar dengan Peraturan-peraturan Perlu (Yayasan Pelajaran Tinggi) 1969. Peraturan-peraturan itu menetapkan penubuhan dan pengendalian itu (termasuk mempromosi kolej itu) hanya boleh dilakukan setelah mendapat kelulusan bertulis daripada Menteri Pendidikan. Kolej itu juga diwajibkan berdaftar dengan Pendaftar Sekolah-sekolah Negeri di mana kolej itu ditubuhkan.

Bilangan sekolah dan institusi pendidikan swasta yang telah diberi kelulusan dan telah didaftarkan adalah:

Pos-SPM (Pendidikan Tinggi)	156 buah
Pusat Tuisyen (Akademik)	605 buah
Pusat Tuisyen (Perdagangan)	256 buah
Sekolah Teknik	26 buah
Sekolah Rendah dan Menengah	56 buah
Sekolah Bahasa	41 buah
Sekolah Dagang	29 buah

Pengawalseliaan ke atas Kolej, Sekolah Swasta ini dilakukan di peringkat Kementerian Pendidikan dan

juga Jabatan Pendidikan negeri. Antara jenis kawalseliaan yang dilakukan adalah:

- (a) lawatan pemeriksaan dari semasa ke semasa;
- (b) menyiasat aduan-aduan yang diterima;
- (c) menyemak iklan-iklan yang dikeluarkan; dan
- (d) mengambil tindakan administrative atau undang-undang terhadap sekolah/institusi yang melanggar peraturan.

Berhubung dengan Kolej TAFE di Seremban, Kementerian Pendidikan telah memberi kelulusan secara prinsip bagi penubuhannya. Hanya pendaftaran kolej itu yang masih belum diselesaikan kerana masalah teknikal. Kementerian ini telah pun meminta pihak pengurusan kolej berkenaan mengambil tindakan untuk mengatasi masalah-masalah itu.

### MURID DAN LEPASAN SEKOLAH MENYALAHGUNA BAHAN HIDUAN

**44. Puan Rohani binti Abd. Karim** minta Menteri Dalam Negeri menyatakan tentang keadaan di mana masih ramai kanak-kanak lepasan sekolah dan kanak-kanak Sekolah Menengah dan Rendah yang menyalahgunakan bahan "inhalan" seperti gam dan juga ubat batuk di Sarawak. Apakah tindakan yang telah diambil sehingga kini untuk membanteras kegiatan yang tidak sihat ini.

**Tuan Ong Ka Ting:** Kerajaan sedar mengenai perbuatan penyalahgunaan bahan "inhalan" seperti gam dan ubat batuk di kalangan remaja, termasuk murid-murid lepas sekolah dan murid-murid di Sarawak. Bilangan yang dikesan adalah kecil dan dapat dikawal. Walau bagaimanapun, Kerajaan telahpun mengeluarkan sebuah buku

panduan untuk guru-guru, pegawai-pegawai kesihatan dan pegawai-pegawai kebajikan tentang cara-cara mengendalikan kes-kes penyalahgunaan "inhalan" dan bahan-bahan pelarut dan menubuhkan satu kumpulan kerja untuk meneliti kedudukan dan mengawal masalah ini.

#### **KELULUSAN LESEN TEKSI DI JOHOR BAHRU**

**45. Tuan Mohamed Khaled bin Nordin** minta Menteri Perusahaan Awam menyatakan berapa banyak lesen teksi yang diluluskan untuk memberi perkhidmatan di persekitaran Bandar Johor Bahru. Berapa banyak untuk orang perseorangan dan berapa banyak untuk syarikat, persatuan dan pertubuhan dan jumlah lesen teksi yang mereka diperuntukkan.

**Menteri Perusahaan Awam (Dato' Dr Mohamad Yusof bin Haji Mohamed Nor):** Sebanyak 1,685 lesen teksi dan kereta sewa telah diluluskan untuk beroperasi di dalam kawasan Majlis Perbandaran Johor Bahru dan sekitarnya. Daripada jumlah tersebut, 1,529 diluluskan kepada orang perseorangan, 129 kepada syarikat dan 27 kepada persatuan dan pertubuhan.

Memandangkan bilangan yang terlibat adalah banyak, tidaklah praktik bagi saya memberi nama-nama syarikat dan sebagainya secara lisan.

#### **PLUS—KUTIPAN TOL DAN SUMBANGAN PEMBESARAN TAMBAK JOHOR**

**46. Tuan Mohamed Khaled bin Nordin** minta Menteri Kerja Raya menyatakan jumlah kutipan TOL oleh PLUS di Tambak Johor semenjak diperkenalkan TOL dan jumlah perbelanjaan yang disumbangkan oleh PLUS kepada Kerajaan dalam projek pembesaran Tambak Johor.

**Menteri Kerja Raya (Datuk Leo Moggie anak Irok):** Jumlah kutipan tol oleh PLUS Bhd. di Tambak Johor semenjak Perjanjian Konsesi Lebuhraya Utara-Selatan berkuatkuasa pada 31hb Mei 1988 sehingga ke bulan Mac 1992 ialah sebanyak \$26.64 juta.

Untuk makluman Ahli Yang Berhormat, di bawah skop projek Perjanjian Konsesi Lebuhraya Utara-Selatan yang telah ditandatangani dalam tahun 1988, Syarikat Konsesi PLUS Bhd. adalah dipertanggungjawabkan, antara lain, untuk merekabentuk dan membina lebih kurang 462.2 km. Lebuhraya Utara-Selatan di Semenanjung Malaysia, serta juga mengambilalih dari Lembaga Lebuhraya Malaysia (MLA) fungsi pengurusan, operasi dan penyelenggaraan projek Tambak Johor di sempadan Malaysia—Singapura.

Berhubung dengan projek pembesaran Tambak Johor pula ianya adalah merupakan projek Kerajaan. Oleh itu, kos projek berkenaan adalah ditanggung oleh Kerajaan. Walau bagaimanapun, pihak PLUS Bhd. telah bersetuju untuk menyumbang sebanyak \$132,000 bagi mendirikan 6 buah tol di Tambak Johor.

#### **ELEKTRIK DAN JALAN LUAR BANDAR SABAH—PERUNTUKAN 1992**

**47. Tuan George Sangkin** minta Menteri Pembangunan Luar Bandar menyatakan jumlah peruntukan yang disediakan oleh Kementerian berkenaan bagi pembekalan elektrik luar bandar serta jalan raya luar bandar di negeri Sabah dalam tahun 1992 ini.

**Setiausaha Parlimen Kementerian Pembangunan Luar Bandar (Dato Mohamed bin Jamrah):** Kementerian Pembangunan Luar Bandar menyediakan peruntukan untuk pembekalan elektrik luar bandar sebanyak \$30 juta dan peruntukan untuk jalan luar bandar sebanyak \$11.42 juta kepada negeri Sabah dalam tahun 1992 ini.

**INSTITUSI PENDIDIKAN  
SWASTA—SUMBANGAN  
KEPADA KEMAJUAN  
PENDIDIKAN**

**48. Tuan Fong Kui Lun** minta Menteri Pendidikan menyatakan jumlah sekolah dan institusi pendidikan swasta yang beroperasi di negara ini berdasarkan negeri-negeri dan sejauh mana institusi swasta ini menyumbang kepada kemajuan dan pembangunan pendidikan di negara kita dan apakah kelulusan yang Kerajaan iktiraf dan tidak iktiraf.

**Dr Leo Michael Toyad:** Untuk makluman Ahli Yang Berhormat, mengikut rekod-rekod yang terdapat di Kementerian Pendidikan, pada masa ini terdapat 1,184 buah sekolah dan institusi pendidikan swasta yang telah diberi kelulusan oleh Kementerian ini beroperasi di negara ini.

Sekolah dan institusi pendidikan swasta ini telah membantu dan menokok tambah usaha-usaha Kerajaan menyediakan kemudahan-kemudahan pendidikan tambahan untuk rakyat bagi memenuhi keperluan gunatenaga negara.

Sesuatu kelayakan itu diiktiraf oleh Kerajaan adalah bagi tujuan lantikan ke jawatan-jawatan yang bersesuaian serta dinilai mengikut keperluannya dalam Perkhidmatan Awam dan bukan hanya untuk maksud mengiktirafnya atau menilainya bagi tujuan kemasukan ke mana-mana institusi pengajian tinggi sama ada di dalam atau di luar negeri.

**PENDATANG TANPA IZIN—KES  
JENAYAH**

**49. Tuan Fong Kui Lun** minta Menteri Dalam Negeri menyatakan jumlah kes jenayah yang dilakukan oleh pendatang-pendatang Indonesia dan lain-lain negara sepanjang tahun 1991 dan 1992 dan apakah rancangan Polis Malaysia untuk menyekat dari bertambah serius.

**Tuan Ong Ka Ting:** Jumlah kes jenayah yang telah melibatkan pendatang-pendatang tanpa izin termasuk dari Indonesia bagi sepanjang tahun 1991 ialah sebanyak 1,121 kes. Manakala sehingga bulan Mei 1992 ialah sebanyak 512 kes.

Peratusan jenayah yang melibatkan pendatang tanpa izin tidaklah membimbangkan. Walau bagaimanapun, Kerajaan sentiasa berwaspada dan akan mengambil langkah-langkah tegas supaya kadar jenayah keseluruhan dapat dikurangkan.

**SEKOLAH MENENGAH KOLEJ  
PERSENDIRIAN CINA—  
PENUBUHAN**

**50. Tuan Chian Heng Kai** minta Menteri Pendidikan menyatakan:

- (a) sejak 1961 hingga sekarang, berapa permohonan penubuhan sekolah menengah persendirian Cina termasuk permohonan penubuhan baru, penubuhan semula dan penubuhan cawangan dalam seluruh negara diterima dan sila senaraikan mereka dengan sebutkan nama dan negerinya;
- (b) sejak 1961 hingga sekarang, berapa permohonan penubuhan kolej diterima dan sebutkan namanya dan lokasi yang dicadang tubuh; dan
- (c) apakah keputusan kerajaan terhadap permohonan mereka itu.

**Dr Leo Michael Toyad:** Untuk makluman Ahli Yang Berhormat,

- (a) mengikut rekod-rekod yang terdapat di Kementerian ini, terdapat dua permohonan untuk menubuhkan semula sekolah menengah Cina iaitu Sekolah Menengah Seg Hwa, Segamat, Johor dan Sekolah Menengah Yu Hua, Kajang, Selangor.

Sementara permohonan untuk menubuhkan cawangan sekolah menengah Cina pula telah diterima dari Sekolah Foon Yew di Johor Bahru yang ingin menubuhkan cawangannya di Kulai, Johor.

- (b) Kementerian Pendidikan kurang faham apakah yang dimaksudkan dengan perkataan "kolej" dalam soalan itu. Jika kolej dimaksudkan sebagai institusi pendidikan swasta yang menjalankan kursus-kursus di peringkat pos-SPM, Kementerian ini ingin menjelaskan bahawa rekod-rekod yang ada sejak 1961 terdapat 265 permohonan untuk penubuhan kolej swasta diperingkat pos-SPM.
- (c) Permohonan untuk menubuhkan semula dan menubuhkan cawangan sekolah menengah Cina swasta telah tidak diluluskan. Bagi permohonan untuk menubuhkan institusi-institusi pendidikan swasta peringkat pos-SPM, ada 156 permohonan telah diluluskan. Sebanyak 109 permohonan telah ditolak kerana tidak memenuhi syarat-syarat yang diperlukan.

#### PERMOHONAN PERTUKARAN KAD PENGENALAN BARU

**51. Tuan Chian Heng Kai** minta Menteri Dalam Negeri menyatakan:

- (a) bilangan permohonan pertukaran Kad Pengenalan lama kepada Kad Pengenalan baru dan bilangan kad pengenalan baru yang telah dikeluarkan dalam kategori ini sehingga 30hb Jun 1992;
- (b) bilangan kad pengenalan baru yang didapati kesilapan dan terpaksa buat permohonan sekali lagi sehingga 30hb Jun 1992; dan

- (c) bilangan permohonan ini yang kena membetulkan dokumen-dokumen lain terlebih dahulu sehingga 30hb Jun 1992; dan
- (d) sama ada segala permohonan pertukaran kad pengenalan biru dari lama kepada baru dikenakan bayar \$4.00 sahaja. Jika bukan, mengapa.

#### Tuan Ong Ka Ting:

- (a) Sehingga 30hb Jun 1992 sebanyak 1,086,410 permohonan untuk menukar kad pengenalan lama kepada kad pengenalan baru telah diterima dan 716,983 kad telah dikeluarkan.
- (b) Perangkaan mengenai kad pengenalan baru yang silap dan pemohon terpaksa membuat permohonan baru masih belum diperolehi. Walau bagaimanapun, bilangannya dijangka kecil sahaja.
- (c) Sehingga 30hb Jun 1992, sebanyak 7,593 permohonan yang terlibat dengan pembetulan di dokumen berkaitan.
- (d) Permohonan pertukaran kad pengenalan biru lama kepada baru dikenakan bayaran \$4.00. Walau bagaimanapun, permohonan kerana rosak dikenakan bayaran \$10.00 manakala bayaran kerana kehilangan dikenakan antara \$10.00 hingga \$30.00 bergantung kepada kekerapan kehilangan.

#### JEMAAH HAJI TANPA VISA— TINDAKAN

**52. Che Ibrahim bin Mustafa** minta Perdana Menteri menyatakan:

- (a) bilangan jemaah Haji Malaysia yang menunaikan fardhu Haji di Mekah pada tahun ini;

- (b) bilangan jemaah Haji Malaysia yang gagal menunaikan Haji terkandas dan tidak mendapat Visa pada tahun ini;
- (c) bilangan syarikat-syarikat terbabit yang menyebabkan bakal-bakal Haji ini terkandas; dan
- (d) apakah tindakan yang telah diambil oleh Kerajaan terhadap Syarikat-syarikat yang terbabit.

**Setiausaha Parlimen di-Jabatan Perdana Menteri (Tuan Othman bin Abdul):** Soalan-soalan (a) hingga (d) telah pun dijawab pada 20-7-92 berikutan dari soalan yang dikemukakan oleh Yang Berhormat dari Bachok.

#### SISTEM PERKONGSIAN KERETA KE PEJABAT PENGUATKUASAAN

**53. Che Ibrahim bin Mustafa** minta Menteri Pengangkutan menyatakan:

- (a) adakah Kerajaan benar-benar berhasrat untuk mewajibkan kakitangan Kerajaan berkongsi kereta ke pejabat;
- (b) bilakah peraturan ini akan digubal dan dikuatkuasakan;
- (c) jika kesesakan jalan raya yang menjadi puncanya, mengapakah kakitangan Kerajaan sahaja yang diwajibkan dan tidak merangkumi kakitangan sektor swasta; dan
- (d) adakah Kerajaan benar-benar yakin bahawa dengan penguatkuasaan undang-undang ini masalah kesesakan jalan raya akan dapat ditangani, walaupun pendapat majoriti mengakui bahawa pokok pangkal kepada masalah ini ialah ketiadaan sistem pengangkutan awam yang berkesan di bandaraya.

**Datin Paduka Hajah Zaleha binti Ismail:**

- (a) Pada masa ini Kerajaan tidak berhasrat untuk mewajibkan kakitangan Kerajaan berkongsi kereta ke pejabat. Sebaliknya sistem perkongsian kereta ini lebih merupakan satu galakan.
- (b) Soalan ini tidak berbangkit.
- (c) Galakan supaya berkongsi kereta tidak sahaja terhad kepada kakitangan Kerajaan semata-mata, malah ianya merangkumi juga sektor swasta.
- (d) Sistem perkongsian kereta adalah sebahagian daripada usaha mengurangkan masalah kesesakan lalulintas di bandaraya Kuala Lumpur. Tindakan yang lain yang sedang ditimbang oleh Kerajaan ialah meningkatkan tahap perkhidmatan bas di Kuala Lumpur dan kawasan sekitarnya termasuk menggabungkan semua syarikat bas dan meminda laluan-laluannya.

#### GURU BESAR DAN PENOLONG KANAN SEKOLAH RENDAH— RASIONAL PENGGANTIAN

**54. Tuan Ahmad bin Nor** minta Menteri Pendidikan menyatakan pendirian Kementerian berhubung dengan kedudukan 20,000 jawatan Guru-guru Besar dan Penolong-penolong Kanan sekolah rendah yang mempunyai kelulusan Sijil Pelajaran Malaysia atau Malaysian Certificate of Education, dan apakah rasional bagi Kementerian bercadang untuk menggantikan tempat mereka dengan guru-guru yang berkelulusan STPM/HSC.

**Dr Leo Michael Toyad:** Untuk makluman Ahli Yang Berhormat, di bawah dua skim perkhidmatan pendidikan sekarang, sekolah-sekolah telah dibahagikan kepada dua gred iaitu

Sekolah Rendah Gred A dan Sekolah Rendah Gred B. Jawatan Guru Besar sekolah rendah Gred A diisi oleh Pegawai Perkhidmatan Pendidikan Siswazah (PPPBS) DG 4, sementara jawatan Guru Besar Sekolah Rendah Gred B diisi oleh PPPBS DG 5.

Rasional mengapa 20,000 tempat Guru Besar dan Penolong Kanan tersebut digantikan dengan guru-guru yang berkelulusan lebih tinggi adalah semata-mata untuk memperkemaskan dan mempertingkatkan lagi mutu perkhidmatan pendidikan dan mutu pendidikan negara.

**PILIHANRAYA DEWAN NEGERI  
SABAH—KENYATAAN PERDANA  
MENTERI**

**55. Tuan Maidom P. Pansai** minta Perdana Menteri menyatakan apakah alasan munasabah beliau yang begitu berani membuat kenyataan bahawa pilihanraya umum bagi Dewan Negeri Sabah akan diadakan secara mengejut pada bila-bila masa sahaja.

**Menteri di Jabatan Perdana Menteri dan Menteri Undang-undang (Dato' Syed Hamid bin Syed Jaafar Albar):** Kenyataan itu dibuat atas anggapan dan kemungkinan besar bahawa Pilihanraya Umum bagi Dewan Undangan Negeri Sabah akan diadakan pada bila-bila masa sahaja memandangkan keadaan-keadaan politik di Sabah sekarang. Kerajaan Persekutuan perlu membuat persediaan dengan segera bagi mengadakan pilihanraya itu dengan sempurna sebaik sahaja Kerajaan Negeri memutuskannya.

**TANGKAPAN KERANA  
MEMBANTAH KERJA  
PEMBALAKAN DI SARAWAK**

**56. Dr. Kua Kia Soong** minta Menteri Dalam Negeri menyatakan:

- (a) jumlah orang asli Sarawak yang telah ditangkap hasil daripada penglibatan mereka di dalam

peristiwa pengepungan kerana membantah kerja-kerja pembalakan;

- (b) berapa ramai daripada mereka yang masih ditahan;
- (c) berapa ramai yang ditangkap di bawah Ordinan Kecemasan;
- (d) mengapa empat orang Kayan dari Baran, kawasan Miri—iaitu Jau Eng, Lah Ding, Jok Ngau, Henry Ajeng ditangkap pada 16hb Jun, 1992.

**Tuan Ong Ka Ting:**

- (a) Dari tahun 1989 hingga Jun 1992 seramai 480 orang Asli Sarawak telah ditangkap hasil daripada penglibatan mereka di atas peristiwa pengepungan kerana membantah kerja-kerja pembalakan.
- (b) Tiada seorang pun yang masih ditahan pada masa ini.
- (c) Cuma seorang sahaja yang ditangkap dan ditahan di bawah Ordinan Kecemasan, seperti Miri Rpt. 849/92 @ 5-2-1992. Walau bagaimanapun, penama telah dibebaskan pada 3-3-1992 tanpa sebarang tuduhan terhadapnya.
- (d) Keempat-empat orang dari Baran telah ditangkap atas kesalahan menyebabkan kerosakan (bencana) terhadap 'rail-track' atas jambatan melintas Sungai Tabih, Long Barang, Ulu Marudi, Miri. Mereka telah dituduh di mahkamah pada 24-6-1992 di bawah Seksyen 427 Kanun Keseksaan. Keempat-empat orang yang dituduh tidak mengaku salah di atas tuduhan tersebut dan mereka telah dibenarkan jamin dengan M\$3,000 dan seorang penjamin.

**BELIA—MEMODENKAN  
PENGURUSAN PEMBANGUNAN**

**57. Tuan Haji Mahbud bin Haji Hashim** minta Menteri Belia dan Sukan menyatakan adakah satu kajian

menyeluruh akan dijalankan untuk memodenkan pengurusan pembangunan belia di seluruh negara.

**Setiausaha Parlimen Kementerian Belia dan Sukan (Dato' Ismail bin Said):** Kajian mengenai pembangunan belia dilaksanakan dari semasa ke semasa berdasarkan pembangunan ekonomi masa kini. Hasil kajian itu dijadikan bahan untuk memperbaiki, mengubahsuai dan memperkenalkan program-program baru bagi memenuhi keperluan belia itu sesuai dengan kehendak pembangunan negara. Pelaksanaan Program Induk Belia Negara merupakan langkah positif Kementerian Belia dan Sukan untuk memodenkan pengurusan pembangunan belia di seluruh negara.

#### **PERSIDANGAN BUMI DI RIO DE JANEIRO—DASAR LUAR MALAYSIA**

**58. Tuan Haji Hamzah bin Mohd. Zain** minta Menteri Luar Negeri menyatakan apakah pencapaian matlamat Dasar Luar Malaysia dengan kehadiran dan penglibatan Perdana Menteri dan wakil-wakil Malaysia di Sidang Bumi Rio.

**Dato' Dr. Abdullah Fadzil bin Che Wan:** Hasil Persidangan Bangsa-bangsa Bersatu mengenai Alam Sekitar dan Pembangunan atau juga dikenali sebagai Sidang Kemuncak Bumi yang berlangsung di Rio de Janeiro pada 3hb hingga 14hb Jun 1992 yang lalu ialah seperti rumusan-rumusan berikut:

- (i) satu Deklarasi Bumi yang digelar "Deklarasi Rio de Janeiro Mengenai Alam Sekitar dan Pembangunan".
- (ii) satu program tindakan yang dinamakan "Agenda 21".
- (iii) satu kenyataan mengenai hutan yang dinamakan "A Non-Legally Binding Authoritative Statement of Principles for a Global Consensus on the Management,

Conservation and Sustainable Development of All Types of Forests".

- (iv) untuk menubuhkan satu Suruhanjaya yang dinamakan "Commission on Sustainable Development" bagi tujuan mengendalikan aktiviti-aktiviti susulan selepas Persidangan Bangsa-Bangsa Bersatu mengenai Alam Sekitar dan Pembangunan (UNCED).
- (v) untuk menubuhkan satu Jawatankuasa Antara Kerajaan bagi Cadangan Konvensyen yang dinamakan "Convention on Desertification".

Di samping di atas, 154 buah negara telah menandatangani Konvensyen-Konvensyen yang berikut itu:

- (i) Konvensyen mengenai Perubahan Iklim (Framework Convention on Climate Change).
- (ii) Konvensyen mengenai "Biological Diversity".

Secara ringkas saya ingin menjelaskan mengenai Konvensyen Biodiversiti yang ditandatangani oleh Malaysia di Rio. Pada asasnya, Konvensyen ini memberikan hak kedaulatan sesebuah negara ke atas sumber-sumber asli yang terdapat di negara tersebut dan memberi kuasa kepada sesebuah Kerajaan membuat keputusan mengenai perolehan sumber-sumber genetik itu. Dengan menandatangani Konvensyen Bio-diversiti ini, maka Malaysia boleh mengawal dan menentukan supaya sumber-sumber genetik dari negara ini akan terpelihara.

Mengenai program tindakan 'Agenda 21' pula, daripada jumlah sebanyak AS\$125 billion yang dianggarkan perlu untuk melaksanakannya, sumbangan Malaysia serta juga sumbangan yang akan diterima daripada bahagian ini belum lagi ditetapkan kerana butir-butir lanjut mengenai program tindakan ini masih belum diselesaikan.

Satu perkara lagi ialah usaha 'Menghijaukan Bumi' yang merupakan salah satu prinsip yang terkandung di dalam Kenyataan Hutan yang telah diterima semasa di Rio. Kita mengharapkan ia boleh dilaksanakan semasa tindakan-tindakan susulan mengenai keseluruhan hasil Sidang Kemuncak Bumi di Rio dibincangkan kelak. Ini akan diadakan di Perhimpunan Agung Bangsa-bangsa Bersatu tahun ini.

Kerajaan adalah berpuashati dengan pencapaian-pencapaian yang telah dicapai oleh Sidang Kemuncak Bumi di Rio. Malaysia telah memainkan peranan yang pro-aktif dan berpengaruh di Persidangan tersebut. Malaysia telah melahirkan pandangan-pandangan yang mencerminkan pandangan kebanyakan negara-negara membangun yang lain. Pandangan-pandangan ini adalah berdasarkan pada rumusan-rumusan yang dibuat semasa Persidangan Kedua Peringkat Menteri Negara-negara Membangun mengenai Alam Sekitar dan Pembangunan di Kuala Lumpur yang lalu. Selain itu, ucapan Yang Amat Berhormat Perdana Menteri telah mendapat penuh perhatian serta disambut baik terutama oleh negara-negara membangun yang lain dan beberapa buah Pertubuhan-pertubuhan Bukan Kerajaan (NGOs).

Kejayaan Malaysia dapat dilihat melalui kepimpinan Malaysia selaku Penyelaras Jawatankuasa "Institusi" yang berjaya mendapatkan persetujuan yang terulung sekali di Sidang Kemuncak ini. Jawatankuasa tersebut telah menubuhkan satu Suruhanjaya yang dinamakan "Commission on Sustainable Development" yang akan menjadi rangka pengendalian aktiviti-aktiviti selepas Rio. Malaysia juga telah dilantik sebagai salah satu Naib-Presiden Mesyuarat yang menunjukkan penghormatan yang diberikan pada Malaysia.

Di samping itu, Malaysia telah berjaya memainkan peranan yang utama dalam isu Hutan bagi mengenyahkan tindakan-tindakan negara maju yang inginkan satu Konvensyen Hutan. Malaysia juga mengambil bahagian yang aktif dalam perbincangan-perbincangan mengenai mekanisma kewangan dan berjaya meyakinkan negara-negara maju supaya bersetuju untuk mengubahsuai pentadbiran "Global Environmental Facility (GEF)".

Sukacita saya memaklumkan bahawa di Sidang Kemuncak Bumi di Rio de Janeiro, tidak terdapat apa-apa demonstrasi terhadap Malaysia. Sungguhpun demikian, terdapat perhatian dan minat mengenai pembalakan di Sarawak. Yang Amat Berhormat Perdana Menteri sendiri dan juga Menteri-menteri Kabinet, Ketua Menteri Sarawak, Ahli-ahli Parlimen, pegawai-pegawai dan wakil-wakil kaum Penan yang turut menyertai Sidang Kemuncak ini mengambil kesempatan untuk berjumpa dan mengadakan perbincangan dengan semua pihak yang berminat mengenai pendirian Kerajaan hal ini, dan telah berjaya memberikan gambaran yang sebenar mengenai keadaan di Malaysia.

Secara keseluruhannya, hasil dari kehadiran dan penglibatan Yang Amat Berhormat Perdana Menteri, Menteri-menteri Kabinet, Ahli-ahli Parlimen dan pegawai-pegawai kanan di Sidang Bumi Rio telah berjaya mencapai matlamat-matlamat Dasar Luar Malaysia. Peranan aktif yang telah dimainkan oleh Malaysia telah meninggikan lagi imej Malaysia sebagai sebuah negara yang tidak segan untuk menegakkan kebenaran.

Pada amnya, Persidangan Bangsa-Bangsa Bersatu Mengenai Alam Sekitar dan Pembangunan (UNCED) di Rio de Janeiro telah membincangkan semua perkara-perkara berkaitan dengan alam sekitar dan pembangunan. Yang paling

utama, Sidang Bumi ini telah menerima hubungkait alam sekitar dengan pembangunan. Ini penting terutamanya bagi negara-negara membangun oleh kerana memerlukan pembangunan ekonomi di dalam mencapai pembangunan. Negara-negara maju dan negara-negara membangun bersetuju bahawa masalah alam sekitar tidak boleh diselesaikan tanpa menyelesaikan masalah-masalah pembangunan.

Sidang Kemuncak Bumi ini telah meningkatkan tahap kesedaran mengenai alam sekitar di peringkat paling tinggi pihak Kerajaan dan juga setiap peringkat masyarakat berkaitan dengan perlunya pembangunan ekonomi yang berterusan (sustained economic growth) dan juga pemeliharaan alam sekitar.

Sidang Kemuncak Bumi tersebut juga memahami bahawa proses pelaksanaan keputusan-keputusan UNCED akan memerlukan persefahaman dan kerjasama di antara negara-negara Utara dan negara-negara Selatan. Oleh yang demikian, perbincangan dan muafakat di antara negara-negara maju dan negara-negara membangun bagi mewujudkan demokrasi di dalam sistem pengawalan dan pentadbiran dunia mestilah diadakan berterusan. Dalam hal ini, Malaysia akan meneruskan usaha dan bekerjasama rapat dengan negara-negara yang sealiran sama ada di Utara atau Selatan bagi memastikan demokrasi antarabangsa dicapai.

Namun demikian, Sidang Kemuncak Bumi ini tidak berjaya mendapat komitmen yang spesifik dari negara-negara maju dalam isu-isu seperti sumber-sumber kewangan, pemindahan teknologi, sistem ekonomi antarabangsa yang terbuka dan 'sustainable development'. Ini merupakan halangan-halangan yang perlu diatasi dalam pelaksanaan resolusi-resolusi Sidang Kemuncak Bumi di Rio.

### LEBUHRAYA SUNGAI BESI- AYER KEROH—KEJADIAN KEMALANGAN

**59. Tuan Kerk Kim Hock** minta Menteri Dalam Negeri menyatakan, dalam usaha untuk mengurangkan kejadian kemalangan di Lebuhraya Sungai Besi-Ayer Keroh,

- (a) berapakah jumlah saman yang telah dikeluarkan kepada pemandu-pemandu bersabit dengan kesalahan memandu melebihi had laju bagi tempoh 1-1-92 hingga 1-7-92;
- (b) jumlah bayaran kompaun yang telah dikutip bagi tempoh yang sama;
- (c) sejauh manakah langkah menguatkuasakan undang-undang tersebut dapat bantu menurunkan kadar kemalangan di lebuhraya tersebut; dan
- (d) berapakah jumlah kemalangan yang berlaku di lebuhraya tersebut bagi tempoh yang sama.

#### **Tuan Ong Ka Ting:**

- (a) Dalam tempoh 1-1-92 hingga 1-7-92, sebanyak 6,873 saman telah dikeluarkan kepada pemandu-pemandu kerana memandu melebihi had laju di Lebuhraya Sungai Besi-Ayer Keroh.
- (b) Dalam tempoh yang sama sebanyak \$687,000 kompaun telah dikutip.
- (c) Penguatkuasaan undang-undang trafik telah dapat membantu mengurangkan kadar kemalangan jalanraya. Dalam tempoh 6 bulan tahun ini, di mana 6,873 saman telah dikeluarkan, hanya 347 kemalangan telah berlaku berbanding dengan 414 kemalangan bagi tempoh yang sama tahun lalu di mana 5,826

saman telah dikeluarkan. Ini ialah kerana pemandu-pemandu lebih berhati-hati yang mana seterusnya telah dapat mengurangkan kemalangan.

Walau bagaimanapun, untuk mengurangkan kadar kemalangan dalam jangkamasa panjang, ia tidak hanya boleh bergantung pada penguatkuasaan sahaja. Pengguna-pengguna jalan raya hendaklah diberikan pendidikan termasuk pendidikan dari segi keselamatan jalan raya, 'civic mindedness' dan kejuruteraan.

- (d) Dalam tempoh 1-1-1992 hingga 1-7-1992, sebanyak 347 kemalangan telah berlaku di Lebuhraya Sungai Besi-Ayer Keroh.

#### PEMUDA MCA DENGAN PERDANA MENTERI— HASIL PERJUMPAAN

**60. Tuan Lim Guan Eng** minta Perdana Menteri menyatakan hasil perjumpaan pada 21-3-92 di antara rombongan pemuda MCA dan beliau khususnya permintaan Pemuda MCA:

- (a) bahawa TV3 diarahkan menyiarkan Berita dalam Bahasa Mandarin serta masa siaran dalam Bahasa Cina di TV2; dan  
(b) pengiktirafan ijazah Kolej Tunku Abdul Rahman.

**Dato' Syed Hamid bin Syed Jaafar Albar:** Pemimpin-pemimpin parti dalam Barisan Nasional sentiasa mengadakan perjumpaan dari semasa ke semasa untuk mengeratkan lagi perhubungan serta meningkatkan persefahaman berhubung dengan isu-isu yang mempunyai kepentingan bersama. Perjumpaan antara Yang Amat Berhormat Perdana Menteri dan Pergerakan Pemuda MCA pada 21hb Mac yang lalu adalah contohnya. Perjumpaan itu dibuat secara tertutup

dan hasilnya adalah memuaskan kerana ianya menghasilkan persefahaman yang lebih baik. Kita tidaklah hendak menggembar-gemburkan apa-apa yang dibincangkan seperti yang lazimnya dibuat oleh parti-parti lain yang perjuangan politiknya sangat sempit.

#### UNIVERSITI TEMPATAN— KUOTA PENGAMBILAN PELAJAR

**61. Tuan Lim Guan Eng** minta Menteri Pendidikan menyatakan:

- (a) bilangan murid yang diterima oleh 6 universiti tempatan bagi tahun ini;  
(b) sama ada penuntut baru dan keseluruhannya memenuhi kuota 45:55; dan  
(c) kalau tidak, mengapa serta apa tindakan yang akan diambil untuk memastikan kuota 45:55 dipenuhi.

**Dr Leo Michael Toyad:** Untuk makluman Ahli Yang Berhormat, urusan pendaftaran pelajar-pelajar baru untuk memasuki universiti-universiti tempatan masih belum selesai sepenuhnya. Oleh itu, maklumat terperinci mengenai pelajar-pelajar yang berjaya memasuki universiti tempatan masih belum diperolehi.

#### PELAJAR WANITA MALAYSIA MURTAD—TINDAKAN

**62. Dr. Nawawi bin Mat Awin** minta Menteri Pendidikan menyatakan sama ada benar atau tidak laporan-laporan yang mendakwa Muslimat rakyat Malaysia yang menjadi murtad termasuk pelajar-pelajar semasa berada di luar negeri dan apakah tindakan yang sedang atau akan diambil mengatasi masalah ini.

**Dr Leo Michael Toyad:** Untuk makluman Ahli Yang Berhormat, melalui Jabatan Penuntut Malaysia di luar negeri, Kementerian Pendidikan telah membuat siasatan yang rapi berkaitan dengan laporan mengenai pelajar-pelajar wanita Melayu yang menukar agama. Sehingga masa ini hasil daripada siasatan itu didapati tidak ada maklumat yang mengesahkan adanya mana-mana pelajar Melayu Malaysia yang menukar Agama Islam kepada agama-agama lain.

Buat masa ini Kementerian Pendidikan tidak membuat sebarang pindaan perakuan berkaitan penghantaran pelajar ke luar negeri, kerana peruntukan yang sedia ada telah menetapkan syarat-syarat yang ketat. Antaranya pelajar-pelajar tajaan Kerajaan tidak dibenarkan berkahwin melainkan mendapat kebenaran Kerajaan terlebih dahulu semasa di dalam pengajian sama ada di dalam atau luar negeri. Syarat-syarat tersebut telah dimasukkan ke dalam Surat Perjanjian Biasiswa pelajar berkenaan. Walau bagaimanapun, untuk mengelakkan perkara ini berlaku, Kementerian Pendidikan bercadang untuk mempertingkatkan kursus-kursus bimbingan agama dan menyediakan buku-buku panduan agama bagi pelajar-pelajar yang sedia berada di luar negeri. Program orientasi bagi pelajar-pelajar yang akan ke luar negeri juga akan dipertingkatkan.

#### **KILANG JEPUN DI MALAYSIA DAN PEMEGANG JAWATAN PENTING**

**63. Puan Lim Lay Hoon** minta Menteri Perdagangan Antarabangsa dan Industri menyatakan bilangan Kilang Jepun yang terdapat di Malaysia dan,

- (a) bilangan rakyat Malaysia yang memegang jawatan pengurusan yang penting di kilang-kilang itu; dan

- (b) bilangan rakyat Jepun yang memegang jawatan pengurusan yang penting di kilang-kilang itu.

**Tuan S.S. Subramaniam:** Bagi tempoh 1980-1991 terdapat 489 projek perkilangan dengan penyertaan Jepun telah diluluskan di bawah Akta Penyelarasan Perindustrian 1975 dan sedang beroperasi. Seramai 100,754 orang sedang bekerja di kilang-kilang. Berhubung dengan bilangan rakyat Malaysia yang memegang jawatan pengurusan yang penting di kilang-kilang ini, angka ini tidak dikumpul. Mengenai bilangan rakyat Jepun yang memegang jawatan pengurusan, berasaskan angka-angka yang disediakan oleh Jabatan Imigresen, kelulusan-kelulusan berikut telah diberi bagi jawatan pengurusan dan eksekutif:

1989	609
1990	751
1991	748
1992	76
(Jan.-Feb.)	

#### **JENAYAH KOLAR PUTIH— JUMLAH KES DAN TINDAKAN**

**64. Tuan Haji Abdul Hadi bin Haji Awang** minta Menteri Dalam Negeri menyatakan:

- (a) berapakah jumlah kes jenayah kolar putih yang telah berlaku dari tahun 1981 hingga sekarang mengikut negeri-negeri;
- (b) apakah bentuk-bentuk jenayah tersebut;
- (c) apakah tindakan-tindakan yang telah diambil; dan
- (d) adakah Kerajaan bersetuju dengan hukuman sebat yang telah dicadangkan oleh beberapa pihak akhir-akhir ini.

**Tuan Ong Ka Ting:**

(a) Perangkaan kes-kes jenayah perdagangan kolar putih mengikut negeri bagi tahun 1981 hingga bulan Jun 1992 adalah seperti berikut:

Perlis	349
Kedah	2,237
Pulau Pinang	4,443
Perak	5,369
Kuala Lumpur	12,529
Selangor	5,322
Negeri Sembilan	2,295
Melaka	1,154
Johor	4,700
Pahang	6,681
Kelantan	1,438
Terengganu	858
Sabah	4,373
Sarawak	3,545
Jumlah	55,293

- (b) Bentuk-bentuk jenayah tersebut adalah meliputi pecah amanah jenayah, penipuan, pemalsuan kad kredit dan wang palsu.
- (c) Tindakan mahkamah telah diambil terhadap golongan mereka yang terlibat dengan jenayah perdagangan ini. Mereka telah dituduh dan dikenakan hukuman di bawah undang-undang Kanun Keseksaan.
- (d) Perkara ini masih lagi dalam kajian Kerajaan.

**KEBAKARAN PEJABAT  
SURUHANJAYA  
PILIHANRAYA—HASIL  
SIASATAN**

65. Tuan Haji Abdul Hadi bin Haji Awang minta Menteri Dalam negeri menyatakan apakah hasil siasatan pihak Polis terhadap kebakaran Pejabat SRP di

Kuala Terengganu pada 14hb Jun, 1992 yang antaranya memusnahkan 200 set daftar pemilih bagi Parlimen Marang dan Kuala Terengganu.

**Tuan Ong Ka Ting:** Pihak Polis telahpun menjalankan siasatan dan hasil dari siasatan tersebut seorang lelaki telah ditangkap pada 11hb Julai, 1992. Kes ini telah dirujuk kepada Yang Ariff Timbalan Pendakwa Raya Terengganu dan atas arahan beliau, pada 18hb Julai 1992 saspak telah dibebaskan dengan jamin Polis sebanyak \$1,000.00. Saspak akan dituduh di mahkamah sebaik sahaja laporan kimia diterima.

**TAKRIF 'MELAYU' DAN  
KEMASUKAN  
AHLI DALAM UMNO**

66. Tuan Joseph Voon minta Perdana Menteri menyatakan sama ada Kerajaan bercadang untuk meminda definisi 'Melayu' sepertimana yang ada dalam Perlembagaan Persekutuan sekarang. Kalau tidak, bagaimanakah orang-orang Kadazan, Sino-Kadazan, Dusun dan Murut boleh jadi ahli Pertubuhan Kebangsaan Melayu Bersatu (UMNO), iaitu sebuah parti politik yang berjuang untuk menegakkan ketuanan Melayu di Malaysia.

**Dato' Syed Hamid bin Syed Jaafar Albar:** Kerajaan tidak bercadang untuk meminda definisi 'Melayu' seperti yang termaktub di dalam Perlembagaan Persekutuan sekarang.

Merujuk kepada bagaimanakah orang-orang Kadazan, Sino-Kadazan, Dusun dan Murut boleh menjadi ahli UMNO, perlembagaan parti tersebut jelas menyatakan bahawa warganegara Melayu atau bumiputera yang berusia 18 tahun ke atas, boleh menjadi ahli UMNO. Dengan itu, semua bumiputera seperti Kadazan, Sino-Kadazan, Dusun dan Murut boleh menjadi ahli UMNO.

## LESEN JUDI—BILANGAN

**67. Tuan Haji Mohd. Zihin bin Haji Mohd. Hassan** minta Menteri Kewangan menyatakan semua lesen-lesen judi akan diberhentikan dan berapa banyakkah lesen-lesen judi yang ada dan yang akan dikeluarkan.

**Dato' Loke Yuen Yow:** Kerajaan tidak bercadang untuk menamatkan lesen judi kerana Kerajaan berpendapat tindakan sedemikian akan hanya menggalakkan pertumbuhan 'judi haram'. Pada lazimnya aktiviti 'judi haram' melibatkan anasir-anasir negatif yang sering mengancam keselamatan negara dan juga menimbulkan pelbagai implikasi yang tidak sehat. Oleh yang demikian, dasar Kerajaan sekarang melesenkan syarikat swasta mengendalikan aktiviti perjudian adalah bertujuan untuk memerangi kegiatan 'judi haram' dan anasir-anasir jahat yang mengancam keselamatan negara. Dengan meningkatkan aktiviti penguatkuasaan dan mengambil tindakan yang tegas ke atas operator-operator 'judi haram' dan dengan adanya kawalan yang rapi ke atas syarikat-syarikat perjudian yang berlesen, Kerajaan percaya Kerajaan dapat memerangi dan membendung secara lebih berkesan kegiatan 'judi haram' dan anasir-anasir jahat yang mengancam keselamatan negara.

Kerajaan sebenarnya telahpun mengambil beberapa tindakan bagi mengurangkan aktiviti perjudian.

- (i) Pada tahun 1989 Kerajaan telah menamatkan lesen pertaruhan Ascot Sports Sdn. Bhd. Kemudian pada tahun 1990 Loteri Perkhidmatan Masyarakat dan Kebajikan pula ditamatkan.
- (ii) Di antara tahun 1989 hingga tahun 1990 lesen mengendalikan Mesin Slot oleh kelab-kelab syarikat telah dikurangkan daripada 106 kepada 34,

manakala lesen untuk kelab persatuan pula dikurangkan daripada 222 kepada 46.

- (iii) Kerajaan juga tidak lagi mengeluarkan lesen-lesen baru bagi mengendalikan aktiviti perjudian. Pada masa sekarang Kerajaan hanya memberi pertimbangan untuk membaharui lesen-lesen judi yang sedia.

## USUL MENANGGUHKAN MESYUARAT DI BAWAH PERATURAN MESYUARAT 18

### Kemalangan Industri dan Keselamatan Pekerja— Mengkaji Semula PERKESO

3.37 *ptg.*

**Tuan Haji Mohamad bin Sabu (Nilam Puri)** Tuan Yang di-Pertua, Usul asal saya banyak sangat kena potong. Yang potong itu tidak boleh dibaca?

**Timbalan Yang di-Pertua (Tuan Ong Tee Keat):** Ya.

**Tuan Haji Mohamad bin Sabu:** Tuan Yang di-Pertua, dengan hormatnya saya mengemukakan pemberitahuan bertulis di bawah Peraturan 18 Majlis Dewan Rakyat mencadangkan supaya Majlis Mesyuarat pada hari ini 28hb Julai, 1992 ditangguhkan dengan tujuan merundingkan perkara tertentu berkenaan kepentingan orang ramai yang berkehendak disegerakan. Usul saya berbunyi:

"Bahawa Dewan yang mulia ini mengizinkan Ahli dari Nilam Puri untuk mencadangkan supaya Majlis Mesyuarat ini ditangguhkan bagi tujuan merundingkan satu perkara tertentu berkenaan kepentingan orang ramai yang berkehendak disegerakan, yakni membincangkan permasalahan ratusan ribu pekerja-pekerja yang gagal diberi perlindungan dan

gantirugi sewajarnya yang menjadi mangsa kemalangan industri akibat kecuaihan majikan dan kepincangan Akta Keselamatan Sosial Pekerja (PERKESO) 1969 dan mengambil ketetapan berikut:

- (i) mengkaji semula Akta Keselamatan Sosial Pekerja 1969;
- (ii) membentuk sebuah Suruhanjaya Penyiasatan mengenai Kemalangan Industri dan Keselamatan Pekerja; dan
- (iii) mendesak Kerajaan Persekutuan supaya memperakui dan melaksanakan Konvensyen 155 Pertubuhan Buruh Antarabangsa (ILO) yang diluluskan pada tahun 1981 mengenai keselamatan dan kesihatan pekerja serta persekitaran kerja.”

Tuan Yang di-Pertua, perkara ini adalah perkara tertentu yang melibatkan undang-undang PERKESO yang kononnya bertujuan memberi perlindungan dan menjamin keselamatan kaum pekerja, akan tetapi sebaliknya gagal memberi jaminan keselamatan dan perlindungan serta gantirugi yang sewajarnya ke atas masalah yang melibatkan ratusan ribu kes-kes kemalangan industri yang menjejaskan nasib dan juga kaum pekerja. Misalnya kemalangan dalam tahun 1989 - 124,000; kemalangan dalam tahun 1990 - 143,000; dalam tahun 1991 - 164,000 dan dijangka pada tahun 1993 hampir suku juta akan ditimpa kemalangan. (*Potong....potong....potong*).

Perkara ini adalah berkenaan kepentingan orang ramai kerana menurut perangkaan rasmi sepertimana yang dibentangkan dalam satu seminar mengenai, dengan izin, “Workers’ safety in Malaysia in year 2000 and beyond” yang dirasmikan oleh Yang Berhormat Menteri Sumber Manusia pada 24hb April, 1992 adalah didapati bahawa

berbanding dengan tahun 1985, jumlah kemalangan industri telah meningkat daripada 61,724 kes kepada 107,479 kes pada tahun 1989, iaitu satu pertambahan sebanyak 71%. Daripada jumlah yang mengalami kecederaan, 4% daripadanya mengalami kecacatan anggota tubuh badan dalam sepanjang hayat dan tidak kurang pula yang berakhir dengan kematian akibat kecederaan yang dialami. Menurut kajian Lindungan Kerja Malaysia (LKM), kadar kematian akibat kemalangan industri ialah 3 orang setiap hari dan sekurang-kurangnya seorang pekerja mengalami kecederaan di tempat kerja bagi setiap lima minit. Ini barangkali kurang pekerja di Malaysia sekarang.

Tuan Yang di-Pertua, perkara ini berkehendak disegerakan kerana permasalahan ini melibatkan keselamatan dan kesejahteraan rakyat Malaysia khasnya kaum pekerja yang sewajarnya mendapat perlindungan dan keadilan. Tindakan segera perlu diambil untuk menangani permasalahan keselamatan pekerja secara bersungguh-sungguh dan jujur memandangkan dari tahun 1990 hingga 1991 sahaja dilaporkan 1,018 nyawa terbunuh akibat kecederaan yang dialami dalam kemalangan industri, manakala dalam tempoh yang sama hanya 36 orang mengalami kematian akibat penyakit sindrom kurang daya tahan iaitu AIDS.

Tuan Yang di-Pertua, saya mohon mencadangkan.

**Timbalan Yang di-Pertua (Tuan Ong Tee Keat):** Ahli-ahli Yang Berhormat, saya telah menerima satu Pemberitahu Usul di bawah Peraturan Mesyuarat 18(1) daripada Yang Berhormat Ahli dari Kawasan Nilam Puri pagi tadi. Teks Usul itu adalah seperti yang dibacakan oleh Ahli Yang Berhormat itu sebentar tadi. Bagi membolehkan perkara ini ditimbang oleh Majlis Mesyuarat hari ini, saya sebagai Yang di-Pertua, hendaklah

berpuashati bahawa perkara yang dibangkitkan oleh Ahli Yang Berhormat itu memenuhi tiga syarat.

Syarat yang pertama ialah bahawa perkara itu perkara tertentu. Syarat yang kedua, ia adalah bagi kepentingan orang ramai dan syarat yang ketiga, ia berkehendakkan disegerakan. Saya telah meneliti Usul ini dan saya dapati bahawa perkara ini adalah perkara yang tertentu dan ia adalah juga bagi kepentingan orang ramai, tetapi ianya tidak perlu disegerakan kerana perkara ini boleh dibawa pada mana-mana masa pun dan tidak payah di bawah Perkara Peraturan Mesyuarat 18.

Yang di-Pertua Dewan telah biasa memutuskan bahawa cadangan mengkaji atau meminda sesuatu undang-undang itu tidak perlu disegerakan hinggakan hendak menangguhkan Mesyuarat Dewan ini. Begitu juga Usul untuk menubuhkan sebuah Suruhanjaya Penyiasat atau memperakui apa-apa konvensyen. Sebenarnya perkara-perkara yang perlu disegerakan itu adalah perkara-perkara, yang jika ia tidak dibahaskan, maka masa membahaskannya akan hilang dan Dewan ini tidak berpeluang lagi berbuat demikian. Dewan ini diberitahu oleh Kementerian Sumber Manusia dengan panjang lebar berkenaan dengan faedah-faedah yang telah dibayar di bawah PERKESO semenjak tahun 1987 dan telah menafikan kepincangan seperti yang dibuat dalam Usul itu tadi.

Oleh yang demikian, perkara yang dibawa oleh Ahli Yang Berhormat dari Nilam Puri itu berkehendakkan masa yang panjang untuk membahaskannya dan tentulah tidak dapat diselesaikan dalam tempoh satu jam yang dikhaskan di bawah Peraturan ini. Oleh yang demikian, saya menolak Usul ini. *(Tepuk)*

## RANG UNDANG-UNDANG

### RANG UNDANG-UNDANG HIBURAN (WILAYAH PERSEKUTUAN KUALA LUMPUR)

Aturan Urusan Mesyuarat dibacakan bagi menyambung semula perbahasan yang ditangguhkan atas masalah, "Bahawa Rang Undang-undang ini dibacakan kali yang kedua sekarang." (27hb. Julai, 1992)

**Timbalan Yang di-Pertua (Tuan Ong Tee Keat):** Yang Berhormat dari Arau diminta sambung.

*3.45 ptg.*

**Tuan Shahidan bin Kassim (Arau):** Tuan Yang di-Pertua, saya ingin menyambung ucapan saya semalam.

Tuan Yang di-Pertua, yang pertama, kadang-kadang saya terfikir apa yang dimaksudkan dengan hiburan. Ini tafsiran sendirilah. Hiburan bagi saya sesuatu yang menyenangkan, sesuatu yang boleh menimbulkan kegembiraan di jiwa kita, sama ada kita buat sendiri ataupun dihiburkan oleh perkara-perkara luaran daripada diri kita ataupun oleh orang lain.

Jadi, sebelum saya sentuh ini, saya hendak sentuh sedikit hiburan yang berkenaan Usul tadi, kawan saya telah keluar.

Saya minta Menteri Sumber Manusia melihat balik ucapan yang saya buat berhubung dengan PERKESO yang lepas. Apabila Usul ini dibawa, saya tengok sedikit pun angka tidak lari dari yang saya beri semasa saya menyampaikan ucapan mengenai dengan PERKESO. Saya takut, sumber yang sama yang kita dapatkan untuk angka-angka tadi; jadi, saya kurang pasti sama ada angka ini betul ataupun tidak. Jadi, saya minta pihak PERKESO sebelum sumber yang sama juga pergi

kepada DAP, pergi kepada orang lain, sehingga boleh kita bincang dengan secara terbuka, sedikit pun tidak lari, empat minit satu kemalangan, semua yang saya cakap itu semua ada. Sebab dia hadir itu, dia tidak tahu yang saya telah bercakap.

Jadi, saya takut sumber ini sama, jadi kena tengoklah, kalau angka ini tepat anggap benda ini serius, kalau angka ini tidak tepat tolong buat pembedaan. Kalau tepat maknanya dia tiru saya, bukan saya tiru dia, sebab saya telah bercakap dahulu. Itu hiburan yang saya dapat sebentar tadi. Saya puas hati sebab ada orang meniru saya. Ini bercakap fasal Akta Hiburan.

Tuan Yang di-Pertua, sebelum saya sentuh lebih lanjut tentang Akta ini, saya hendak sentuh tentang beberapa watak yang telah bercakap mengenai Akta Hiburan. Watak yang pertama ialah sahabat saya daripada Bukit Bintang. Saya cukup hormat sahabat saya ini. Dia ini handsome, manis tetapi mulutnya bisa bukan main. Saya ingat kalau orang perempuan, jangan tengok muka sahaja, kena tengok mulut dia bercakap, bisa bukan main. Kalau mulut itu bercakap, dia lebih kuat menghiris, kadang-kadang orang perempuan tengok sekali, ingat dia handsome, dia boleh kira, tidak boleh. Mulutnya cukup bisa, tidak boleh terima. Dan dia bercakap pula, tunggu orang ini, tengok ini kenyataan dia: "Kalau Menteri yang berkenaan berani cabar saya, saya akan bercakap di luar." Ini Pembangkang apa ini? Tunggu orang cabar, baru cakap di luar. Kalau betul kita ada bukti yang Pegawai-pegawai Dewan Bandaraya ini rasuah dan sebagainya, cakap di luar. Ini menggunakan hak kita sebagai Ahli Parlimen untuk bercakap dan lepas cakap begitu sahaja kepada pegawai-pegawai yang tidak bermaya untuk mempertahankan diri. Kalau sekiranya pegawai-pegawai ini diajak bertinju, saya percaya pegawai-pegawai ini akan beri habis-habisan. Tetapi mereka tidak

ada pilihan, sebab kita ini ada cermin yang kita tidak boleh disentuh. Jadi, gunakan hak itu untuk mengata kepada siapa yang kita suka.

Kalau orang yang macam ini, hendak bercakap berkenaan hiburan, kita tidak boleh terima. Orang yang bercakap berkenaan hiburan ini kita hendak orang yang betul-betul mengetahui apa makna hiburan. Setengah orang kalau dia boleh berhibur hati dengan berwirid dan sebagainya, jadi orang yang tidak berwirid, dia anggap orang itu sudah buat berlainan daripada orang lain - tidak boleh. Kita kena tengok tafsiran hiburan dengan tepat sekejap lagi, saya hendak sentuh di sini fasal kawan saya ini.

Jadi, saya minta supaya dia tidak payah tunggu Menteri cabar, dia kata: "Kalau Menteri yang berkenaan hendak cabar saya, saya boleh ulangi di luar." Sebab Menteri, dia tidak hendak cabarlah kutu-kutu macam ini, Menteri hendak cabar macam mana. Kutu tua, ini chief kutu akan cabar dia. Saya cabar dia, ulang di luar, kalau dia beranilah. Kalau dia tidak berani, memang perangai Pembangkang pun tidak berani, semua berani bercakap di dalam sahaja ataupun keberaniannya hanya didasarkan kepada sesuatu yang boleh menggemparkan orang. \$5.70 pun dia hendak gempar seluruh negara, sampai dia minta anak dia bercakap, dia minta kawan-kawan dia bercakap, diktator dalam DAP ini suruh paksa orang bercakap untuk menyelamatkannya kerana tidak bayar tol \$5.70, di bawah \$10 kalau hendak dikira pun. Bawah \$10 pun hendak digoncangkan negara. Hendak rugikan masa dan pemikiran yang patut kita berhibur. Baik kita berhibur tengok benda-benda yang indah daripada memikirkan karenah di bawah \$10.00 ini, Tuan Yang di-Pertua. Ini saya rasa kalau semua rakyat di Malaysia digalakkan pemikirannya, suratkhbar tidak payah, kita kena tulis. Kita pun cari makan. Jadi, digemburkan pemikiran fasal bawah \$10.00 ini, saya memikirkan

begitu hebat, termasuklah fasal-fasal yang lepas baik juga. Seperti Pergau dan Lamborghini, kita terpaksa fikirkan. Pada hal perkara itu, kalau doktor, please correct me if I am wrong. Kita kena fikiran yang ada masa-masa yang kita perlu relax time. Kita tidak boleh memikirkan semua benda yang ditimbulkan oleh DAP mesti difikir dengan serius. Tidak ada serius pun. Semua orang tidak fikir benda itu. Saya pun kena traffic jam. Kalau boleh, saya hendak bayar double. Lepas sampai ke tol itu, saya bersyukurlah. Ini benda yang macam ini kita tidak boleh anggap, kita mesti hendak semua benda ini jadi elok. Ada hari yang tidak elok kerana dalam kehidupan manusia pun, ada hari hujan dan ada hari panas. DAP juga ada hari yang menang dan ada hari yang kalah. Yang dia kalah ialah Projek Tanjung II.

Jadi, demikian juga tentang perkara ini. Saya minta supaya tentang perkara ini Yang Berhormat Tuan Wee Choo Keong dari Bukit Bintang, you kawan baik saya, saya pun kawan baik juga. Tidak payah tunggu Menteri cabar. Saya cabar. Pergi ulang di luar, mana pegawai yang rasuah. Senang. Sebab saya kesian pegawai-pegawai itu tidak ada ini.....

**Tuan Wee Choo Keong:** (*Bangun*)

**Timbalan Yang di-Pertua (Tuan Ong Tee Keat):** Yang Berhormat....

**Tuan Shahidan bin Kassim:** Dia tidak boleh lawan balik. Kalau dia boleh lawan balik, sedaplah.

**Timbalan Yang di-Pertua (Tuan Ong Tee Keat):** Yang Berhormat dari Bukit Bintang bangun.

**Tuan Shahidan bin Kassim:** Yang Berhormat hendak apa?

**Tuan Wee Choo Keong:** Minta penjelasan.

**Tuan Shahidan bin Kassim:** Ini orang baik.

**Tuan Wee Choo Keong:** Memang. Tetapi minta penjelasan kepada Ahli Parlimen dari Arau, dia kawan baik saya - memang - tetapi saya hendak tanya dia sama ada beliau sedar atau tidak soal penyelewengan ini telah berlaku dari Backbenchers' Club. Backbenchers' Club dari Barisan Nasional, kalau saya tidak salah, \$175 ribu sudah hilang dan sama ada kes ini telah dilaporkan kepada Polis atau tidak? Terima kasih.

**Tuan Shahidan bin Kassim:** Yang Berhormat bertanya yang mana. Saya tak tahu nak masuk ke mana? Jawapan Yang Berhormat ini termasuk ke mana? Di bawah perkara berapa? Saya bercakap fasal lain, Yang Berhormat tanya fasal lain ini. Backbenchers' Club hilang \$175 ribu. Apa dia? Saya tidak faham. Macam inilah. Senang cerita.

**Tuan Wee Choo Keong:** Backbenchers' Club yang mana Ahli Parlimen dari Arau itu adalah Pengerusi sekarang.

**Tuan Shahidan bin Kassim:** Ya, memang saya Pengerusi.

**Tuan Wee Choo Keong:** Memang Yang Berhormat mesti sedar bahawa wang itu sudah hilang - \$175 ribu.

**Tuan Shahidan bin Kassim:** Sebab ini satu perkara yang menarik.

**Tuan Wee Choo Keong:** Ini perkara yang semua orang dalam Dewan ini sudah tahu dan di luar Dewan juga, semua orang tahu. Jadi, sekarang ini "open secret." Tolonglah beritahu Dewan yang mulia ini bahawa di mana wang ini sekarang. Kalau sudah hilang sama ada sudah buat satu laporan kepada pihak Polis ataupun tidak? Terima kasih.

**Tuan Shahidan bin Kassim:** Yang Berhormat Tuan Wee tidak payah drag kepada benda-benda macam inilah. Kita tidak menari dengan gendang yang tidak betul. Kalau Tuan Wee fikir benda ini tidak elok tetapi DAP hendak report, Backbenchers' Club tidak boleh layan. Ini bukan hak DAP tetapi hak Backbenchers' Club. Siapa-siapa pun boleh fikir kalau benda itu tidak elok. Pergilah cakap ke luar. Reportlah. Come on, Yang Berhormat biar terhormat sedikit cara bercakap. Kalau kita anggap orang itu ada rasuah, cari bukti dan pergi report. Jangan main hentam keromo. Tidak baik. Tidak baik. Kesian orang ini. Saya kesian kepada pegawai-pegawai Kerajaan ini. Dia punya gaji berapa sahaja? Kita bergaji mahal-mahal boleh katakan orang rasuah. Sedangkan kita dapat macam-macam kemudahan. Kemudahan yang diberi itu untuk mengata-ngata orang. Tidak bolehlah macam itu. Tidak eloklah, Yang Berhormat Tuan Wee. Kalau you ingat dia ada rasuah,.... sebab you selalu pergi ke diskokan? You ingat, dia ada rasuah sebab you pergi ke disko, you kena check lepas pukul 3.00 pagi, you tolong buat kuatkuasalah, you yang dilaksanakan ini. Saya sudah buat, undang-undang ini kata, tolong tutup pada pukul 3.00 pagi. Ini you entah tumpang semua. Mana kita tahu? Kalau tidak, macam mana you tahu tutup pada pukul 4.00 hingga 5.00 pagi kalau you sendiri tidak pergi ke sana? Maknanya saya rasa you pun terlibat dengan pegawai Bandaraya kalau ada terlibatlah. Itu tuduhan saya dalam Parlimen.

**Tuan Wee Choo Keong:** Hendak minta penjelasan. Tadi kenapa kawan saya dari Arau tidak jawab soalan saya? Tadi saya tanya sama ada wang \$175 ribu di Backbenchers' Club itu sudah hilang. Sama ada wang ini sudah hilang atau tidak? Dan khabar-khabar di sekitar Dewan yang mulia ini menunjukkan bahawa wang ini sudah hilang. Soal

disko-disko ataupun pub-pub yang tutup lebih daripada jam yang ditetapkan oleh Dewan Bandaraya, ini satu hakikat yang semua orang tahu.

**Timbalan Yang di-Pertua (Tuan Ong Tee Keat):** Yang Berhormat, Yang Berhormat boleh minta penjelasan. Bukan hendak buat ucapan.

**Tuan Wee Choo Keong:** Saya cuma hendak tanya dia sama ada dia sedar bahawa disko dan pub di kawasan Bukit Bintang dibuka lebih daripada jam masa yang ditetapkan oleh Dewan Bandaraya? Ini satu hakikat yang semua orang tahu, termasuk Timbalan Menteri pun tahu juga kes ini dan juga kes rasuah di DBKL ini, satu gejala berleluasa. Bukannya satu kes yang unusual. Semua orang tahu. Hendak minta lesen pun susah. Kalau ada buat bayaran, bukan bayaran yang ditetapkan oleh Kerajaan.

**Timbalan Yang di-Pertua (Tuan Ong Tee Keat):** Yang Berhormat, Yang Berhormat tidak boleh buat ucapan.

**Tuan Wee Choo Keong:** No, saya tanya dia sama ada dia sedar atau tidak?

**Timbalan Yang di-Pertua (Tuan Ong Tee Keat):** Ini bukan minta penjelasan.

**Tuan Wee Choo Keong:** Sama ada.....

**Timbalan Yang di-Pertua (Tuan Ong Tee Keat):** Cukup jelas.

**Tuan Wee Choo Keong:** Ahli Yang Berhormat dari Arau sedar atau tidak bahawa pegawai-pegawai DBKL ini sungguh ramai. Bukan semua. Ramai yang terlibat dalam rasuah, apabila orang minta lesen dan sebagainya. Semua mesti bayar lebih daripada caj yang sudah ditetapkan oleh DBKL. Terima kasih.

**Tuan Shahidan bin Kassim:** Tuan Yang di-Pertua, Yang Berhormat Tuan Wee, saya minta maaf. You kawan baik saya. Saya cukup sayang you tetapi cara you cakap ini tidak baik. Hukum semua pegawai Dewan Bandaraya ini tidak betul. Saya rasa Ahli-ahli Barisan Nasional tidak tahu disko dan pub itu ditutup pada pukul berapa? Pembangkang, termasuk PAS, mungkin tahu sebab you kata ini kenyataan umum, cuma fasal Pembangkanglah. Ini Barisan Nasional tidak tahu. You all selalu masuk pub dan disko, kita tidak tahu. Tetapi kalau tahu, kenalah buat laporan. Jangan main. Kita tidak boleh hentam keromo. Bagi saya, di antara pegawai yang paling bersih dalam dunia ialah pegawai Dewan Bandaraya sebersih Bandaraya Kuala Lumpur yang ada sekarang. *(Tepuk)*

Kalau sekiranya, selalunya kedudukan kakitangan Dewan Bandaraya itu menggambarkan keadaan di luar, kita pernah melawat. Tidak payah sebut, kita melawat negara-negara ASEAN. Cukup. Tidak payah sebut. Sebab kalau sebut, tidak sedap sedikit. Kita pernah melawat di sebelah sini—bandaraya itu. Kedudukan bandaraya memang di luar itu mesti ada hubungan-kait dengan dalam. Tanpa prejudice, contohnya, tetapi kalau sebut, tidak sedaplah sebab negara-negara jiran. Di luar macam-macam pun ada. Kalau Yang Berhormat Tuan Wee pergi ke sebelah sana di utara, utara lagi dari Perlis ini yang atas lagi - itu bandaraya. Macam-macam ada. Dia sudah pasti akan menggambarkan apa yang terjadi kepada bandaraya. Cuba lihat bandaraya kita. Di antara bandaraya yang tercantik dan terbersih dalam dunia. Sudah pasti ia menggambarkan apa yang pegawai-pegawai buat di dalam. Kalau ada satu-dua kejadian, ini tidak dapat dinafikan di mana-mana, termasuk DAP sendiri, termasuk semua pihak. Satu-dua kes kita tidak dapat dinafikan. Kalau tidak, pihak DAP tidak akan mengambil tindakan kepada Ahli-ahli Parlimennya, termasuk Ahli

Parlimen dari Bukit Bintang yang dahulu, Tuan Hu Sepang dari Rasah. Kita akan mengambil tindakan; di antaranya ada Ahli DAP yang DAP mengambil tindakan.

Demikian juga Dewan Bandaraya—kalau satu-dua orang yang terlibat. Jangan sebut pegawai-pegawai Dewan Bandaraya. Tidak betul! Sebab kita kena ingat, kalau sekiranya kita menegur secara membina, Dewan Bandaraya kita sudah pasti ia dapat dibangun dan dicantikkan dengan lebih baik lagi. Walaupun di kawasan bandaraya, kita tidak dapat undi. Tidak dapat undi, dikuasai oleh Pembangkang. Tetapi Kerajaan terus membangun bandaraya dengan lebih pesat daripada yang dibangunkan daripada kawasan-kawasan Kerajaan mendapat sokongan. Contohnya, termasuk Perlis sendiri yang beri 100% sokongan. Dalam Malaysia ini Perlislah, 100% sokongan kepada Barisan Nasional. Tetapi tidak pernah pun dibangunkan sepesat dengan bandaraya yang dikuasai oleh Pembangkang. Tetapi kita tidak mengambilkira perkara-perkara itu. Yang kita pentingkan di sini ialah bandaraya kita sihat serta bersih serta cantik dan dikenali dan diagung oleh dunia.

Jadi, saya minta Yang Berhormat Tuan Wee menarik balik. Kalau ada bukti, pergilah buat report. Tidak payah buat publisiti. Carilah sedikit benda-benda yang kita boleh beri sumbangan kepada masyarakat. Kalau ada tiga orang pegawai yang terlibat dalam rasuah, pergi report. Kalau Yang Berhormat Tuan Wee rasa sangat teruk, beritahu saya dan kita boleh pergi sama. Saya boleh belanja sebab Tuan Wee tuduh bahawa Barisan Nasional kaya, bolehlah saya ada sedikit gaji, dalam \$100 saya boleh belanja. Hendak tengok ke mana. Saya pun tidak tahu sebab saya tidak pernah masuk tempat-tempat seperti ini.

Jadi, bagi saya pegawai-pegawai Dewan Bandaraya janganlah terikut dengan tarian yang dibuat oleh kawan-kawan saya di sana sehingga apabila saya berjumpa dengan pegawai Dewan Bandaraya: Dia kata, "Kita buat macam manapun, semua tidak betul."

Tetapi kita kena ingat bahawa yang memerintah ialah Kerajaan Barisan Nasional dan Kerajaan Barisan Nasional tetap menghargai usaha-usaha dan sumbangan yang begitu gigih yang telah diberikan oleh pegawai-pegawai bandaraya dan juga pegawai-pegawai Kerajaan yang lain.

Lagi satu contoh yang dia beri, tengok di London dan Amerika. Kalau ada satu sandiwara yang memperli Kerajaan, memperli Perdana Menteri tidak ditangkap. Oh! Dia hendak di Malaysia ini jadi tempat permainan orang-orang yang tidak berbudaya. You hendak ambil contoh Amerika dan London yang kita tahu apa yang terjadi di sana. Mana ada budaya di sana. Di sana tidak payah kahwin boleh tidur sekali. Itu budaya apa? Ini Pak Nik marah, jangan main. Itu budaya yang Wee hendak bawa di sini. Itu bukan budaya kita. Kita harus ingat kita dihormati, yang pertamanya di samping kekuatan politik dan kekuatan ekonomi yang ada ialah kekuatan budaya kita. Ini yang harus kita pertahankan.

Amat malanglah Yang Berhormat yang handsome ini, yang sepatutnya mempunyai budaya yang tinggi, mulutnya ada kurang sedikit. Tetapi walau bagaimanapun dia boleh diperbaiki sebab bahasanya sentiasa lemah-lembut. Saya percaya dengan syarahan saya sebentar tadi dia telah sedar dan dia tidak akan berbuat lagi perkara-perkara macam ini. Kalau Wee sebut kita hendak mengambil budaya daripada Kelantan atau daripada Perlis kita hendak bawa ke Kuala Lumpur, saya akan sokong. DAP cakap pun saya sokong. No problem, jika dia minta saya setuju. Kalau ada pegawai-pegawai yang

terlibat dengan ini, kita ambil tindakan. Lepas itu Wee juga ada sebut dan saya hendak sentuh sedikit. Sebab saya kawan baik dia, saya panggil Wee, minta maaf - Bukit Bintang. Dia ada sebut dan saya bukan hendak mempertahankan sesiapa. Ini Betelnut, sepupu Menteri Tenaga, Telekom dan Pos.

Katalah saya jadi Perdana Menteri. Memang seumur hidup tidak akan dapat jadi Perdana Menteri sebab itu contoh ini baik sekalilah. Adakah sepupu saya mesti berhenti kerja tunggu saya beri gaji. Semua berhenti kerja, duduk di rumah biar perut buncit, kaki kecil, kepala besar jadi tidak boleh berjalan. Semua berhenti sebab hendak tunggu makan gaji daripada saya. Ini cerita apa? Kalau saya jadi DO semua adik beradik saya yang berniaga semua kena berhenti. Ini yang harus diperhatikan oleh pihak Ketua Setiausaha Negara, pihak Perdana Menteri termasuk DAP sendiri. DAP saya kurang pastilah. Bila dia jadi Ketua Pembangkang dia boleh ambil anak dia tetapi tidak terjadi begitu dengan kita.

Kita tidak mahu kalau sekiranya dia jadi Menteri, semua anggota keluarga dia mesti berhenti tunggu dia beri gaji. Tidak boleh, ini ikatan. Saya bukan hendak menyokong atau hendak menegur sesiapa tanpa prejudis. Tetapi jangan kata ini sepupu, rosak habis orang yang hendak berniaga pun sekarang tidak boleh. Kadang-kadang kalau dia sepupu Menteri yang berkenaan boleh diguna, tidak apa. Sepupu ini tidak boleh bekerja. Ini tidak boleh, jadi habis rosak negara. Sekarang ini kita kena fikir soal growth, soal pertumbuhan dan soal budaya kita. Siapa pun jadi Perdana Menteri itu tidak ada hubung-kait dengan bapa saudara, anak saudara buat kerja. Kalau kita mula melibatkan macam itu rosak negara. Jadi, semua orang tidak mahu jadi Perdana Menteri. Akhirnya negara ini tidak boleh diperintah oleh sesiapa kerana diperintah oleh diktator, baru kita puashati.

**Tuan Wee Choo Keong:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Bukit Bintang bangun.

**Tuan Shahidan bin Kassim:** Baiklah, itu secara ringkas saya hendak tegur sahabat saya dari Bukit Bintang supaya dia terus berwibawa dan berbudaya.

**Tuan Wee Choo Keong:** Minta penjelasan. Tadi kawan saya dari Arau, saya rasa dia sudah lupa apa yang saya sebutkan kelmarin mengenai dengan Betelnut. Apa yang saya sebutkan kelmarin bahawa Betelnut ini dioperate oleh sepupu Yang Berhormat Menteri Tenaga, Telekom dan Pos dan juga mereka beroperasi lebih daripada jam yang ditetapkan oleh Dewan Bandaraya dan tiada tindakan yang diambil oleh DBKL. Itu yang saya sebutkan dan bukannya sepupu Menteri atau sepupu Perdana Menteri tidak boleh buat perniagaan. Boleh, tetapi mereka mesti buat perniagaan menurut syarat-syarat yang ditetapkan oleh DBKL dan soalan saya kelmarin sebenarnya kenapa DBKL tidak ambil tindakan dengan sewajarnya dan kalau partner lain mungkin DBKL akan ambil tindakan. Soalan saya sama ada DBKL takut hendak mengambil tindakan oleh kerana operator Betelnut ini adalah sepupu Yang Berhormat Menteri Tenaga, Telekom dan Pos. Itu soalan saya dan bukan yang lain. Terima kasih.

**Tuan Shahidan bin Kassim:** Itu saya bersetuju, kalau Betelnut melanggar peraturan, kita akan ambil tindakan. Tetapi seolah-olah kenyataan Yang Berhormat itu, "di depan Holiday Inn On the Park yang dikawal oleh sepupu Yang Berhormat Menteri Tenaga, Telekom dan Pos yang sangat famous sekarang ini." Jadi, kalau kenyataan ini ada bentuk perlu dan sebagainya. Seolah-olah kalau terlibat yang ini, mesti tidak ambil tindakan. Bukan itu sahaja sebab Bukit

Bintang kata banyak lagi di Bukit Bintang yang juga melanggar peraturan. Kita ambil tindakan dan kita minta supaya Dewan Bandaraya beri elaun khas kepada sahabat saya dari Bukit Bintang supaya dia tolong jadi pegawai ronda dan penguatkuasa sama sebab dia tahu banyak. Saya mengenai Bandaraya tidak tahu banyak. Beri elaun dan kad kuasa supaya dia boleh tuntutan sama. Saya ingat bagus juga beri elaun supaya dia boleh masuk bersama-sama hendak jadi undercover atau apa-apa yang patut supaya dia boleh tolong. Ini Ahli Parlimen yang bagus yang boleh tolong kita bersama. Orang yang macam ini kena beri sokongan supaya dia dibenarkan untuk tolong Bandaraya. Saya takut kalau dia ada sepupu, dia hendak tutup pula.

Baiklah, Tuan Yang di-Pertua, saya sambung balik. Orang lain saya tidak tegur, saya cuma hendak tegur tentang sahabat ini supaya dia terus menjadi DAP yang berwibawa. Kita hendak cuba naikkan dia supaya menjadi DAP yang berbudaya dan berwibawa. Dengan itu kita pun seronok untuk bekerjasama. Pada masa sekarang ini ke arah proses itu tetapi pada hari ini dia telah pincangkan sedikit kakinya sebelah. Kita hendak pasang balik supaya dia terus berwibawa. Dia ini budak baik dan boleh diperbetulkan.

Saya melihat kebaikan Akta ini daripada perkara-perkara yang berikut. Yang pertama saya melihat bahawa kuasa pengecualian yang diberikan kepada Dato Bandar ini adalah cukup penting. Pada masa sekarang kita lihat walaupun pertunjukan-pertunjukan kebudayaan yang dianjurkan oleh Kerajaanpun oleh kerana mereka terpaksa keluarkan lesen, kita kenakan bayaran. Jadi, kuasa yang diberikan kepada Dato Bandar ini sekurang-kurangnya membolehkan perkara-perkara ini dapat dikecualikan dengan segera tanpa kita merujuk panjang-panjang kepada Treasury dan sebagainya.

Lagi satu, saya juga hendak meminta oleh kerana budaya ini penting dikembangkan, budaya yang sihat. Kalau mengikut PAS dikir barat dan wayang kulit, budaya-budaya yang boleh dikembangkan. Pada masa sekarang tiap-tiap kali kita ada pertunjukan, saya rasa pertunjukan teater sekarang ini Raja Lawak, sebelum ini saya tengok Vision 2020. Raja Lawak ini mungkin pengarah itu ada kurang sedikit. Tetapi yang lain-lain saya tengok okay. Tetapi saya hendak tunjukkan di sini bahawa teater ini adalah satu perkembangan yang sihat. Ia boleh banyak memberi pendidikan. Saya sendiri banyak mendapat pendidikan dari segi pendidikan keduniaan dan juga rohani. Banyak perkara-perkara dan mesej-mesej yang diberi itu betul-betul menikam kalbu.

Saya minta Menteri Kebudayaan, Kesenian dan Pelancongan - Timbalan Menteri ada di sini - supaya beri pas-pas kepada sahabat-sahabat saya dari PAS dan Semangat 46 ataupun saya boleh tolong mereka ini pergi tengok. Ini bukan ada apa-apa. Ini satu bentuk budaya yang harus dikembangkan kerana sihat dan malah mesej-mesej yang berbentuk keagamaan boleh kita salurkan melalui perkara ini. Tidak payah kita bercakap, pukul orang kata orang ini buat tidak betul, masuk neraka - susah. Ini yang diberi secara tidak langsung yang menusuk kalbu. Betul-betul boleh mempengaruhi tetapi oleh kerana dia menjual tiket sudah pasti dia kena bayar lesen. Saya kurang pasti. Saya tanya pegawai Bandaraya, tiap-tiap lesen yang dikeluarkan mesti dikenakan bayaran. Oleh kerana ini perkembangan baru dan ditonjolkan oleh mereka yang bukan mempunyai pendapatan yang tetap, people like Rahim Razali tetapi semua yang dia arahkan pasti boleh menggonggong perasaan dan meng-gembirakan.

Apakah pengecualian Datuk Bandar boleh memikirkan sesuatu budaya yang sihat dikembangkan melalui pengecualian cukai ini? Saya harap benda ini boleh dibuat bukan sahaja untuk memberi kemudahan kepada badan-badan kebudayaan pihak Kerajaan untuk mendapatkan pengecualian tetapi dari segi satu usaha untuk memperkembangkan satu budaya yang sihat, budaya yang diterima oleh unsur-unsur Islam dan sebagainya. Termasuk juga yang lain yang perlu dilihat, yang patut dikembangkan demi untuk kita bangunkan rakyat Malaysia dengan orang kata Rakyat Malaysia yang betul-betul menepati kehendak Wawasan 2020. Rakyat yang berbudaya, bersemangat tinggi, semangat patriotik yang tinggi dan juga mempunyai daya, moral yang tinggi dan sebagainya. Jadi, cuma satu soalan sahaja dalam Akta ini, di bawah takrifan itu (c) sarkas dan pameran binatang. Saya dok dengar, banyak kali Menteri Pertanian telah sebut Pertandingan Ratu Cantik Binatang. Adakah dia dapat lesen? Sebab itu Pameran Binatang. Apakah dia terlibat? Sebab saya pernah tengok Royal Agricultural Show dekat Stonley. Saya tengok Pertunjukan Binatang, Pertandingan Ratu Cantik Binatang yang dibuat tiap-tiap minggu. Jadi, apakah ini boleh digalakkan dalam bentuk ini, yang boleh diberi pengecualian? Jadi, pada masa sekarang jika dibuat adakah dikenakan lesen dan sebagainya?

Kemudian Tuan Yang di-Pertua, ini kuasa mahkamah. Kita bersyukur sebab sekarang ini mahkamah boleh memberi hukuman yang maksimum dan tinggi kepada mereka yang terlibat. Saya pasti sudah sebab pada masa yang lepas hukuman denda yang begitu rendah menyebabkan operator-operator haram bertindak berleluasa, berbuat sesuatu mengikut mereka suka. Cumanya, Akta yang begini baik Tuan Yang di-Pertua, apakah boleh dalam Mesyuarat Kerajaan-kerajaan yang dibuat dari semasa ke semasa supaya dikembangkan

dan disambung terus kepada Majlis-majlis Tempatan dalam seluruh negara. Saya harap tidak dapat dibezakan. Sebab saya tengok Akta yang ada ini cukup baik. Sebab hukuman mahkamah yang ada, mungkin dalam Majlis Bandaran Tumpat, mungkin dendanya \$1,000. Jadi, operator haram boleh bertindak dengan cara berleluasa. Sekarang ini kalau saya tidak silap, di antara \$10,000 hingga \$25,000. Tetapi cukup tinggi, cukup boleh menakutkan mereka yang hendak bertindak secara haram. Cuma cadangan saya, sebab Menteri Bandaraya ini adalah Perdana Menteri dan Timbalannya boleh menggunakan pengaruh-pengaruh masing-masing untuk dikembangkan ataupun untuk dipastikan supaya Majlis Bandaran yang lain ataupun Majlis Tempatan yang lain mengikut undang-undang yang dibuat untuk bandaraya.

Kemudian kita juga semalam telah dipertikaikan. Ini saya tak payah sebutlah, sebab semalam Bukit Bintang sudah sebut. Memang dia ada sebut. Tapi ini kuasa Menteri. Kuasa Menteri semalam saya sudah sebut. Memang kuasa Menteri cukup penting. Sebab, kita kena ingat kalau sekiranya berlaku perkara-perkara yang kurang manis berhubung dengan moral, berhubung dengan lain-lain benda yang tidak elok mengenai anak-anak muda Malaysia ini, Kerajaan yang akan dipertikaikan, makanya kuasa Menteri bukan sahaja untuk hiburan malah untuk segala-galanya kuasa Menteri saya ingat itu perlu diadakan. Sebab yang hendak bertanggungjawab kita, kuasa terakhir. Kuasa yang membolehkan Kerajaan bertanggungjawab di atas apa yang terjadi. Kalau sekiranya Kerajaan buat benda yang tidak betul, Kerajaan akan diturunkan dan digantikan oleh Kerajaan yang lain. Jadi, elok sekali semua Akta dimasukkan kuasa Menteri. Mengapa kita harus hendak pertikaikan kuasa Menteri. Kalau sekiranya kita tidak puas hati, dan rakyat tidak puas hati dan rakyat boleh ganti dengan orang lain. Tetapi

kita bertanggungjawab. Untuk bertanggungjawab, kita mesti sesuatu kuasa yang terakhir untuk menjamin supaya apa yang kita buat itu kita bertanggungjawab.

Kemudian ini pasal video game. Lagi sekali wakil daripada Sungai Besi, kalau tidak silap. Ha, ini lagi seorang yang gemar bercakap lepaslah! Ini pasal video game. Saya lihat memang undang-undang yang ada sekarang ini memastikan supaya anak-anak sekolah diambil tindakan, anak-anak sekolah di bawah umur 18 tahun diambil tindakan bagi mereka yang bermain video game kecuali kalau ada pengawasan ibu bapa. Cumanya saya minta pihak Bandaraya supaya lesen untuk video game ini tidak dikeluarkan di rumah-rumah kedai yang terceruk. Kalau boleh dikeluarkan di pasaraya yang lebih terbuka, dan menjadi tumpuan ramai. Dengan itu, sukar bagi untuk berleluasa di tempat-tempat yang macam ini. Tetapi kalau kita keluarkan license di kedai-kedai di bawah pokok cherry, di hujung Sungai Besi sana, Seputeh sana, Kampung Pandan sana jadi senanglah budak-budak ini masuk dan sebagainya.

Jadi, kedudukan sekarang, saya rasa penguatkuasaannya cukup bagus. Cumanya, kepada mereka-mereka yang menegur, saya berharap kalau kita nampak anak-anak di bawah 18 tahun terlibat kita pergi buat laporan segeralah kalau kita tidak boleh ambil tindakan. Kita tak payah tunggu sampai Parlimen bersidang untuk dijadikan isu. Sebab benda ini sebenarnya bukan isu. Kalau kita hendak tegur sekiranya betul ada video game melibatkan gambar perempuan yang bogel, maka kita pergi buat laporan. Kadang-kadang kitapun tengok hingga habis dulu, baru hendak pergi buat laporan. Jadi, kita anggap satu kes itu, melibatkan seluruh video game. Ini kena fikir dua. Satu kalau game of skill, patut kita bagi sokongan. Jangan kita anggap video game ini semua dah rosak. Sebab kita tidak ada pilihan.

Budak-budak sekarang - kalau dulu boleh. Tuan Yang di-Pertua tak tahulah, sebab ada di Sabah. Saya kalau di Perlis dulu saya main senapang itu,. senapang kayu, senapang kayu dengan buah "cherry" yang boleh meletup itu.

Jadi macam-macam, main pedang "samurai" masa itu. Sekali-sekala boleh bertinju, sampai besar pun dok bertinju lagi. Macam-macam boleh kita main, tapi sekarang dah tak ada benda-benda itu. Kadang-kadang main macam-macam lah kita boleh main di kampung. Sekarang tak ada. Kalau tak ada di mana budak-budak ini hendak lepaskan masa dan tenaganya yang berlebihan. Mesti ada tempat. Kalau tidak ke sanalah dia pergi - dadah.

Ini semua tempat-tempat hiburan ini, saya bukan, setengah yang unIslamic saya tak sokong. Tetapi tiap-tiap benda yang terkawal, yang boleh kita kawal kita kena sokong termasuk menghisap dadah. Kalau ada Dato' Megat Junid saya kata, kalau orang menghisap dadah di Malaysia ini apakah boleh kita benarkan hisap dadah dengan syarat dia mesti datang mengambil supply dadah daripada balai polis. Kita control. Penghisap-penghisap kita sediakan 4-5 pulau untuk hisap dadah sahaja. Ini apa yang berlaku di Holland dan di China. Bandar yang paling rendah sekali orang yang menghisap dadah ialah di bandar yang membenarkan, Kerajaan tempatan benarkan orang menghisap ganja. Di bandar yang saya sebut itu, tempat tinggal Natrah, orang Islam yang masuk Kristian itu; Natrah. Dia duduk di bandar itu. Sebab saya duduk di Holland lama. Jadi, duduk di bandar itu, di bandar itu dia benarkan hisap ganja dengan syarat supply ganja itu mesti didapatkan daripada balai polis. Dan ini merupakan bandar yang paling rendah hisap ganja. Siapa yang hendak berani datang balai polis selalu. Dia kena semua.

Jadi, macam inilah, Polis dengan syarat mesti ada tempat-tempat yang dia mesti laporkan diri selalu. Di akhirnya

bandar ini di antara bandar yang paling rendah termasuk juga di China. Ada satu billion penduduk yang mana banyak dulunya suka hisap candu. Sekarang ini penghisapan candu di China kurang. Sebab siapa yang hendak hisap candu mesti pakai topi yang tulis "dia hendak berapa gram". Pergi balai polis kena queue dekat sebatu, tiap-tiap seminggu ataupun tiap-tiap sebulan dan sebagainya. Jadi, di antara negeri yang kurang hisap candu, saya percayalah, ini mengikut laporan yang melalui penceritaan, kecuali di Belanda tadi mengikut kenyataan. Orang yang kurang hisap candu, sebab dia malu dihina oleh masyarakat dan sebagainya. Jadi, benda ini benda terkawal termasuk video game dan sebagainya, asalkan terkawal kita boleh nampak. Benda ini biar berlaku depan mata. Segala-gala yang haram sekarang ini kalau sekiranya mudah berleluasa ditindak secara haram, Kerajaan mesti berbuat sesuatu yang Kerajaan boleh nampak dengan mata. Ini secara undang-undanglah, Pak Nik. Cara kita hendak ubahkan moral, rohani mereka itu kita buat cara lain. Ini cara undang-undang, yang benda ini sedang berjalan sekarang.

Kita tak boleh kata kereta kita sedang berjalan di tengah-tengah highway, kita fikir hendak perbaiki kereta, maka kita berhenti di tengah-tengah highway, tak boleh, kereta mesti jalan terus. Tetapi kita akan fikirkan benda-benda ini bila kita lencong sedikit, kita berhenti di tepi jalan, dalam masa yang sama kita jangan ganggu trafik yang berjalan, sebab kalau tidak nanti, kita tak boleh bayar tol. Itulah perjalanan hidup yang saya maksudkan tadi. Benda ini berlaku di depan mata, mengapa PAS kata, ini tak boleh. Apa yang boleh? Apa yang sedang dibuat di Kelantan oleh sahabat saya semalam, dia telah menyebut dengan cara panjang lebar di mana banyak benda-benda yang kita jangan anggap ini boleh dan itu tak boleh, sebab mungkin

M.P. Kelantan ini tidak ada hubungan dengan state, dia tak tahu apa state buat, jadi kadang-kadang ada bertelagah sedikit pendapat di sini dengan pendapat di state.

Akhir sekali, Tuan Yang di-Pertua, ini berhubung dengan anak-anak muda di bawah umur 18 tahun. Ini saya dimaklumkan, saya tak tahu, bukan semua tempat hiburan yang telah disebutkan di sini, yang menulis anak-anak di bawah umur 18 tahun tidak dibenarkan masuk, tidak semua tempat. Kalau sekiranya ditulis benda-benda ini semacam di setengah hotel-hotel terkemuka, yang saya tahu di hotel-hotel, kadang-kadang ke lobby masuk itu kita nampak, kalau dia tulis dengan cara itu sekurang-kurangnya dia beri amaran, sebab kadang-kadang tengah kesesakan mungkin tak sempat hendak check I.C. dan sebagainya. Ini kita kena pastikan. Soal di bawah 18 tahun ini banyak lagi yang saya hendak sentuh kerana ini boleh melibatkan masa depan dan juga kedudukan masyarakat sendiri.

Saya juga hendak tegur, saya harap *Malay Mail* janganlah marah, sebab suratkhbar ini tak boleh marah selalu, kalau marah nanti, sukar kita dibuatnya. Kadang-kadang kita pameran umur 17 tahun di depan *Malay Mail* itu, dia bercita-cita hendak jadi model, kalau bercita-cita hendak jadi pilot tak apa juga. Jadi saya cadangkan yang 18 tahun ke bawah juga jangan dipamerkan, sebab dia manusia, dia tengok gambar dia cantik, lepas itu sudah pasti bila dia cantik, tentulah budak ini ada telefon di rumah, jadi banyaklah telefon berdering akan merosakkan pelajarannya. Budak-budak yang masih dalam sekolah, saya minta suratkhbar yang really care dengan orang ramai ini supaya pastikan jangan dipamerkan, nanti budak-budak ini dia syok sendiri, dia dapat hiburan sendiri, dia mula layan telefon, dia tak boleh baca buku dan sebagainya.

Maaf bercakaplah, kadang-kadang kita orang tua ini pun baca *Malay Mail* ini tengok-tengok ada gambar cantik terbaca yang itu dahulu, pada hal yang penting itu yang lain, tetapi sebab *Malay Mail* pandai, dia bubuh yang itu. Kalau lepas 18 tahun, okay. Saya ingat bagus juga hendak tunjukkan ramai rakyat Malaysia yang cantik, tetapi bawah 18 tahun, kebanyakannya saya baca tiap-tiap hari, sedang hendak ambil SPM, pasti sudah dia akan diganggu. Maaf bercakaplah, sebab ini tujuannya untuk memberi pendidikan. Saya juga seperti orang PAS juga sekarang ini, saya ingin memberi banyak pendidikan keagamaan kepada kawan-kawan supaya ini boleh mewujudkan rakyat Malaysia yang lebih sihat. Jadi pasti sudah kalau boleh dibuat supaya perkataan "18 tahun" itu dimasukkan.

Kemudian, soal penjualan minuman keras dan sebagainya, saya tanya Dewan Bandaraya, dia kata bukan kuasa dia, itu kuasa JAWI. Di antara Yang Berhormat boleh tegur JAWI, bagaimana JAWI hendak buat, cukupkah JAWI untuk pergi check semua hotel dalam Malaysia? Tetapi buatlah sesuatu yang tidak merosakkan suasana negara yang sekarang ini sedang berjalan dengan baik dan dengan penuh budaya yang tinggi.

Dengan kata-kata itu, Tuan Yang di-Pertua, saya menyokong supaya Akta Hiburan ini diluluskan. Saya juga minta supaya semua pihak pada hari ini oleh kerana sekarang ini dengan Akta ini kita dapat mengadakan hiburan dengan lebih teratur dan murni. Tetapi kita pada hari ini tanpa prejudis, memberi sedikit tanda penghargaan dan tahniah kepada Bandaraya. Bandaraya ini bukan sahaja Bandaraya, tetapi Chief Bandaraya, Timbalan Menteri, Perdana Menteri sudah banyak berjasa kepada negara, termasuk sumbangan ke arah kemenangan kita dalam Thomas Cup juga adalah sokongan daripada orang Bandaraya dan sebagainya. Kita berilah sedikit penghargaan. Jangan

lemparkan kata-kata yang boleh menyayatkan hati, seolah-olah sumbangan mereka selama ini tidak mendapat penghargaan. Sebenarnya kami orang-orang Barisan Nasional, termasuk yang lain-lain yang belum bercakap lagi itu, sudah pasti mereka menyokong dan memberi penghargaan. Berilah sumbangan yang baik ini terus-menerus dan terus kita jadikan rakyat Malaysia sebagai rakyat yang berbudaya dan mengadakan hiburan dengan terkawal. Saya menyokong.

**Timbalan Yang di-Pertua (Tuan Haji Juhar bin Haji Mahiruddin):** Pengkalan Chepa.

4.25 ptg.

**Tuan Haji Nik Abdullah bin Haji Arshad (Pengkalan Chepa):** Tuan Yang di-Pertua, saya ucap terima kasih kerana dapat saya mengambil peluang sama untuk berbahas Rang Undang-undang yang dibentangkan di hadapan kita pada petang ini. Terima kasih juga saya ucapkan kepada usaha pihak Kerajaan untuk mengemuka dan membentangkan Rang Undang-undang ini bagi mengawal dan menjaga peraturan mengenai perlesenan hiburan. Walau bagaimanapun, bila kita renung dan teliti secara mendalam Rang Undang-undang yang dibentangkan pada hari ini kita tidak dapat melihat tujuan murni yang ada dalam Rang Undang-undang ini.

Rang Undang-undang ini mempunyai 31 Fasal dan ditunjuk jenis-jenis hiburan yang berkait sebanyak 26 jenis. Kerajaan sendiri tentulah mempunyai hujah dan alasan yang munasabah yang menyebabkan Rang Undang-undang Hiburan ini dikemukakan.

Tuan Yang di-Pertua, sebenarnya hiburan ini adalah unsur-unsur semulajadi dan ianya merupakan naluri dan tabiat yang wujud dalam diri setiap insan. Islam sendiri tidak pernah

menghalang secara total tentang unsur-unsur hiburan ini. Hiburan menjelma dalam perkembangan masyarakat melalui dua saluran. Pertama, hiburan yang boleh mencetuskan jiwa manusia ke arah kesedaran dan keinsafan. Kedua, hiburan yang membawa manusia kepada kelalaian dan kelekaan.

Dalam Rang Undang-undang ini kita dapat menanya manakah pengenalan dan penentuan salah satu hiburan yang menjadi target penghalangan atas kehendak Rang Undang-undang ini. Rang Undang-undang Hiburan yang dibentangkan bagi Wilayah Persekutuan ini tidak memperkenalkan dan menentukan kepada umum tentang manakah satu jenis hiburan yang tidak dibenarkan oleh pihak berkuasa. Hanya pihak berkuasa akan melihat pelanggaran-perlanggaran yang akan dilakukan oleh orang-orang berkenaan dan akan menghukum mengikut seksyen dan fasal-fasal yang ditentukan dalam Rang Undang-undang ini.

Tuan Yang di-Pertua, berdasarkan Rang Undang-undang ini masyarakat bebas untuk mengadakan apa sahaja jenis hiburan asalkan tidak bercanggah dengan Akta yang diluluskan ini walaupun ia membawa kepada unsur-unsur negatif dan merosakkan, seperti joget lambak yang sudah lama mati tetapi dihidupkan kembali oleh UMNO sekarang. Rang Undang-undang ini memberi ruang yang begitu luas ke arah amalan yang tidak menentu dan tidak bermatlamat. Ini adalah suatu usaha yang merugikan dan gejala yang merosakkan.

Perkataan "hiburan", Tuan Yang di-Pertua, dikenali umum bahawa ianya unsur-unsur meleka dan melalaikan manusia dan ia juga punca kepada gejala-gejala keruntuhan akhlak masyarakat dan mukadimah maksiat. Pusat-pusat hiburan yang bertaburan di merata-rata ceruk sekarang ini menjadi sasaran dan pengkalan muda-mudi melepaskan kehausan hawa dan keinginan remaja

yang berakhir dengan terjerumusnya mereka ke dalam gaung syaitan dan iblis laknatullah. Muzik rock dan lakonan drama dan filem yang menjadi tarikan penonton- penonton hari ini adalah suatu gejala yang kurang sihat, tetapi ada suara dari Menteri Kerajaan sendiri hendak berdakwah melalui rock dan ada pula Menteri lain hendak mengadakan pelajaran seks di sekolah-sekolah kalau dapat kelulusan Kabinet.

Tuan Yang di-Pertua, nyatalah Kerajaan hari ini tidak mempunyai hasrat dan niat untuk bertindak secara tegas dalam mencegah satu-satu kemungkaran melalui kuatkuasa undang-undang. Candu tidak haram, arak tidak haram, judi tidak haram, hiburan tidak haram dan apa sahaja pun tidak haram asalkan ada lesen dan patuh kepada undang-undang Kerajaan sekarang. Inilah yang telah berlaku, sedang berlaku dan akan berlaku terus-menerus mengikut apa yang kita saksi dalam pentadbiran Kerajaan yang ada pada hari ini.

Satu ketika dahulu saya telah bercakap panjang di waktu Kerajaan membentangkan Rang Undang-undang mengenai dadah, begitu juga arak, walaupun arak ini dengan nas yang terang, dengan nas yang jelas mengikut Islam adalah haram dan tidak ada pilihan bagi kita orang Islam untuk menolak dan sebagainya. Tetapi oleh kerana Kerajaan ada sesuatu kepentingan dan tidak merasa bertanggungjawab dengan hukum Allah, maka berlakulah candu haram, candu halal, arak halal, arak haram, judi haram, judi halal—halal sekiranya ada lesen, haram sekiranya tidak ada lesen—tetapi soal hukum tidak berbangkit. Di samping itu Kerajaan mengambil peluang untuk mendapat hasil untuk menambah kewangan negara melalui punca-punca maksiat, melalui punca-punca haram, begitu jugalah Akta Hiburan pada hari ini.

Kerajaan membentangkan Rang Undang-undang hari ini dan Kerajaan akan minta sokongan supaya Rang Undang-undang ini dilulus dan insya Allah memang Rang Undang-undang apapun bila dibentangkan di sini insya Allah lulus, walau bagaimana menentangpun, kerana 2/3 majoriti di tangan Kerajaan. Tetapi apakah yang perlu kita fikir dan perlu kita kemukakan satu Rang Undang-undang sekiranya Rang Undang-undang itu sendiri tidak berfungsi? Matlamat Kerajaan jaga sahaja tingkah-laku rakyat apa keinginan rakyat—boleh, undang-undang sudah ada dan Kerajaan tidak menyekat. Ini langsung bercanggah dengan unsur-unsur pendidikan yang bermatlamat untuk melahirkan insan salih, kamil, abid dan sebagainya, sebagaimana yang ditonjol dan dilaung-laungkan oleh Menteri Pendidikan dahulu. Itulah makna pendidikan, dari Kementerian Pelajaran terpaksa diubah bahasanya dengan nama 'Pendidikan'. Ini seolah-olah bagi orang ahli ilmu, dan dalam pengertian 'ilmu' ada beza 'pelajaran', Menteri Pelajaran dengan Menteri Pendidikan. Kalau disebut Menteri Pelajaran ertinya tanggungjawab memberi kefahaman, memberi pengenalan dari sudut ilmu supaya tahu membaca dan tahu menulis, tetapi lain dari segi Menteri Pendidikan, tidak setakat cukup dengan mengajar manusia membaca, menulis tetapi bertanggungjawab membentuk peribadi manusia....

**Wan Hanafiah bin Wan Mat Saman:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang Berhormat Kota Setar bangun. Dia hendak minta jalan.

**Tuan Haji Nik Abdullah bin Haji Arshad:** Ada selalunya.

**Wan Hanafiah bin Wan Mat Saman:** Tuan Yang di-Pertua, saya minta jalan dari Pengkalan Chepa ini, sebab saya cukup tertarik dengar hujah beliau, tetapi saya hendak tahu, adakah beliau ini diterima di Kelantan sebagai penasihat Kerajaan Negeri Kelantan supaya membuat perkara-perkara yang boleh menjadi contoh. Sebab yang saya tahu apabila dengar ucapan dari Ahli Pasir Mas, perkara-perkara ini masih wujud di Kelantan, jangan selalu mengkritik Kerajaan Persekutuan sahaja, PAS ada Negeri yang mereka memerintah, kenapa tidak buat atau mempraktik dengan Kerajaan Kelantan?

**Tuan Haji Nik Abdullah bin Haji Arshad:** Habis dah?

**Wan Hanafiah bin Wan Mat Saman:** Sudah.

**Tuan Haji Nik Abdullah bin Haji Arshad:** Tuan Yang di-Pertua, kalau dia tidak bangkitpun, saya sudah baca *Hansard* semalam, ada Wakil dari Pasir Mas membangkitkan apa yang berlaku di Kelantan.

Sebenarnya apa yang dibangkitkan itu orang tidak ada modal, jadi itu sebablah hari ini menjadi isu pemimpin-pemimpin UMNO Kelantan untuk berceramah di merata-rata tempat, tidak ada modal lain, sedangkan dia tidak sedar dan dia tidak tahu apa yang dihitung perkara yang berlaku di Kelantan sedangkan PAS memerintah sudah 17 bulan, apakah gelap, buta mata atau buta hati 30 tahun Kerajaan Pusat memerintah Malaysia, negara penuh dengan punca maksiat. (*Tepuk*) Apa tidak perhati?

**Wan Hanafiah bin Wan Mat Saman:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang Berhormat, Kota Setar bangun lagi Yang Berhormat.

**Tuan Haji Nik Abdullah bin Haji Arshad:** Sabar, biar saya jelas dahulu, nanti tidak faham tanya pula. Itulah yang menjadi hujah, yang menjadi isu merata-rata berceramah, tiap-tiap kampung cerita serekah Islam. Semalam ada cerita serekah Islam, dia tafsir sendiri. Kalau pada satu masa dahulu ada cerita Rambung dari Siam, tetapi dia tidak sedar, dia buka pintu pagar, dia lepas kambing, bila kambing makan dia marah. Dia buka pintu pagar, dia lepas kambing, bila kambing masuk, kambing makan tanaman, dia marah-marah siapa?

Yang kedua, saya kasihanlah kepada orang Pasir Mas ini, molek-molek sudah masuk dalam Angkatan, sudah menang, panas punggung, geli punggung, lompat cari (*Ketawa*)....

**Tuan Haji Ibrahim bin Ali:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang Berhormat Pasir Mas bangun ya.

**Tuan Haji Nik Abdullah bin Haji Arshad:** Cari apa?

**Timbalan Yang di-Pertua (Tuan Haji Juhar bin Haji Mahiruddin):** Dia bangun Yang Berhormat.

**Tuan Haji Nik Abdullah bin Haji Arshad:** Orang tidak 'bertuah' cari 'tuah'.

**Tuan Haji Ibrahim bin Ali:** Minta jalan.

**Tuan Haji Nik Abdullah bin Haji Arshad:** Boleh.

**Tuan Haji Ibrahim bin Ali:** Tuan Yang di-Pertua, saya berterima kasihlah kepada Yang Berhormat dari Pengkalan Chepa kerana memberi laluan.

Saya tidak bercadang untuk mengambil kesempatan hentam-menghentam. Saya bangkitpun dengan niat yang baik, sesama sebagai seorang Islam, soal saya pindah atau tidak pindah, tidak usah putar perkara itu. Yang saya hendak bangkit ialah perkara macam mana Kerajaan PAS boleh membenar sarkas ini diadakan di Kelantan dan dari segi pertunjukan yang diadakan, memang mendedahkan aurat. Ini yang saya bangkitkan dan tak usah emosional, pemimpin tidak boleh emosional. Jangan emosional. Saya hanya minta tolong jelaskan kerana dalam perkara ini kalau sudah terbuat, kata terbuat, yang akan datang tidak akan buat lagi, sama dengan Yang Berhormat cadang kepada Kerajaan Pusat, tegur mana yang baik. Saya ini muda daripada Yang Berhormat Pengkalan Chepa, hendak belajar dari Yang Berhormat Pengkalan Chepa juga, jangan emosional tidak tentu fasal. Okay?

**Tuan Haji Nik Abdullah bin Haji Nik Arshad:** Tuan Yang di-Pertua, saya susah hendak bercakap dengan wakil dari Pasir Mas ini, sebab lidah dia fasih, (*Ketawa*) tetapi dia tidak tahu tanggungjawab. Saya sudah jawab, siapa dia buka pintu pagar? Apakah Kerajaan panggil, Kerajaan minta, tidak.

Yang keduanya, dia tidak faham Islam, secara sebenar, sebab kalau dia faham Islam, masa 17 bulan tidak sama dengan masa 30 tahun, sebab itulah kalau dia baca Sejarah Islam, berapa kali turun ayat yang boleh mengharamkan arak, empat kali turun ayat, baru mengatakan haram arak itu, tidak turun selalu, apakah Tuhan tidak tahu arak ini haram? Tuhan tahu, tetapi mengapa tidak haram selalu? Suasana begitulah juga kami di Kelantan hari ini menghadapi penuh berbagai-bagai dituba oleh UMNO, yang sengaja cari peluang untuk menggugat kedudukan. Mungkin sarkas inipun satu daripada aktiviti, satu daripada usaha. Kami bukan menyokong, dan kami tidak bersedia untuk hendak mengadakan

perkara-perkara seumpama ini, tetapi dengan umur kami 17 bulan takkanlah mampu kami hendak menyelesaikan segala masalah. Tetapi kalau orang lain 30 tahun, tunggu tengok masa depan kami, insya Allah.....

**Wan Hanafiah bin Wan Mat Saman:** (*Bangun*)

**Tuan Haji Ibrahim bin Ali:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Dua orang bangun Yang Berhormat.

**Tuan Haji Nik Abdullah bin Haji Arshad:** Nanti dulu. Sekarang kami sedang mencari untuk mengenal pasti sesuatu. Bila kami dapat mengenal pasti sesuatu kami akan ukur dengan bidang kuasa yang ada pada kami dan kami akan bertindak. Kuasa pun kami terhad. Sebab itu tidak payah soal. Tidak perlu soal tetapi kerana... saya hendak kata jahil, tidak sampai hati...

**Tuan Haji Badruddin bin Amiruddin:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang Berhormat, Jerai bangun.

**Tuan Haji Nik Abdullah bin Haji Arshad:** Tetapi saya erti, jauh. Tidak erti. Sila.

**Tuan Haji Badruddin bin Amiruddin:** (*Bangun*)

**Tuan Wan Hanafiah bin Wan Mat Saman:** (*Bangun*)

**Tuan Haji Ibrahim bin Ali:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang mana satu ini. Jerai.

**Tuan Haji Badruddin bin Amiruldin:** Terima kasih, Tuan Yang di-Pertua. Assalamualaikum, Pak Nik.

Tuan Yang di-Pertua, saya ingin sedikit penjelasan. Di dalam rancangan agama Islam kita ini adakah pertunjukan sarkas itu halal atau haram. Kalau haram adakah Kerajaan Negeri Kelantan walaupun 17 bulan memerintah dan tahu benda itu haram dibenarkan benda itu berjalan sehinggakan kita dapat melihat wanita-wanita yang memakai seluar-seluar pendek, yang memakai coli-coli yang agak memberahikan terbang melayang-layang seperti yang tergambar di sini. Kalau Tuan Yang di-Pertua hendak tengok saya hendak hulur...

**Timbalan Yang di-Pertua (Tuan Haji Juhar bin Haji Mahiruddin):** Tidak payahlah.

**Tuan Haji Badruddin bin Amiruldin:** Tidak payah. Cukuplah apa yang saya kata ini insya Allah benar. Jadi, itulah penjelasan yang saya ingin dapat daripada Wakil Rakyat Pengkalan Chepa. Terima kasih.

**Tuan Haji Nik Abdullah bin Haji Arshad:** Yang Berhormat dari Jerai hendak tahu hukum. Tanyalah Jabatan Agama Islam Pusat. (*Ketawa*) Dia ada jabatan, dia ada Ulamak. Tanyalah hukum boleh tidak boleh. Kalau sana kata boleh, boleh. Kalau sana kata tidak boleh, tidak boleh.

**Tuan Haji Badruddin bin Amiruldin:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Yang Berhormat, dia bangun lagi, Yang Berhormat.

**Tuan Haji Badruddin bin Amiruldin:** Tuan Yang di-Pertua, bukan saya tidak hendak tanya Jabatan Agama Islam, tetapi Yang Berhormat kita ini dia

seolah-olah dia begitu arif tentang agama. Jadi, berilah jawapan tentang soalan saya.

**Tuan Haji Nik Abdullah bin Haji Arshad:** Orang macam ini tidak payah layan, Tuan Yang di-Pertua. (*Ketawa*)

**Tuan Haji Badruddin bin Amiruldin:** (*Bangun*)

**Timbalan Yang di-Pertua (Tuan Haji Juhar bin Haji Mahiruddin):** Dia bangun lagi Yang Berhormat.

**Tuan Haji Nik Abdullah bin Haji Arshad:** Tidak boleh dah. Cukup dah.

**Timbalan Yang di-Pertua (Tuan Haji Juhar bin Haji Mahiruddin):** Dia tidak beri Yang Berhormat.

**Tuan Haji Badruddin bin Amiruldin:** Dia tidak faham bahasa Kedah, kita cakap bahasa Kelantan.

**Tuan Haji Nik Abdullah bin Haji Arshad:** Cukuplah, cukup.

**Timbalan Yang di-Pertua (Tuan Haji Juhar bin Haji Mahiruddin):** Cukup Yang Berhormat.

**Tuan Haji Badruddin bin Amiruldin:** Faham tidak faham, apa pasal tidak boleh layan.

**Tuan Haji Nik Abdullah bin Haji Arshad:** Kalau faham duduklah. (*Ketawa*)

**Tuan Haji Badruddin bin Amiruldin:** Jawapan tidak dapat lagi. Belum ada jawapan lagi. Tidak boleh macam itu.

**Tuan Haji Nik Abdullah bin Haji Arshad:** Lebih daripada jawapan saya beri itu. Tuan Yang di-Pertua, cara amalan dan style pentadbiran Kerajaan

secara demikianlah menyebabkan negara Malaysia hari ini terdedah kepada gejala-gejala maksiat. Dan hidupnya budaya-budaya Jahiliah seperti zaman lampau dan tumbuh bercambah di merata-rata daerah amalan-amalan yang meruntuh dan bercanggah dengan adat resam Timur dan nilai-nilai Islam terutama sekali melalui bentuk-bentuk hiburan yang berhubungkait dengan Rang Undang-undang ini.

Banyak masyarakat rosak dan mudamudi terperangkap hasil dari pengaruh hiburan yang tidak menentu dan tidak beridentiti. Sepatutnya Kerajaan dalam membenteng Rang Undang-undang yang mengawal hiburan-hiburan, Kerajaan juga memperkenalkan dan menentukan mana jenis hiburan yang bercanggah dengan budaya negara Malaysia dan bertentangan dengan nilai-nilai Islam. Kerajaan bertanggungjawab membentuk dan mendidik naluri manusia ke arah pengabdian hidup terhadap Allah yang maha esa melalui hiburan ini. Dan Kerajaan tidak boleh membiar dan melepas tangan dari membawa mereka menuju keredhaan Allah: "Kemudian kamu pasti akan ditanyai pada hari itu tentang kenikmatan."

Kita boleh gembira, kita boleh suka, kita boleh bangga dengan hiburan-hiburan. Dan manusia memang perlu kepada hiburan lebih lagi orang yang penat, orang yang letih, orang bekerja keras perlu kepada hiburan. Sebab itu Islam tidak melarang secara total tentang hiburan ini. Tetapi Islam ada prinsip untuk mengikuti hiburan dan melayan hiburan. Sebab itulah dengan kesukaan itu, kalau kita orang beriman percaya kepada akhirat, kita mati. "Kemudian kamu pasti akan ditanyai pada hari itu tentang kenikmatan." Besok satu-satu kamu akan ditanya, nikmat yang kamu rasa, nikmat yang kamu dapat; serupa orang UMNO dan Kerajaan Malaysia ini berbangga dengan projek, berbangga dengan pembangunan. Dia rasa itu sudah

cukup apabila dia dapat tetapi dia tidak tahu apa yang dia buat itu benar ataupun tidak benar. Inilah masalah yang saya suka menarik perhatian pihak Kerajaan dan mengingatkan kepada Kerajaan bahawa setiap apa yang kita akan laku terutama sekali untuk membenteng Rang Undang-undang biarlah fungsinya murni dan matlamatnya sampai kepada hakikat. Sebagaimana saya bangkit dalam Akta Dadah dua hari lepas, di mana pihak Kerajaan sudah sampai kemuncak membuat pindaan Akta Dadah dan tidak ada lagi undang-undang yang lebih daripada hukum mati. Tetapi sekarang masih tidak berjaya. Bahkan pengakuan jelas daripada pihak yang berkenaannya: dadah meningkat. Ini menunjukkan usaha Kerajaan hari ini tidak tepat dengan apa yang sebenar yang dikandung dalam peribadi tiap-tiap manusia. Kalau peribadi ini rosak, rumah tangga rosak. Kampung rosak, daerah rosak, masyarakat rosak, akhir sekali negara rosak. Sebab itulah setiap bentuk Rang Undang-undang mestilah ada penentuan untuk menegak keadilan dan mengelak dari sebarang keburukan.

Jadi, saya tidak nampaklah Rang Undang-undang yang dibenteng hari ini walaupun melalui 31 Fasal, tetapi hakikat murninya saya tidak nampak.

Saya berharap, Tuan Yang di-Pertua, kepada Menteri mengikut Fasal 30 Akta ini supaya menjaga kuasa dan jangan salahguna kuasa yang ada untuk menimbulkan sesuatu yang bercanggah dengan matlamat hiburan ini.

Saya menyokonglah Rang Undang-undang ini dengan harapan supaya kuasa yang ada di tangan orang berkenaan itu mesti dijaga. Dan kalau boleh carilah ikhtiar untuk mengelak Bandaraya Kuala Lumpur yang menjadi ibu negara Malaysia, yang menjadi cermin dan muka kepada seluruh pandangan dunia supaya Bandaraya Kuala Lumpur ini dengan keagungan projek, dengan keagungan pembangunan janganlah pula

dia jadi sarang punca maksiat. Sebab hari ini muda-mudi sudah terlibat dan bandar Kuala Lumpur ini merupakan pengkalan.

Kita dengar macam-macam cerita. Bila orang datang ke Kuala Lumpur bukan dia cerita bangunan tinggi, bukan dia cerita bandaraya bersih tetapi dia cerita, cerita, cerita..benda yang boleh melemahkan kekuasaan kita.

Sebab itulah, Tuan Yang di-Pertua, apa yang saya saran pada petang ini saya harap akan mendapat perhatian pihak Kerajaan. Sekian, terima kasih.

**Timbalan Yang di-Pertua (Tuan Haji Juhar bin Haji Mahiruddin):**  
Muar.

*4.48 ptg.*

**Tuan Abdul Malek bin Munip (Muar):** Tuan Yang di-Pertua, di sini izinkan saya turut serta mengambil bahagian dalam perbahasan mengenai undang-undang yang akan mengawasi hal-hal hiburan untuk Wilayah Persekutuan.

Sepanjang-panjang perbahasan yang telah dilafazkan di dalam Dewan ini, terdapat beberapa perkara pokok yang telah diutarakan oleh Ahli-ahli Yang Berhormat yang saya kira perlu mendapat perhatian kita bersama-sama. Kerana perkara-perkara itu merupakan kontroversi yang tanpa penelitian yang saksama boleh memerangkap kita ke dalam satu kesimpulan dan andaian yang merugikan.

Pada hari semalam umpamanya, kita mendengar bagaimana pihak Pembangkang telah mengungkitkan masalah kebebasan, masalah freedom dalam mendakwa pihak yang berkuasa melaksanakan keputusannya dalam bidang kegiatan hiburan di Wilayah Persekutuan.

Sekali imbas ungkapan pihak Pembangkang itu yang merujuk khusus kepada satu peruntukkan khas dalam Bill yang dibentangkan di Dewan ini seolah-olah boleh meyakinkan kepada kita sebagai satu hujah yang munasabah dan rasional. Namun demikian, apabila diteliti dengan lebih terperinci, diteliti dan diterapkan dalam tradisi berhujah pihak Pembangkang, istimewa pula apabila menggunakan prinsip kebebasan, prinsip demokrasi dalam hujah mereka maka kerap kali ternyata hujah mereka itu dangkal (superficial), hujah yang jika diterima akan memansuhkan keberkesanan pelaksanaan undang-undang itu sendiri atau juga barangkali jika diterima akan memberi mereka peluang yang lebih untuk memutarbelitkan kes-kes yang mungkin akan ditimbulkan di mahkamah kelak. Atau dalam perkataan lain meraih keuntungan, mencari duit, memandangkan banyak daripada mereka terdiri daripada orang-orang yang terlibat dalam pekerjaan yang umurnya muda sedikit daripada pelacuran.

Tuan Yang di-Pertua, kebebasan memanglah amat asas dalam sebuah negara demokrasi seperti negara kita. Namun demikian, demi memelihara maruah dan martabat kebebasan, kebebasan yang melulu, kebebasan yang tidak terbatas, kebebasan 100% memang tidak pernah ada. Oleh kerana itu, dalam masyarakat yang bertamadun kita wajib berkhikmah, wajib bijaksana, wajib bertanggungjawab dalam memelihara dan mengamalkan prinsip kebebasan itu terutamanya di negara kita. Ada kalanya kita boleh bebas sebeb-bebasnya, ada kalanya kita perlu menghadkannya supaya kebebasan itu tidak terancam, dan ini apatah lagi dalam satu bidang kegiatan seperti hiburan iaitu suatu bidang yang amat sensitif terutama dalam masyarakat berbilang budaya dan agama, satu bidang yang melibatkan masaalah nilai, kesopanan dan budi, bahkan kadang-kadang akidah masyarakat kita.

Dari satu segi, hiburan boleh kita tafsirkan sebagai satu yang positif dan bukan hiburan semata-mata, bukan hiburan *per se*. Dari satu segi juga, keperluan kepada hiburan di kalangan manusia adalah suatu yang hampir bersifat semulajadi, suatu yang natural, yang fitrah kepada manusia. Oleh kerana itu dalam usaha manusia mengisi keperluannya untuk berhibur, segala bakat kreativitiya digerakkan, diperah dan digunakan untuk mengisi keperluan itu. Dari segi ini, hiburan boleh ditafsirkan sebagai pengucapan kreatif atau creative expression satu-satu masyarakat dan lazimnya pengucapan kreatif satu-satu masyarakat itu tidak pernah terlepas daripada berpandu kepada nilai, norma dan kesopanan masyarakat itu sendiri. Satu-satu pengucapan kreatif yang bercanggah dengan norma-norma itu lazimnya akan ditolak dan tidak akan diterima oleh masyarakat itu.

Dari segi ini hiburan sebagai pengucapan kreatif masyarakat adalah suatu aspek yang penting dalam kebudayaan kita dan dalam masyarakat yang terbuka seperti kita pengucapan kreatif atau hiburan adalah satu proses yang berterusan, satu proses yang hidup, yang berkembang dan dalam banyak hal amat berpengaruh dalam menentu dan mencorak-warnakan kebudayaan dan seterusnya keperibadian atau identiti sesuatu masyarakat itu. Keperibadian atau identiti sesuatu masyarakat atau sesuatu bangsa itu adalah satu perkara yang amat penting yang mempamerkan ketinggian mertabat dan maruah bangsa itu. Begitu juga seterusnya dari segi agama kita yang suci, keperibadian bangsa itu menjadi faktor yang penting menentukan syiar atau imej agama kita di mata dunia.

Tuan Yang di-Pertua, dalam rangka pentakrifan istilah hiburan sebagai pengucapan kreatif masyarakat yang berterusan seperti ini dan di atas keinsafan bahawa ianya merupakan

proses pembudayaan atau cultural process yang amat penting yang akan membentuk generasi kita dan cucu-cucu kita, maka pemimpin-pemimpin kita dahulu dengan penuh rasa tanggungjawab telah mewariskan kepada kita satu Dasar Kebudayaan Kebangsaan yang masih kita perakukan sehingga sekarang.

Jika kita imbas kembali, kita dapat mengambil iktibar bagaimana proses menerokai dan akhirnya membentuk Dasar Kebudayaan itu hampir-hampir gagal semata-mata kerana bantahan dan hujah-hujah palsu yang dikemukakan oleh pihak Pembangkang yang berselindung di sebalik tabir kata-kata kebebasan, iaitu kebebasan budaya.

Tuan Yang di-Pertua, proses menerokai dan seterusnya membentuk Dasar Kebudayaan Kebangsaan, iaitu selepas peristiwa 13 Mei telah melibatkan seluruh masyarakat ilmuwan di negara kita, iaitu pakar-pakar kebudayaan dalam segala bidang dan telah dirangka di atas keinsafan bahawa dalam masyarakat berbilang keturunan dan budaya, proses pembudayaan ke arah pembentukan satu bangsa Malaysia yang padu, iaitu jaminan supaya peristiwa berdarah 13 Mei tidak berulang, wajiblah merupakan satu proses pembudayaan yang berancang dan berpandu kepada prinsip-prinsip yang khusus. Ianya tidak boleh sekali-kali dibiarkan begitu sahaja, tidak boleh dibebaskan secara melulu dan prinsip ini juga diterapkan dalam Dasar Ekonomi Baru di mana restructuring of our society menjadi salah satu matlamat utama.

Namun demikian, parti Pembangkang di masa itu dengan lantang dan penuh keghairahan menentang habis-habisan Dasar Kebudayaan Kebangsaan. Dengan cogankata "Kebebasan", iaitu kebebasan kebudayaan yang telah mereka takrifkan untuk keperluan mereka sendiri, mereka menentang, menolak, menafikan dengan sombongnya prinsip bahawa tradisi

tempatan, tradisi bumiputera, tradisi bangsa Melayu di bumi Malaysia sebagai teras, sebagai asas kepada pertumbuhan kebudayaan dan identiti bangsa Malaysia. Mereka dengan terang-terang cuba memutuskan faktor kesinambungan sejarah dan budaya negara kita seolah-olah berkata, kita sudah terputus dari akar budaya yang tumbuh dan berkembang di bumi kita ini, seolah-olah negara kita merupakan bumi yang gersang, bumi yang tidak pernah bertuan. Sebaliknya, parti Pembangkang ini atas nama kebebasan telah mencipta satu ideologi perjuangan yang dinamakan multi-culturisme atau multi-lingualisme iaitu cita-cita untuk menghina dan merendahkan mertabat budaya dan Bahasa Malaysia di Malaysia setaraf dengan apa-apa budaya dan apa-apa bahasa di dunia yang dituturkan di negara kita dan sehingga ke hari ini inti dari prinsip multi-lingualisme dan multi-culturisme masih mendasari perjuangan parti Pembangkang itu.

Yang amat aneh dan mengaibkan, terdapat pula parti-parti sekarang ini yang berteraskan masyarakat Melayu seperti parti S.46, bahkan parti PAS sekalipun yang sanggup bekerjasama dalam satu wadah manifesto yang sama dengan parti yang terang-terang memperjuangkan keruntuhan mertabat budaya dan Bahasa Malaysia. Sayogia diingatkan bahawa dalam rangka erti budaya yang luas, kesultanan dan agama adalah merupakan sebahagian daripada erti budaya itu. Dalam konteks seperti inilah kita ingin bertanya kepada parti S.46 dan PAS, tidakkah permaufakatan politik dengan parti DAP sekalipun atas alasan strategi politik, tidakkah ianya merupakan penggadaian maruah bangsa dan syiar agama? Tidakkah ini merupakan satu dosa (sin) kepada generasi Melayu yang akan datang?

Tuan Yang di-Pertua, baru-baru ini dalam Dewan yang mulia ini telah ditimbulkan satu soalan mengenai direktori telefon dalam bahasa Cina. Sekali imbas ini adalah soalan biasa.

Akan tetapi jika ditilik dalam rangka proses pembudayaan kepelbagaian masyarakat kita ke arah pembinaan bangsa Malaysia yang beridentiti, soalan itu sebenarnya mempunyai implikasi yang lebih luas. Kita tertanya-tanya iaitu setelah masuk ke dekad yang keempat, kita hidup sebagai bangsa Malaysia yang merdeka dan berdaulat, adakah masih terdapat golongan masyarakat Malaysia yang tidak tahu dan belum menguasai Bahasa Malaysia? Adakah perlu kita menampung keperluan golongan masyarakat Malaysia yang sengaja enggan mempelajari Bahasa Kebangsaannya sendiri selepas lebih daripada 35 tahun, sedangkan penguasaan Bahasa Kebangsaan ini pernah dijadikan syarat kerakyatan? Atau adakah kita terlalu lemah dalam melaksanakan dasar bahasa hingga lahir satu generasi yang tidak tahu dan tidak perlu tahu bahasanya sendiri, atau sebaliknya adakah mungkin nanti kita terpaksa mengeluarkan Directory dalam Bahasa Iban, Bahasa Tamil atau barangkali bahasa apa sahaja selaras dengan perjuangan multi-lingualism Parti DAP? Satu perkara barangkali, dan ini pernah dilafazkan oleh penyokong Kerajaan semalam dari Pasir Mas, iaitu mengenai perhitungan komersial atau commercial consideration dalam bukan sahaja penyediaan Directory, tetapi juga dalam kegiatan-kegiatan budaya dan hiburan yang lain. Sesungguhnya perhitungan komersial dan kebebasan budaya jika tidak diseimbangkan dengan matlamat yang lebih tinggi, yakni matlamat membina Bahasa Malaysia yang berperibadi, boleh membawa padah yang buruk dalam pengendalian kegiatan-kegiatan hiburan di Ibu Kota kita Kuala Lumpur.

Seperti yang saya katakan tadi bahawa hiburan sebagai satu seni adalah merupakan satu pengucapan kreatif yang berterusan satu-satu masyarakat. Ianya merupakan satu bidang budaya yang amat penting, bahkan kemajuan, hatta

**Tuan Yang di-Pertua:** Yang Berhormat, ada yang bangun, Yang Berhormat.

**Tuan Haji Wan Mohd. Jamil bin Wan Mahmood:** Saya tidak beri laluan.

**Tuan Yang di-Pertua:** Tidak beri laluan, ya.

**Tuan Haji Wan Mohd. Jamil bin Wan Mahmood:** Ya. Apakah kesan daripada perbuatan itu sama ada kesan jangka pendek dan juga kesan jangka panjang terhadap masyarakat dan generasi yang akan datang?

**Tuan Yang di-Pertua,** kepada Kementerian yang berkenaan atau kepada Kerajaan, saya mohon jawapan ke manakah arah tuju masyarakat dan generasi kini, khususnya wargakota dengan Akta yang sedang dikemukakan atau disogokkan kepada kita sekarang ini. Apakah Kerajaan ke arah mewujudkan sebuah negara yang bermoral atau sebuah negara yang tidak bermoral? Negara beradab atau negara yang biadab?

Untuk mewujudkan negara yang beradab merupakan satu tugas yang bukan ringan. Saya percaya dan saya yakin tidak ada di kalangan Ahli Dewan ini yang tidak setuju dengan pendapat saya. Jika bersetuju marilah kita bersama-sama merealisasikan kehendak di dalam bentuk perbuatan dan undang-undang untuk kita mengimplementasikan kepada masyarakat. Bak kata pepatah Melayu, berat sama dipikul, agar kita dapat membentuk generasi yang beradab dan negara beragama atau berakhlak yang akan disegani oleh kawan dan lawan.

**Tuan Yang di-Pertua,** saya menyokong penuh dengan pendapat Timbalan Menteri Perusahaan Awam yang tidak ada di dalam Dewan ini. Di dalam satu ucapannya di Pahang yang ada menyebut, pertandingan ratu cantik bukan budaya kita. Sepatutnya ucapan

seperti itu tidak keluar daripada Timbalan Menteri berkenaan. Sepatutnya ucapan seperti itu kita dengar daripada Yang Berhormat Menteri Perusahaan Awam sendiri atau Yang Berhormat Menteri di Jabatan Perdana Menteri atau daripada Yang Berhormat Menteri Kewangan.

**Tuan Yang di-Pertua,** saya mengucapkan syabas kepada Timbalan Menteri Perusahaan Awam. Barangkali perkembangan baru yang terjadi kepada beliau adalah hasil daripada seringnya berdamping dengan Yang Berhormat Menteri Perusahaan Awam yang kita sama-sama tahu latar belakang kelulusan dan pengajiannya.

**Tuan Yang di-Pertua,** sudah sampai masanya pertandingan ratu cantik di negara kita diharamkan oleh Kerajaan kerana ia tidak dapat memberi apa-apa faedah pun sama ada dari segi pendidikan dan perkembangan budaya bangsa. Amalan pertandingan ratu cantik ialah satu budaya jahiliah yang diimport ke negara kita semenjak penjajahan British Kolonial. Sekarang sudah lama kita merdeka tetapi yang mendukacitakan dalam soal hiburan kita belum merdeka. Masih terikut-ikut dengan budaya-budaya asing yang sangat keji dan tidak sesuai dengan budaya tempatan apalagi kalau dilihat dari kacamata Islam dan dasar penerapan nilai-nilai Islam yang dilaungkan oleh Kerajaan sekarang. Konsep hiburan dalam Islam ialah apa sahaja yang menyenangkan sama ada perbuatan, pendengaran atau kata-kata yang membawa manusia ke arah kebaikan dan membenci kerosakan.

Saya mengalu-alukan kenyataan Yang Amat Berhormat Dato' Seri Perdana Menteri yang menyatakan akan mengenakan hukuman sebat kepada bapa dan ibu ayam. Bagaimana dengan pelacuran itu sendiri? Menurut kenyataan polis hampir 100 pusat pelacuran di Wilayah Persekutuan Kuala Lumpur. Ini tidak termasuk Johor Bahru, Pulau Pinang, Ipoh dan Kuantan. Malu

kita kepada negeri China yang telah mengadakan dasar hiburan nasionalnya di mana kegiatan pelacuran diharamkan dan telah mengenakan hukuman berat kepada pelacur-pelacur dan bapa juga ibu ayam. Sebelum kegiatan ini berakar umbi di dalam masyarakat, Kerajaan sewajibnya berusaha untuk mengatasinya demi mewujudkan masyarakat yang sihat dan sejahtera dalam negara kita ini.

Tuan Yang di-Pertua, saya suka menyentuh sedikit tentang karaoke, saya belum pergi tetapi saya difahamkan. Apakah pihak yang bertanggungjawab sedar bahawa pusat-pusat hiburan karaoke dan bar-bar yang tumbuh seperti cendawan di sekitar Kuala Lumpur yang membuat pertunjukan 100% bogel. Jika sedar, apakah sikap dan tindakan yang akan diambil. Begitu juga dengan rumah-rumah urut (*Disampuk*) - bukan soal Kota Bharu di mana tetapi persoalan apakah kesan kepada masyarakat kita. Saya rasa sebagai seorang Yang Berhormat tidak akan menyampuk dengan ucapan yang tidak senonoh kepada saya. Begitu juga rumah-rumah urut yang telah menyediakan perkhidmatan pelacuran sebagai matlamat utamanya atau sampingannya.

Tuan Yang di-Pertua, apa yang mendukungitikan saya sebelum daripada ini ada dua orang pegawai Kerajaan yang benar-benar mengambil berat soal perkembangan maksiat di Bandaraya Kuala Lumpur ini iaitu yang pertama bekas Ketua Polis Daerah Campbell dan yang kedua Pegawai Agama Istana Negara sekarang ini. Kedua-duanya telah diberi amaran oleh pihak berkenaan, oleh pihak yang berwajib, oleh Kementerian yang berwajib kerana perbuatan atau tindakannya itu telah dianggap mengganggu kelancaran Tahun Melawat Malaysia yang baru berlalu di negara kita ini.

Selain daripada itu, Tuan Yang di-Pertua, apakah Kerajaan sedar bahawa buku panduan pelancongan yang

diterbitkan oleh pihak berkuasa pelancongan Singapura ada menyebut Johor Bahru adalah merupakan syurga seks selepas Haadyai. Ini amat menyedihkan kita. Adakah pihak Kerajaan sedar atau tidak? Apakah langkah-langkah yang diambil oleh Kerajaan? Saya harap pihak Kerajaan akan mengambil langkah-langkah yang lebih positif dalam persoalan ini supaya keadaan hiburan di negara kita dan semoga soal budaya negara kita tidak akan dihanyutkan oleh pengaruh-pengaruh yang tidak bertanggungjawab. Ketahuilah bahawa dengan perkembangan dan gejala hiburan tanpa batas telah melahirkan kesan yang buruk di dalam masyarakat kita seperti melarikan diri daripada keluarga, isu gadis hilang, penagihan dadah dan wabak-wabak AIDS yang semakin berleluasa, pelacuran di kalangan pelajar sekolah, perempuan-perempuan pejabat dan sebagainya. Lantaran itulah Islam telah menetapkan prinsip di dalam soal hiburan ini iaitu sebagaimana firman Allah S.W.T yang bermaksud: Janganlah kamu menghampiri zina. Apa yang saya lihat semua bentuk hiburan kebanyakannya yang ada pada hari ini, semuanya menuju ke arah zina. Pihak Kerajaan seharusnya mengkaji dan meneliti dan cubalah mengatasi dengan sedaya upaya yang ada.

Tuan Yang di-Pertua, akibat daripada kegiatan hiburan yang tidak mempunyai dasar dan terkawal telah meningkatkan golongan remaja yang melibatkan diri di dalam jenayah berat dan kes-kes yang melibatkan seks. Ini telah meningkatkan atau membimbangkan kepada semua pihak terutama ibu bapa.

Tuan Yang di-Pertua, sekiranya trend ini berlanjutan maka sudah pasti akan hancurlah kita dan akan hancurlah masyarakat kita dan seterusnya akan hancurlah negara kita. Perangkaan yang telah dikeluarkan oleh Kementerian Perpaduan Negara dan Pembangunan Masyarakat menunjukkan pada tahun 1989 seramai 400 orang remaja telah

dipenjarakan di atas kesalahan jenayah berat, 168 dihadapkan ke mahkamah atas kes-kes yang melibatkan seks. Pada tahun 1989 seramai 19,875 orang juvana telah dibawa kemuka pengadilan di atas berbagai-bagai kesalahan jenayah. Peringkat umur remaja adalah tahap yang memberangsangkan mereka untuk mencuba dan merasa apa yang mereka lihat dan mendengarnya. Kita sebagai pimpinan perlulah sensitif dalam soal-soal seperti ini.

Tuan Yang di-Pertua, masih kita ingat lagi tajuk utama sebuah akhbar tempatan yang melaporkan seramai 357 pasangan remaja yang berkelakuan tidak senonoh di khalayak ramai telah didenda pada enam bulan pertama tahun yang lalu. Penolong Pengarah Dewan Bandaraya Kuala Lumpur mendedahkan bahawa setengah pasangan yang ditangkap itu sedang melakukan hubungan seks di celah-celah semak pada siang hari. Taman Tasik Perdana merupakan tempat yang paling diminati untuk kegiatan-kegiatan yang seperti itu. Keinginan remaja melakukan perbuatan sumbang, hubungan seks, bercengkerama di khalayak ramai adalah akibat daripada tayangan filem-filem Barat yang berunsur seks dan mengghairahkan. Saranan Pengarah Pusat Islam Universiti Sains Pulau Pinang yang menyebut Kerajaan perlu menyediakan langkah-langkah bagi menghalang dan menyekat gejala-gejala buruk itu kerana ia boleh menjejaskan masyarakat di masa kini dan akan datang, perlulah diambil perhatian.

Tuan Yang di-Pertua, dalam Akta yang dibentangkan ini tidak kurang daripada 11 perkara yang didefinisikan sebagai hiburan. Umumnya hiburan yang dimasukkan di sini tidak memberi erti yang memuaskan dari sudut agama Islamnya adalah agama rasmi negara.

Contohnya, Tuan Yang di-Pertua, lihat perayaan menyambut tahun baru 1991 yang diadakan di Dataran Merdeka,

lebih 100,000 orang yang hadir termasuklah Yang Amat Berhormat Perdana Menteri dan Yang Berhormat Menteri Kebudayaan, Kesenian dan Pelancongan. Di mana Yang Amat Berhormat merasmikan majlis tersebut dengan bacaan "Bismillahir-rahmanir-rahim". Mufti Kerajaan Perak telah memberi pendapat tentang perayaan menyambut tahun baru yang diadakan seperti ala Trafalgar Square itu tidak sesuai dengan Islam.

Tuan Yang di-Pertua, saya harapkan acara menyambut tahun baru seperti itu tidak akan berulang lagi di masa-masa yang akan datang, sesuai dengan Dasar Belia Negara (DPN) yang digubalkan pada tahun 1985. Antara lain tujuannya ialah untuk melahirkan belia-belia yang mengamalkan cara hidup beragama dan bermoral tinggi. Buat akhirnya saya mengucapkan terima kasih.

**Tuan Yang di-Pertua: Kampar.**

*5.42 ptg.*

**Tuan Wong Wing On (Kampar):** Tuan Yang di-Pertua, terima kasih kerana memberi peluang kepada saya untuk membahas Rang Undang-undang Hiburan (Wilayah Persekutuan Kuala Lumpur) 1992. Ucapan saya pendek sahaja. Saya merujuk kepada Fasal 12 Rang Undang-undang Hiburan Wilayah Persekutuan Kuala Lumpur yang memberi kuasa yang mutlak dan muktamad kepada seorang Menteri dalam keputusan mengeluarkan lesen hiburan.

Tuan Yang di-Pertua, kami tidak membantah usaha untuk mengawal hiburan memandangkan situasi sekarang di mana tempat-tempat hiburan telah "mushrooming" di Kuala Lumpur dan menjadi punca-punca jenayah dan sebagainya, terutamanya menjadikan pemuda-pemudi mangsa hiburan-hiburan yang tidak sihat. Tetapi Pemuda DAP ingin membantah dengan sekeras-kerasnya Fasal 12 yang memberi kuasa

yang begitu dictatorial kepada Menteri kerana Fasal ini akan menjadi punca yang lebih besar untuk korupsi dan penyelewengan dan penyalahgunaan kuasa dalam tangan seseorang.

Tuan Yang di-Pertua, kita semua dalam zaman yang moden ini percaya dan sokong konsep "The Rule of Law". Tetapi sekarang ini Fasal 12 ini mencerminkan bukan "The Rule of Law" tetapi "The Rule of Men". Tuan Yang di-Pertua, dalam zaman ini kita tidak boleh lagi menerima "The Rule of Men" dalam pengurusan hal-ehwal awam. Sebagai contohnya, dulu semasa D.P. Vijandran duduk di atas kerusi itu, siapa boleh percaya bahawa dia boleh jadi satu "monster" atau "sexual monster". Tetapi sekarang telah terbukti bahawa seperti apa yang dikatakan dia melakukan perbuatan yang begitu jahat dan zalim terhadap wanita. The moral of the story ialah dalam zaman ini kita tidak wajar dan tidak boleh memberikan kuasa kepada sesiapa dalam pengurusan hal-ehwal awam.

Tuan Yang di-Pertua, kita semua tahu bahawa bidang hiburan, terutamanya bidang hiburan di kota-kota besar seperti di Kuala Lumpur, selalu ada berhubung-kait dengan rasuah, penyelewengan dan secret societies. Maka Fasal 12 ini pasti akan memburukkan lagi apa yang sedia ada sekarang.

Tuan Yang di-Pertua, yang akhirnya, saya hendak menarik perhatian kepada Menteri dan Dewan yang mulia ini, bahawa selama ini terdapat banyak rumah-rumah urut (massage parlours) yang mengiklankan gejala mereka dalam surat-suratkhabar secara terbuka dengan perkataan-perkataan yang menghina kaum wanita dan menyibar fikiran yang tidak sihat. Saya boleh memberi "paper-cuttings" kepada Menteri jika dia mahu. Gejala ini mesti dihentikan. Iklan-iklan dengan perkataan-perkataan yang menghina wanita ini yang berjanji untuk memberi gaji yang tinggi kepada pemuda-pemudi supaya menjadi

kakitangan rumah-rumah urut ini, mesti diberhentikan kerana ia menyebarkan fikiran dan budaya yang tidak sihat, yang songsang dan saya pasti ia akan menggalakkan lebih banyak lagi pemuda-pemudi mencontohi D.P. Vijandran.

Tuan Yang di-Pertua, semalam ada seorang Ahli Yang Berhormat dari Barisan Nasional kata, kita tidak boleh adakan mahkamah untuk mengendali kes-kes perlesenan ini kerana, jika ia dibenarkan, workload mahkamah akan menjadi berat. Ini saya tidak bersetuju, kerana jika 'workload' mahkamah-mahkamah akan jadi banyak, mengapa tidak menubuhkan satu tribunal yang bebas untuk mengendali kes-kes perlesenan hiburan dan rayuan terhadap penolakannya. Itu lebih baik daripada Fasal 12 yang memberi kuasa mutlak dan muktamad kepada seseorang Menteri, dan saya pasti Pemuda DAP percaya Fasal 12 ini akan menjadi punca besar bagi lebih banyak penyelewengan, penyalahgunaan kuasa dan corruption. Sekian, terima kasih.

**Tuan Yang di-Pertua: Jerai.**

*5.46 ptg.*

**Tuan Haji Badruddin bin Amiruddin (Jerai):** Terima kasih, Tuan Yang di-Pertua. Tuan Yang di-Pertua, saya bangun untuk menyokong Rang Undang-undang Hiburan (Wilayah Persekutuan Kuala Lumpur).

Tuan Yang di-Pertua, Bandaraya Kuala Lumpur adalah sebuah bandaraya ataupun ibu negara yang berada di dalam taman, dikelilingi oleh taman, dikelilingi oleh pokok-pokok bunga, dikelilingi oleh pohon-pohon yang menghijau dan dengan begitu indah dan kalau kita dapat bandingkannya di rantau Asia ini tidak ada sebuah ibu kota yang terindah seperti Malaysia, malah di seluruh dunia sekalipun kita setanding dan setaraf dengan ibukota-ibukota yang telah maju.

Tuan Yang di-Pertua, janganlah bandaraya yang indah, janganlah bandaraya yang nyaman seperti yang ada pada hari ini suatu hari nanti akan disemak, disemaki oleh bukan sampah-sampah daripada daun-daun yang gugur, bukan sampah-sampah daripada bunga-bunga yang layu dan gugur, tetapi bandar ini akan disemaki ataupun akan dicemari oleh anak-anak bangsa Malaysia yang tidak bermoral, yang kotor pakaiannya, yang tidak berdisiplin dan kita mungkin kalau tidak mengawalinya akan dapat melihat anak-anak bangsa Malaysia seperti bangkai bernyawa. Dan ini akan membimbangkan keseluruhan rakyat Malaysia, apatah lagi pelancong-pelancong yang ingin melawat Malaysia dan ingin melihat ibukota yang kita sayangi ini.

Tuan Yang di-Pertua, saya berharap pihak Kementerian akan juga mengambil pandangan yang luas ke hadapan supaya tempat-tempat yang kurang senonoh, tempat-tempat hiburan yang saya kira tidak langsung memberi faedah kepada masyarakat Malaysia mahupun kepada pelancong-pelancong yang ada pada hari ini tidak dibiarkan menjalankan aktiviti perniagaan mereka ini dengan tidak terkawal dengan sempurnanya. Di sinilah, Tuan Yang di-Pertua, tempat-tempat di mana anak-anak muda kita, anak-anak muda bangsa Malaysia yang akan menjadi harapan kita, anak-anak muda yang akan mengisi Wawasan 2020, pada hari ini berhimpun. Kadang-kadang kita dapat melihat anak-anak muda yang di bawah umur yang masih lagi di peringkat persekolahan telah memegang gelas bir, telah menghisap rokok berkepul-kepul asap di tempat-tempat yang ada hiburan ini. Inilah yang kita risaukan. Kalau ianya tidak dibendung dengan undang-undang, tidak dibendung dengan penguatkuasaan yang begitu kuat, dengan begitu ketat, maka anak-anak muda inilah yang akan mewarisi Malaysia ini, sebuah negara yang telah kita bina, sebuah negara yang telah kita

perbesarkan, sebuah negara yang dihormati oleh dunia luar. Saya kira apa jua penguatkuasaan yang telah dijalankan oleh pihak Bandaraya pada hari ini memang mencukupi tetapi perlu dipertambahkan lagi, perlu diperkuatkan lagi supaya kita akan dapat melihat, walaupun tempat ini tempat hiburan, tetapi tempat ini diikuti ataupun dipergi oleh masyarakat-masyarakat yang layak, masyarakat-masyarakat yang ingin membazirkan masa di dalam tempat-tempat hiburan ada pada hari ini.

Kita dapat melihat, Tuan Yang di-Pertua, beberapa jalan di Bandar Kuala Lumpur ini, di Jalan Bukit Bintang kita dapat melihat dengan tersendirinya lampu-lampu yang berkelipan di sebelah malam yang menunjuk tanda-tanda rumah urut, menunjuk tanda-tanda tempat video game, menunjuk tanda-tanda jenama Karaoke yang saya kira tidak berapa okay. Jadi kita perlulah berhati-hati di dalam kita mengeluarkan lesen-lesen ini supaya lesen-lesen ini dihadkan dan tidak diperbanyakkan. Kalau kita lihat Bandaraya Ipoh satu ketika dulu.....

**Wan Hanafiah bin Wan Mat Saman:** *(Bangun)*

**Tuan Haji Badruddin bin Amiruddin:** Sila.

**Tuan Yang di-Pertua:** Ya, ada yang bangun.

**Wan Hanafiah bin Wan Mat Saman:** Tuan Yang di-Pertua, saya hendak minta penjelasan sedikit daripada sahabat saya dari Jerai, sebab saya lihat yang selalu ada rumah urut, tempat-tempat maksiat ini selalunya di bandar-bandar dan di bandar-bandar ini selalunya DAP menang di dalam pilihanraya. Adakah perkara-perkara maksiat di bandar-bandar disokong, dipengaruhi atau diberi galakan oleh DAP?

**Tuan Haji Badruddin bin Amiruldin:** Tuan Yang di-Pertua, saya telah difahamkan bahawa setiap permohonan ini dengan secara tidak langsung disokong oleh pihak DAP (*Ketawa*) dan kadang-kadang mereka rujuk juga kepada Semangat 46. Semangat 46 kata, mahu bikin duit apa susah, jalan saja. Jadi itulah jawapannya. (*Ketawa*). Tetapi, Tuan Yang di-Pertua.....

**Dr Kua Kia Soong:** Point of order.

**Tuan Yang di-Pertua:** Ya, point of order.

**Dr Kua Kia Soong:** Ini sangkaan jahat. Not funny, Tuan Yang di-Pertua.

**Tuan Yang di-Pertua:** Sangkaan jahat bukanlah kepada mana-mana seorang.

**Tuan Haji Badruddin bin Amiruldin:** Tidak. Tuan Yang di-Pertua, kadang-kadang di dalam Dewan yang serius ini kita perlu juga selingan-selingan agar idea-idea baru datang. Jadi janganlah marah sangat kepada saya.

Tuan Yang di-Pertua, berbalik kita ke Bandaraya Ipoh satu ketika dulu di masa zaman kegemilangan bijih timah. Boleh kita lihat pada ketika itu setiap jalan-jalan di Ipoh ini dipenuhi dengan rumah-rumah urut. Sebenarnya saya dengar cerita, saya tak pernah pergi ke tempat-tempat macam itu, urut di tempat ini, mereka kata, bukan saya kata, ini cerita mereka kepada saya, jadi saya hendak cerita. Urut ini hendak kira-kira urut yang paling baik ialah urut tradisional, semua urat-urat saraf kita akan berjalan dengan elok, darah-darah kita akan berjalan dengan elok, tenaga-tenaga kita akan pulih dengan elok dan kekuatan akan datang. Tetapi kalau kita pergi ke tempat-tempat macam ini, saya kiralah, saya dengar cerita, hak yang kuat turun jadi lembik. (*Ketawa*). Hendak berjalan pun tak larat selepas urut. Jadi saya kira

pihak Bandaraya ini kena buat serbuan-serbuan dan kalau boleh bawa Ahli-ahli Yang Berhormat ini tunjuk tengok macam mana betul atau tak betul yang mereka cerita ini, kita pun hendak tengok juga. Kalau betul, kita akan ubah Perlembagaan kita, ubah undang-undang ini supaya benda-benda ini tak berlaku. Kerana saya faham kadang-kadang kedai gunting di luar dia tulis 'gunting rambut' dan cermin daripada luar ini gelap, kita tak nampak dari luar. Ini saya dengar cerita, bila kita masuk ke dalam, meja gunting rambut tak ada. Tak pernah orang gunting rambut tidur, semua orang gunting rambut kena duduk di atas kerusi (*Ketawa*), tetapi mereka ada tempat tidur. Kalau kita tanya, sebab saya juga Ahli Majlis Bandaran Alor Setar, jadi kita buat serbuan-serbuan ini, kita tak beri chance, Tuan Yang di-Pertua, fasal kita tak mahu ini. Kita orang-orang UMNO ini pun bukan tak berjuang soal agama, mempertahankan agama, agama Islam adalah agama rasmi, UMNO memperjuangkan agama, bangsa dan tanahair. Apa yang pihak PAS marah sangat? Semua tak betul. Kita bercakap Kelantan pun mereka marah. Kita bercakap Kedah, mereka bercakap Kelantan, mereka tak faham, mereka marah kepada kita. Jadi, mereka bubuh katil. Bila dia bubuh katil, saya tanyalah, apa fasal gunting rambut tidur? Dia kata, tak adalah, ini katil boleh angkat duduk punya. (*Ketawa*). Dia kata, katil ini boleh diangkat dan duduk, Tuan Yang di-Pertua. Jadi kalau katil boleh angkat duduk, kepala terbenam, hendak gunting rambut macam mana? (*Ketawa*). Jadi inilah kita kena siasat. Jangan sah kata kedai gunting itu semata-mata dia jalankan aktiviti gunting. Dia jual arak, dia jual minuman-minuman keras.

Begitu juga tempat-tempat urut ini. Dia kata sahaja tempat urut, Tuan Yang di-Pertua, dia urut kesemua. Maklumlah kalau urut kesemua ini dia jadi pelik-peliklah. Jadi yang ini kita kena sekat. Tak apa, kuasa kita beri kepada Menteri.

Saya sokong sangat kuasa diberi kepada Menteri sebab rakyat telah melantik Kerajaan Barisan Nasional memerintah negara ini. Apabila kita meletakkan seseorang itu menjadi Menteri, bermakna rakyat telah menyokong dia jadi Menteri. Dia duduk di situ sebagai Menteri. Kita di Dewan Parlimen ini hendak susah apa? Kalau Menteri itu buat tak kena, kita tegur di Parlimen. Jadi, hendak beri kuasa kepada Menteri ini, saya sokong. Jerai sokong sehabis-habisnya.

Cuma, Tuan Yang di-Pertua, macam saya kata Karaoke. Karaoke ini pun kadang-kadang kita tengok, bila masuk Karaoke, keluar dia tak okay. (*Ketawa*). Macam mana hendak okay, dia sudah tinggi. Di sebelah Kedah mereka kata 'ranum', Tuan Yang di-Pertua. Dia minum-minum sampai ranum, bila keluar, dia tengok tiang telefon pun dia kata 'adinda'. (*Ketawa*). Ini sedang berlaku. Jadi kita tak mahu, bila masa masuk okay, tetapi bila keluar tak okay. Jadi, kita perbetulkanlah sedikit, kontrol sedikit benda-benda ini.

Yang saya risau, Tuan Yang di-Pertua, kadang-kadang anak-anak yang bersekolah ini. Saya biasa pergi ke satu restoran, iaitu restoran hendak makan nasi, saya pun duduk dengan kawan-kawan, kita order nasi, lepas itu kita minum. Maklumlah di Jerai ini bukan ada restoran. Saya pun order, saya kata, saya hendak "coke on the rock". "Coke on the rock" ini bukan apa, iaitu Coca Cola bubuh ais ketul sahaja. (*Ketawa*). Tetapi di Kuala Lumpur ini hendak kena bercakap style sedikit, kalau tidak mereka ingat kita lekeh. (*Ketawa*). Dia ini masuk pun kata, Tuan hendak minum apa? Coke on the rock, please! Kita order coke on the rock, sekejap lagi masuk kumpulan anak muda laki-laki dan perempuan duduk di situ hendak makan. Saya terkejut, bila dia order, dia order anjing bodoh - bulldog. Tengahari dia hirup bulldog. Saya naik terkejut. Saya kata, awak lahir di zaman apa ini? Saya tanya dia, Cik ni beranak zaman apa?

Dak eh, cik beranak sudah 17 tahun. Dia minum anjing bodoh tengah-tengah hari, Tuan Yang di-Pertua. Kita minum coke on the rock, colour samalah, tetapi hak dia itu bila minum kena dua gelas, ranumlah. Jadi yang ini kita kena jaga.

Pegawai-pegawai penguatkuasa ini dia kira macam inilah. Bila kuasa sudah diberi kepada kita, kita tak buat cara elok-elok, di akhirat kelak dia tanya, masa cik dulu jadi pegawai penguatkuasa, adakah cik tengok anak muda minum bulldog ini cik tangkap tak? Tak. Fasal apa cik tak tangkap? Masa itu semua anggota kita akan jawablah, dia kata mata tak nampak pada hal mata celik. Dia kata saya celik, saya nampak. Ini jangan dipersoalkan di akhirat. Ini kita kena jaga.

Jadi, biarlah bandar Ibu Kota Kuala Lumpur ini menjadi satu Ibu Kota kalau siapa datang pun dia berasa cukup nyaman, cukup seronok. Dia berasa, dia tengok ibu kota ini sebagai satu tempat idaman dia, dia akan datang lagi. Jadi kalau dia tengok anak-anak muda ini main pinball, main bola 'tojoh'. Bola 'tojoh' ini, Tuan Yang di-Pertua, dia menungging tojoh bola. Tiap-tiap hari saya tengok anak-anak muda di Alor Setar sudah habis kita sekat. Kita tak mahu benda-benda ini berlaku. Bila dia tojoh, tojoh, dia kalah, dia balik ke rumah, dia tojoh duit emak bapa dia pula, hendak main lagi. Jadi ini akan merugikan. Saya cadangkan bukan setakat 18 tahun, kalau boleh 20 tahun ke bawah tak beri masuk. 20 tahun zaman sekarang ini bukan macam orang dulu. Orang dulu umur 14 tahun sudah bernikah, umur 16 sudah ada anak. Orang sekarang ini umur 35 tahun belum bernikah lagi, dia dok hayun macam itu sahaja, bernikah tak mahu. Lambat gelap sahaja, melilau di pekan. Wa-we, wa-we di ibu kota. (*Ketawa*). Wa-we ini, Tuan Yang di-Pertua, dia pi-mai, pi-mai, tang-tu juga. (*Ketawa*). Dia tak ada matlamat. Dia hayun pi, hayun mai, dok tang-tu. Di sebelah Kedah dia kata 'wa-we, wa-we' - dia tak ada arahan. Jadi, kita kena

hadkan benda-benda macam ini. Saya cukup berterima kasih kepada Dewan Bandaraya kerana setakat ini saya tak pernah kena saman lagi, kereta saya pun dijaga elok-elok - baguslah, tetapi perkara ini kita kena jagalah, maknanya kalau lesen sudah cukup - kita katalah cukup 30, sudah kita kotakan benda-benda macam itu, betulkah?

Tuan Yang di-Pertua, saya cadangkan tempat-tempat ini kita jangan beri orang Islam masuk, kita buat macam Genting Highlands itu, kita jangan beri orang Islam masuk apa salahnya, kita hadkan undang-undang ini. Orang yang beragama lain kalau hendak pergi - pergilah tidak apa, jadi kita tahankan supaya orang Islam ini jangan masuk, kerana negara kita ini adalah sebuah negara Islam.

Sungguhpun negara kita ini mempunyai ramai rakyat, berbilang bangsa, berbilang kaum, tanya agama mana sekalipun, agama Hindu, agama Buddha, agama Kristian, tanya karakoe halal atau haram? Dia kata karakoe no good, tidak boleh, hak yang tangan enam pun kata 'nahi' - no good. Jadi, kita tahan supaya orang-orang Islam tidak beri masuk tidak apa, jangan beri orang Islam masuk, sekarang ini bukan orang suka sangat pergi. Orang yang beragama lain kalau hendak masuk-masuklah, kalau DAP dia memang kena jaga kawasan, dia kena masuk-masuk pergi, tidak apa (*Ketawa*). Kita cuma mahu supaya benda ini dibendung elok-elok, kadang-kadang kita tengok anak-anak muda ini tidak hormat lagi orang tua-tua.

Saya hendak cerita di zaman dahulu, zaman orang tua-tua, zaman tokwan saya, zaman pak saya, hendak lintas depan pak, kalau di rumah Tuan Yang di-Pertua, bukan berani, kalau orang datang, tidak berani ikut pintu depan hendak masuk ke dalam rumah, pergi ikut pintu belakang, hendak lalu kalau di depan tokwan, dengan cengih sambil panggil tok! tok! tok! sampai hilang

kalau lalu di depan tok itu, punya hormat. Tetapi anak-anak sekarang ini moral macamana? Bila kita tegur sedikit dia kata "Dad, you don't know dad", "mummy! mummy! this is new world, mummy!", dengan izin, Tuan Yang di-Pertua, ini mereka kata, bukan saya (*Ketawa*). Ini moral rendah, rambut elok-elok, dipanjangkan sebelah, telinga orang lelaki tidak patut cucuk, mereka cucuk telinga, yang hidung mereka tidak cucuk pula. Jadi, cuba kita tengok moral anak-anak muda kita, kita cukup risaulah, jadi dengan adanya tempat ini, bila negara kita maju, ibu bapa kaya, duit banyak, dapat duit mereka pergi ke tempat-tempat hiburan seperti ini.

Tuan Yang di-Pertua, saya hendak cerita di Alor Setar dahulu ada Milk Bar, di Jalan Langgar. Milk Bar di Jalan Langgar ini dia lebih kurang macam restoran 'cowboy', dibubuh cermin di depan ditulis Milk Bar. Dok lalu pi, lalu mai, nak masuk bukan berani, orang kata Milk Bar, jadi kita pun jengok melalui cermin ho! ho! sambil memegang gelas.....

**Timbalan Menteri Perdagangan Dalam Negeri dan Hal Ehwal Pengguna (Dato' Abdul Kadir bin Haji Sheikh Fadzir):** (*Bangun*)

Tuan Yang di-Pertua: Ya.

**Dato' Abdul Kadir bin Haji Sheikh Fadzir:** Adakah Milk Bar yang dimaksudkan itu di tepi satu bangunan, ada Syarikat Zahir & Jaya Devan tak? (*Ketawa*)

**Tuan Haji Badruddin bin Amiruddin:** Dahulu betul, sekarang tidak ada dah! (*Ketawa*) Milk Bar di Jalan Langgar tu, saya bukan berani. Hendak masuk ke kedai kopi dahulu, Tuan Yang di-Pertua, tidak berani, kalau pak nampak masuk ke kedai kopi, balik sekejap lagi teruklah ditibai. Sebab itu kita tengok zaman lapis-lapis kita semua

berdisiplin, dalam Dewan Rakyat ini supaya tengok semua berdisiplin sebelah Barisan Nasional ini, betul tak? Sebelah sana kita sudah tahu, ceritapun buat sakit hati. Jadi, kita hendak buat baik, kita tidak hendak gaduh dengan mereka, sebab kita hendak sembang panjang ini.

Tuan Yang di-Pertua, inilah benda-benda yang saya kira Bandaraya kena buat. Jadi, saya mintalah Yang Berhormat Timbalan Menteri pun ada pada hari ini. Timbalan Menteri pun segak dengan wajah yang Tuhan beri, itu kena jadi Timbalan Menteri di Jabatan Perdana Menteri pun, (*Ketawa*) perbetulkan yang ini.

Tuan Yang di-Pertua, satu lagi, mengenai disko. Saya biasa lalu ikut luar sahaja, masuk tidak lagi sampai hari ini, (*Ketawa*) tengok dari cermin sahaja, masuk tidak, fasal kita anak orang tua-tua. Oleh kerana saya cakap ini, semalam saya melilau ikut luarlah, pergi dengar, oh! lagu ini disko lampu lip-lap, lip-lap orang nampak jadi macam kera menari (*Ketawa*) angkat tangan sekali, dia jadi ketar tiga kali (*Ketawa*) itu pun hak yang 'ranum' masih menari lagi, Tuan Yang di-Pertua. Hak ranum ini ramas buat cucur kodok makan minyak, masih menari lagi!

**Tuan Haji Ibrahim bin Ali:** (*Bangun*)

**Tuan Yang di-Pertua:** Ya, sila, sila.

**Tuan Haji Ibrahim bin Ali:** Cuba Yang Berhormat jelaskan kalau Ahli Parlimen Larut berdisko macam mana? (*Ketawa*)

**Tuan Haji Badruddin bin Amiruddin:** Kalau dia hendak berdisko, Tuan Yang di-Pertua, Yang Berhormat dari Larut ini kena pakai Jeans dahululah dengan T. Shirt, baru kita nampak pinggangnya. (*Ketawa*)

Kalau kita kaji balik, Tuan Yang di-Pertua dan Ahli-ahli Yang Berhormat, berapa banyakkah pendapatan kita atau punca kewangan daripada Bandaraya, hasil kutipan lesen-lesen yang kita benarkan? Berapa banyak pula perbelanjaan yang kita perlu adakan untuk menubuhkan pusat-pusat, seperti Pusat-pusat Serenti, Pusat-pusat Membina Akhlak, pusat itu, pusat ini, pusat sahaja hendak perbetulkan orang ini. Berapa banyak perbelanjaannya, jadi banyak kita kena adakan perbelanjaan dan saya kira hasil kutipan daripada lesen ini dengan perbelanjaan hendak menubuhkan segala pusat-pusat ini lebih banyak perbelanjaan pusat daripada kutipan hasil-hasil ini. Jadi, kita tidak mahulah negeri kita ini menjadi sebuah negara yang ada di Afrika, di mana boleh dikatakan 5 daripada 10 rakyatnya mengidap penyakit AIDS. Jadi, bila ada penyakit AIDS tidak kacau! Kita hendak naik bas pun tidak berani, sekejap dia duduk, kita berdiri dan kita duduk bekas dia, tahu-tahu kita kena AIDS. Hah! jadi kita pun 'seriau', hendak masuk restoran pun 'seriau', maklumlah jenis-jenis AIDS ini bukan kita nampak, dia lembik - lembik - habis - mati begitu sahaja. (*Ketawa*) Jadi, perkara ini kita kena jaga. Saya haraplah tempat-tempat disko ini pun tolong tengok-tengoklah sama, menari sampai tidak tentu hala, tidak ada tujuan, tidak ada matlamat. Benda-benda macam ini, saya kira tidak apalah, kalau pelancong hendak pergi ataupun lapis-lapis orang lain hendak pergi tidak apa, tapi kalau boleh kita hadlah. Kalau yang beragama Islam itu boleh keluar undang-undang itu tidak usah pergilah, orang di rumah pun tidak bimbang.

Tuan Yang di-Pertua, sekarang ini orang di rumah kalau kita duit lebih pun dia seriau. Jadi Yang Berhormat pun dia seriau, maklumlah fasal Islam ini boleh empat, jadi dia seriau. Oleh itu, benda-benda ini, kita kena tahanlah disko-disko ini tidak apa, yang mana ada sudahlah, tapi jangan tambah lagilah, terlampau

banyak sekarang ini, di hotelpun ada, kadang-kadang dalam bilik air di tulis, kalau kita hendak "refresh" badan kita ditulis dalam bahasa Inggeris, tolong pusing nombor sekian-sekian. Kadang-kadang kita duduk melengung dalam bilik air, hendak beri tenteram perut kita ini, tertengok benda itu, kemudian iblis syaitan datang rasuklah. Datang seorang-seorang diapun rasuk, macamania ini dia suruh pergi tekan nombor ini, apa dia nombor Ekorkah? Nombor apakah? Dok tanya. Dilukis (draw) macam orang berurut, jadi datang dugaan bermacam-macam. Benda-benda macam ini kadang-kadang, kalau iman tidak kuat - bahaya. Tetapi saya tak apa, insya Allah, setakat hari ini (*Ketawa*) boleh lagi sabar.

Tuan Yang di-Pertua, hiburan di dalam Islam ini saya kira dibolehkan tetapi jangan sampai kita terlalai dan jangan sampai kita melampaui batasan. Bukan bermakna dalam Islam itu tidak ada hiburan, ada. Tetapi dia ada had dia. Jangan kita melebihi sangat dan jangan kita kadang-kadang keterlaluan di dalam kita melibatkan diri dalam hiburan.

Tuan Yang di-Pertua, Alhamdulillah pada hari ini saya dapat lihat apabila saya pergi ke jabatan-jabatan Kerajaan, Kementerian-kementerian yang ada pada hari ini dan juga di pejabat Dewan Bandaraya Kuala Lumpur, saya dapat lihat di situ dia tulis "Kuliah Agama akan diadakan daripada jam sekian ke jam sekian." Ini adalah salah satu daripada syiar agama Islam yang dijalankan oleh Jabatan-jabatan Kerajaan, oleh Pejabat-pejabat Kerajaan yang dibendung oleh Barisan Nasional. Jadi kita duduk buat kerja ini bukan kata kita tidak buat.

Jadi kalau boleh dipertingkatkan lagi keseluruhan pekerja-pekerja supaya apabila dia ini diberi dengan asuhan agama yang secukupnya, dengan peringatan tentang dosa pahala dia, maka dia akan menjadi seorang pegawai yang

berkewibawaan, seorang pegawai yang menjalankan tanggungjawab dengan penuh amanah, seorang pegawai yang akan bertanggungjawab, bekerja kerana Allah S.W.T, bekerja untuk mencari rezeki yang halal untuk menjaga anak isteri di rumah.

Jadi kalau kita adakan banyak lagi kelas-kelas macam ini, insya Allah setakat hari ini elok-elok dah. Yang duduk ada pegawai-pegawai ini baik-baik belaka. Cuma lapang-lapang lepas waktu-waktu Maghrib itu pergilah duduk di masjid-masjid sedikit-sedikit dengar, belajar dan sebagainya tambah lagi. Akhirnya dia akan jadi seorang pegawai yang berhemah tinggi, seorang pegawai yang tegas menjalankan tanggungjawab dan dia bekerja untuk membangunkan negara dia dan untuk menjaga anak isteri dia dengan rezeki yang halal.

Tuan Yang di-Pertua, di beberapa buah negara macam saya biasalah mereka bawa naik kapal terbang pergi Korea. Seorang pemandu kereta, semasa lampu merah dia berjalan. Saya nampak apabila dia berjalan, sebentar lagi polis Korea tahan dia. Bila polis Korea tahan dia, Tuan Yang di-Pertua, dia pergi dekat orang itu, dia tabik. Dia salute dekat kawan itu. Ini orang yang langgar undang-undang itu. Dia salute dekat kawan itu, dia bercakap - cara dia yang saya faham sedikit-sedikit dan saya fahamlah sedikit-sedikit bahasa Korea - dia kata, "Tuan! Tuan telah melanggar undang-undang. Lampu merah, tuan berjalan." Cara Korea, Tuan Yang di-Pertua, saya faham sedikit-sedikit. Jadi bila dia tabik dekat kawan itu, kawan itu sendirinya berasa bersalah. Dia berasa, "Saya melakukan kesilapan. Kawan ini dalam kita duduk buat silap pun, orang mari tabik kita lagi "

Jadi inilah cara-cara yang saya kira patut atau sebaik-baik kita ambil juga. Sekurang-kurangnya saya pun kadang-kadang bila kena saman betul-betul, saya

jumpa mata-mata yang hendak saman, saya kata, "Assalamualaikum Tok.". Kita kata "Assalamualaikum" itu dia sejuk. Dia kata "sebentar lagi, Encik bawa kereta perlahan-perlahan ya, pergilah." dia kata.

Jadi macam itulah juga saya kira kalau pegawai-pegawai yang menjalankan penguatkuasa terutama di Bandaraya Kuala Lumpur atau di mana sahajalah, kita gunakan diplomasi yang elok supaya orang yang buat kesilapan itu benar-benar hendak mengaku dan insaf atas kesilapan dia dan menghormati undang-undang yang akan kita kenakan kepada dia.

Jadi macam itulah juga hal yang tidak bayar tol ini, Tuan Yang di-Pertua. Jumlahnya tidak berapa duit sangat. Pergi bayar! Bukan hendak susah, pergi bayar. Kalau kita hendak fight satu-satu benda, Tuan Yang di-Pertua, biar benda itu orang Kedah kata, "berpukai". "Berpukai" maknanya kita fight satu benda yang betul-betul membawa kebaikan. Yang ini, kalau kita tidak bayar tol dia bukan "berpukai". Berapa duit sangat yang itu, Tuan Yang di-Pertua? Kalau kita kutip botol belakang rumah pergi jual dekat keling botol pun boleh bayar tol dia itu. *(Ketawa)* Boleh bayarlah tidak berapa duit. Benda-benda itu buat apa hendak cari publisiti. Bukankah? Carilah cara lain, cuba dia bangkit, dia fight "kita mesti membangunkan negara kita ini. Kita orang mesti sokong kasi bangun negara kita" cakap macam itu. Itu baguslah. Ini tahu-tahu jadi "Red Indian", dia belah. Tol pun dia belah! Jadi hal ini kita kenal menghormati pegawai-pegawai itu. Dia tidak keluar saman, tidak boleh. Itu undang-undang. Jadi jangan kita pergi marah kepada Kerajaan. Undang-undang tol itu kita semua sokong termasuk pihak Pembangkang pun sokong. Bila hendak kena bayar, dia tidak mahu bayar. Jadi tidak betullah macam itu. Di sini kita sokong, pergi di luar tidak mahu bayar. Hujung bulan sign voucher. Tambah macam ini, dia

tidak boleh mari, dia lagi seronok. Tuan Yang di-Pertua ingat dia tidak seronokkah dia tidak boleh masuk. Dia tidak boleh masuk, dia lagi seronok.

**Tuan Yim Chee Chong:** Tuan Yang di-Pertua, saya hendak minta penjelasan dari Yang Berhormat, siapa yang tidak bayar? Apa pasal dia tidak bayar? Sekian, terima kasih.

**Tuan Haji Badruddin bin Amiruldin:** Yang Berhormat mahu tanya apa pasal dia tidak bayar? Pasal ini "orang dia tidak tahu itu ulang-ulang". *(Ketawa)* "Itu sendili ulang-ulang lulus sini pun tidak tahu ulang-ulang". *(Ketawa)*

**Tuan Yim Chee Chong:** Siapa dia itu? *(Ketawa)*

**Tuan Haji Badruddin bin Amiruldin:** Saya ingat Yang Berhormat semua tahu. Tetapi hendak memperingatilah, Yang Berhormat kita dari Tanjong! Ada faham, Seremban?

**Tuan Yim Chee Chong:** *(Bangun)*

**Tuan Yang di-Pertua:** Yang Berhormat, jangan bercakap macam itu! Sila teruskan ucapan.

**Tuan Haji Badruddin bin Amiruldin:** Terima kasih, Tuan Yang di-Pertua. Kadang-kadang kalau kita bercakap dengan loghat bahasa buku, setengah itu dia tidak faham. Dia tidak faham dia kata ini bahasa daerah. Tetapi sebenarnya di negeri Kedah bahasa baku dia macam saya bercakap hari inilah, Tuan Yang di-Pertua. *(Ketawa)* Jadi bila kita bercakap loghat mereka sedikit, bunyi sedikit-sedikit itu dia faham, kalau tidak bayar tol itu, dia akan pergi bayar.

**Tuan Yang di-Pertua:** Sila teruskan.

**Tuan Haji Badruddin bin Amiruddin:** Tuan Yang di-Pertua, berkenaan dengan Yang Berhormat dari Pengkalan Chepa, Pak Nik kita, Tuan Yang di-Pertua.

**Tuan Yang di-Pertua:** Jangan sebut nama. Sebut Pengkalan Chepa.

**Tuan Haji Badruddin bin Amiruddin:** Orang tua-tua orang biasa hormat, tetapi tidak apalah kalau tidak boleh, Tuan Yang di-Pertua. Yang Berhormat dari Pengkalan Chepa dia duduk kata "Barisan Nasional, Barisan Nasional, Kerajaan hari ini sudah 30 tahun merdeka, tidak mahu semak undang-undang Islam. Dia kata tidak buat undang-undang Islam lagi. Sebenarnya fasal kuasa hiburan ini kalau tidak silap sayalah dia ini di bawah Kerajaan Negeri. Hak kuasa Kerajaan Negeri. Jadi Kerajaan Negeri termasuklah negeri Kelantan yang ditadbirkan oleh parti PAS, parti Islam, parti yang menggunakan Islam untuk kepentingan mereka. UMNO memperjuangkan Islam, ada beza. Mereka mempergunakan Islam untuk parti. Jadi tidak bolehlah hendak salah. Dan kita sudah kata, kita pun tidak mahu tanggung dosa.

Tetapi negara kita ini sebuah negara yang majmuk, macam-macam rakyat ada. Kita buatlah perlahan-lahan. Kita perlahan-lahan buatlah benda-benda macam ini, tidak bolehlah kita buat serentak. Tengok, kita sudah haram Social Welfare Lottery semua, kemudian di Genting Highlands sudah tidak boleh orang Islam masuk. Jadi saya mahu kalau boleh pihak PAS pun yang ada cerdik-cerdik sedikit pasal agama ini marilah duduk sembang-sembang dengan ulamak-ulamak UMNO ini. Perbetul cara elok-elok. Jadi, janganlah duduk kata pula pasal 17 bulan memerintah. Yang Barisan 30 tahun memerintah. Hak dia 17 bulan! Kalau 17 bulan pun dia baru lulus sarkas kelmarin dulu ini apa pasal, kalau sudah tahu sarkas ini haram.

Dia terjun, begini Tuan Yang di-Pertua. Melayang sini, melayang sana. Ini ada gambar dia.

Jadi bila benda-benda macam ini, bila mereka buat halal, bila tentang kita, haram! \$4,800 halal! Kata duit Kerajaan ini haram. Masjid mereka kata "UMNO buat haram". Masa pilihanraya masjid kita mereka pergi tidur.

**Tuan Haji Mohd. Zihin bin Haji Mohd. Hassan:** (*Bangun*)

**Tuan Yang di-Pertua:** Yang Berhormat, Larut bangun.

**Tuan Haji Mohd. Zihin bin Haji Mohd. Hassan:** Dalam masalah sarkas tadi, Ahli Yang Berhormat dari Jerai, terjunkah berdosa atau pakai yang "best" itu berdosa? (*Ketawa*)

**Tuan Haji Badruddin bin Amiruddin:** Terjun itu tidak dosa, Tuan Yang di-Pertua. Kalau kita hendak terjun, terjunlah siapa pun tidak tahan. Tetapi kita benar mereka pakai macam itu, macam itu, (*sambil menggaya*) bukan setakat menjolok mata, Tuan Yang di-Pertua, mengelirukan mata. (*Ketawa*) Kita tengok mengeliru. Saya tengok gambar tadi mengeliru, dia stunt macam itu, macam burung terbang lepas itu patah balik, terbang pulak. Tidak tahulah kalau mereka sudah tengok free show dulu, awal-awal dan bawa parti PAS dan Kerajaan Kelantan tengok dulu show. Mereka kata "macam ini boleh, seronok", bukan? Balik ke rumah suruhlah Emak Aji stunt macam itu pulak? (*Ketawa*) Mereka ini di luar sahaja, Allah, Tuan Yang di-Pertua, manusia! Ini dia pegang katil hayun! Allah, kita tahulah, Tuan Yang di-Pertua, lebih kurangnya tak usah kata macam itu. Jadi kita ini pun kadang-kadang rasa jauh hati, tidak pernah kena. Serban lilit kadang-kadang hendak masuk kereta pun tidak celus. Dok kata orang itu, dia kata pahala. Sedangkan dalam Islam kata, mengata orang itu

cukup berdosa besar. Sebab itu saya tidak mahu mengata, saya hendak kata, saya kata masa ini lagi senang. Biar berdepan tidak apa kita kata, di belakang jangan. Berdosa besar, Tuan Yang di-Pertua. Mereka kata Yang Amat Berhormat Perdana Menteri baru-baru ini menyambut "Tahun Baru" dengan bacaan Bismillah. Saya memang marah bila mereka kata macam itu. Tuan Yang di-Pertua kena ingat, puak-puak ini bila mereka pergi berceramah, "Bismillahir rahmanir rahim", bagi salam, janggut merambu, bukan macam janggut saya. Janggut saya, saya trim, (*Ketawa*) janggut mereka merambu jadi melilit ratalah. Dengan ayat, puji-puji kepada Rasulullah, puji kepada Tuhan tetapi di tengah-tengah mereka kata orang UMNO macam-macam, saya tak mahu ceritalah, kalau cerita pukul 6.30 pun tidak cukup. Saya hendak bercakap sampai 6.30 sahaja, lebih saya tidak mahu.

Tuan Yang di-Pertua, jangan mereka kata kita macam itu. Dalam Islam ada dikatakan, tiga hari tidak bertegur sesama Islam, putus silatulrahim tidak masuk syurga. Mereka kena fahamlah. Janganlah kita ini kadang-kadang kerana kita dalam parti Islam se Malaysia ini, apa yang UMNO buat, apa yang Barisan Nasional buat, apa yang pegawai-pegawai Kerajaan tolong ini semuanya tidak kena. Yang mereka sekat pembangunan itu tak kena lagi? Dalam Islam memang disuruh pembangunan, Tuan Yang di-Pertua. Tuhan telah berfirman, masuk waktu hendaklah sembahyang, lepas sembahyang hendaklah bertaburan kamu di atas dunia ini untuk mencari rezeki. Saya hendak berbahas dengan Nik Aziz pun tidak ada masalah. Boleh panggil dia ke sini. Saya tidak pakai serban pun, Tuan Yang di-Pertua, kita mengerti, kita anak orang tua-tua. Mereka mengaji pondok. Tuan Yang di-Pertua tahukah cerita pondok ini? Sebenarnya Tuan Yang di-Pertua dan Ahli-ahli Yang Berhormat, cuba kita lihat, di negeri-negeri yang ada sawah

padi mesti ada pondok. Di Kedah ada sawah padi ada pondok, Perlis ada sawah padi ada pondok, Kelantan ada sawah padi ada pondok dan di Kuala Lumpur tidak ada sawah padi, mana ada pondok? Pahang tidak ada sawah padi, mana ada pondok? Apa sebabnya begini, Tuan Yang di-Pertua? Bila ada sawah padi ada pondok, bila ada pondok ada zakat. Bila mereka datang mereka akan beri syarahan, mereka kata, "serelong, awak kena keluar sekian-sekian. Kalau tidak bawa keluar, padi tikus makan, benaperang mari serang" Bagi dekat mereka, tidak serang, Tuan Yang di-Pertua. Kadang-kadang bila kena musim kering, musim orang tidak menanam padi - inilah saya hendak cerita sedikit, bila padang kering, puak-puak PAS ini pergilah di kawasan - bersyarah. Tidak berapa lama selepas itu yang berketayap putih, yang bersongkok itu mereka kalih pula sudah terbuka, mula-mula mereka serkop di atas kepala, bila pemimpin mereka tengah bercakap mereka ambil ketayap pulas ikut itu, kemudian mereka launglah perjuangan "fisabilillah, fisabilillah".

Tuan Yang di-Pertua, zaman dahulu orang kampung tidak berapa cerdik, tetapi di kawasan saya cerdik-cerdik belaka - mereka bubuh duit note \$1, \$5, \$10. Ada yang lakinya taksu sangat dengan perjuangan PAS ini, dia kata, "gelang pun bagi, tidak apa, kita akan masuk syurga - bagi gelang." Bininya pun hulurkan gelang bubuh dalam itu. Sekarang ini bila rakyat sudah cerdik sedikit, bila mereka sua ketayap terbalik itu, bunyi kercing, kercing - mereka beri duit siling, duit note tidak bagi dah. Mereka sudah cerdik. Ini maknanya mereka sudah tidak ada pengaruh lagi, Tuan Yang di-Pertua. Kita bolehlah ibaratkan konsep mereka ini konsep sarkas - mereka heret gajah dua tiga ekor, heret harimau dua tiga ekor, heret kambing biri-biri seekor dua naik atas stage, orang pakat tengok, mereka pun bersyarah. Mereka bersyarah di antara lafaz Bismillah sehingga wabillahaufik

asyik mengata sahaja. Janganlah mengata Perdana Menteri kita macam itu. Apa, Perdana Menteri kita tidak mengertikah fasal agama ini?

Tuan Yang di-Pertua, saya hendak beritahu sedikit hal orang Kedah ini, bukanlah saya hendak bela kerana saya orang Kedah. Lihat sahaja macam Tan Sri Tuan Yang di-Pertua, beliau tertib, berbudi bahasa, hendak suruh orang keluar pun dengan cara hormat. Lihatlah orang Kedah ini, bukan saya hendak puji, tetapi bagus-bagus, lemah lembut. Takkan mereka tidak mengerti, takkan mereka tidak mahu masuk syurga? Perdana Menteri tidak mahu masuk syurga? Dia mahu masuk syurga juga, jadi dia mengertilah apa yang dia hendak buat. Sabarlah sekejap, jangan asyik mengata, pergilah ke rumah dia dan tegur elok-elok, bawa keluar hadis, cerita dan berpakatliah. Yang datang maki dalam Parlimen ini buat apa? Macam mereka itu boleh masuk syurga!

Tuan Yang di-Pertua, saya hendak cerita sedikit lagi, lima minit sahaja. Sekejap lagi saya akan sokonglah ini. (*Ketawa*) Masa pilihanraya dahulu, Tuan Yang di-Pertua, saya dengar sendiri, bila orang hendak masuk pergi mengundi sahaja, bila mereka lalu hendak masuk pagar mengundi itu, mereka ini akan kata, "hendak masuk syurga kena pangkah bulan, ingatlah akhirat. Tak pangkah bulan - neraka." Mereka ingat, neraka syurga itu kepala bapak mereka yang buatlah, Tuan Yang di-Pertua? Hak Tuhan mereka pertikaikan di dunia ini -hendak mampus. Tak sampai orang langkah tujuh kaki, mereka sudah kena awal daripada kita. Ada orang PAS yang dua tiga orang ini pergilah bagi pesan kepada mereka. Saya pun tok guru mengajar juga. Bolehkah diatur siapa yang hendak masuk syurga dan siapa yang hendak masuk neraka - tak boleh. Macam DAP, kalau last minute awak masuk Islam, awak masuk syurga. Dekat mati hampir ajal, masuk Islam, masuk syurga. Sekarang jahat, saya tak tahulah. Itu awak dengan awak punya Tuhan. Ini

kita dengan Tuhan kita. Mereka kena faham, jangan mereka ingat apa yang kita buat, apa yang UMNO buat semuanya tidak kena. Pembangunan yang UMNO buat pun bercanggah dengan kehendak Islam. Islam mahu pembangunan, Islam mahu supaya umatnya hidup dengan bermaruah. Jangan mereka kata macam itu. Jadi, saya hendak tegurlah sedikit.....

**Tuan Yang di-Pertua:** Baiklah. Yang Berhormat bercakap berkenaan dengan Rang Undang-undang ini.

**Tuan Haji Badruddin bin Amiruldin:** Tuan Yang di-Pertua, saya berbaliklah kepada Rang Undang-undang ini. Satu lagi ialah arak. Arak ini memanglah dalam Islam pun dikatakan punca maksiat. Kita boleh lihat, orang yang minum arak, lepas dia minum arak, bila telinganya merah, dahinya merah, hidungnya merah, biji matanya macam kucing liar, dia bercakap pun bukan macam manusia bercakap. Kalau boleh, kita juga kena buat peraturan undang-undang ini. Saya mintalah Timbalan Menteri yang segak ini membuat undang-undang supaya anak-anak muda di bawah umur 20 tahun tidak boleh minum arak, tidak boleh pegang botol arak pun, tuang arak pun tidak boleh - pegang, minum, tengok samalah berdosa. Memiliki, melihat dan membawa, ini termasuk "pita" pun tidak bolehlah.

**Tuan Haji Ibrahim bin Ali:** Tuan Yang di-Pertua, saya hendak minta penjelasan. Apabila disebut had umur 20 tahun, ini dikenakan kepada semua masyarakat ataupun bagi orang Islam tidak kira umur bahawa benda itu haram. Saya minta Yang Berhormat tolong per-jelaskan, sebab ini masalah akidah.

**Tuan Haji Badruddin bin Amiruldin:** Bagi orang Islam, kalau beranak sehari pun kalau minum arak itu

haram. Tetapi maksud saya ini ialah bagi yang bukan beragama Islam, kita mahulah kalau boleh umur mereka itu 20 ke atas. Bukan apa, kadang-kadang budak-budak bila minum arak, mereka mabuk, mereka akan membuat kerja-kerja yang tidak senonoh dan ini akan mengganggu ketenteraman awam dan kadang-kadang mereka tidak tahu bercakap orang putih pun akan keluar bahasa orang putih apabila kena arak itu - yes no, yes no sambil berjalan. Ini merosakkan imej. Bila orang lihat, "Eh! rakyat Malaysia macam inikah semua?"

**Tuan Yang di-Pertua:** Yang Berhormat hendak gulung atau tidak?

**Tuan Haji Badruddin bin Amiruddin:** Tuan Yang di-Pertua, saya ingat sekadar itulah sahaja ucapan saya pada hari ini, saya bangun untuk menyokong usul yang telah dibentangkan iaitu pindaan Akta Hiburan. Saya menyokong sepenuhnya dan saya berharap apa juga Akta pindaan ini akan sama-sama kita jalankan supaya undang-undang ini akan dijalankan seadil-adilnya dan tidak akan dipersoalkan di akhirat kelak.

Tuan Yang di-Pertua, sekian saya sudahi dengan berbanyak-banyak terima kasih, kalau-kalau saya tersilap dan terkasar bahasa. Jadi Jerai menyokong.

## USUL

### PENANGGUHAN MESYUARAT

**Timbalan Menteri Tenaga, Telekom dan Pos [Dato' Mohd. Tajol Rosli bin Mohd. Ghazali]:** Tuan Yang di-Pertua, saya mohon mencadangkan:

Bahawa mengikut peruntukan Peraturan Mesyuarat 16(3).

Majlis Mesyuarat ini ditangguhkan sekarang.

**Timbalan Menteri Perdagangan Dalam Negeri dan Hal Ehwal Pengguna [Dato' Abdul Kadir bin Haji Sheikh Fadzir]:** Tuan Yang di-Pertua, saya mohon menyokong.

### UCAPAN-UCAPAN PENANGGUHAN

#### Kebajikan Orang Asli

6.31 ptg.

**Dr Kua Kia Soong [Petaling Jaya]:** Tuan Yang di-Pertua, Timbalan Menteri Pembangunan Luar Bandar telah berkata baru-baru ini bahawa Kerajaan tidak berhasrat untuk meminda Akta Orang Asli, Akta 134 Tahun 1954 (Semakan 1974) untuk membolehkan Orang Asli memiliki hak tanah persendirian di dalam kawasan Tanah Simpanan Orang Asli. Menurut beliau, undang-undang tersebut tidak pernah menghalang pembangunan Orang Asli. Sebaliknya para pemimpin Orang Asli serta para pengkaji yang lain telah berulang kali menunjukkan kekurangan yang ada pada akta tersebut dan sering meminta supaya ia dikaji semula ataupun digantikan dengan suatu akta yang baru. Perlu diingatkan bahawa Orang Asli merupakan satu-satunya komuniti etnik yang mempunyai satu undang-undang dibentuk khas untuk mereka. Pada asalnya undang-undang tersebut dibentuk pada masa darurat bertujuan untuk 'melindungi' Orang Asli dari pengaruh pihak Komunis. Maka membawa masuk makanan dan bahan-bahan bercetak ke dalam kawasan penempatan Orang Asli adalah tidak dibenarkan.

Selain daripada itu, kaum bukan Orang Asli juga dihalang dari memasuki kawasan penempatan mereka tanpa kebenaran daripada Menteri atau Ketua Pengarah Jabatan Hal Ehwal Orang Asli. Peruntukan ini walaupun telah ketinggalan zaman dan memperkecilkan kebolehan Orang Asli, masih lagi

terkandung di dalam Akta 134. Dari segi tanah pula, akta tersebut hanya membuat peruntukan ke atas tanah dan kawasan Simpanan Orang Asli. Bagaimanapun kuasa perundangan Orang Asli ke atas tanah-tanah berkenaan hanyalah atas syarat 'tenant at will'. Ini bererti apabila pihak berkuasa hendak mengambil balik tanah berkenaan, maka ia berkuasa mengambil balik status tanah itu tanpa perlu memberikan sebarang gantirugi kepada Orang Asli, tidak kira dalam bentuk wang tunai ataupun bidang tanah yang lain. Ini terus bertentangan dengan Akta Pengambilan Tanah. Lebih-lebih lagi akta ini tidak bercuba 'mendiskriminasikan Orang Asli secara positif', walaupun dari segi sosial dan ekonomi Orang Asli masih ketinggalan jauh di belakang rakyat Malaysia yang lain.

Pemimpin-pemimpin Orang Asli berulang kali meminta supaya Akta 134 dipindahkan supaya dapat menjamin hak, pembangunan dan kemajuan mereka. Ia telah dilakukan bagi pihak kaum Melayu dan orang asal di Sabah dan Sarawak di bawah Artikel 153 di dalam Perlembagaan Persekutuan.

Tuan Yang di-Pertua, satu perkara lagi, Kerajaan baru-baru ini mengumumkan bahawa seramai 250 orang pegawai pembangunan akan diupah untuk berkhidmat di dalam kawasan penempatan Orang Asli. Tugas mereka adalah untuk menjaga kebajikan dan ekonomi Orang Asli. Tetapi soal yang timbul adalah mengapakah pegawai-pegawai pembangunan ini diletak di bawah tanggungjawab Bahagian Hal Ehwal Islam yang berada dalam Kementerian Perdana Menteri. Setengah komuniti Orang Asli telah menyuarakan perasaan khuatir atas percubaan secara terbuka yang dilakukan oleh Kerajaan untuk mengislamisasikan Orang Asli. Kekhawatiran ini dilahirkan atas faktor bahawa para pegawai berkenaan bukan sahaja dilatih oleh JHEOA, tetapi oleh

Bahagian Hal Ehwal Agama juga. Sepatutnya Kementerian Kebajikan merupakan pilihan yang lebih lojik dalam perkhidmatan tersebut.

Tuan Yang di-Pertua, Kerajaan juga telah membina dewan komuniti yang berbentuk surau di banyak perkampungan Orang Asli, terutama sekali di kampung-kampung yang tidak mempunyai seorang pun Orang Asli yang beragama Islam. Walaupun berhadapan dengan tindakan protes yang termasuk satu insiden di mana sebuah bangunan yang tengah dibina di suatu kampung telah sengaja dirosakkan, tetapi percubaan ini masih tidak berhenti-henti. Di setengah-setengah kampung, Orang Asli tidak diberitahu bahawa tingkat pertama merupakan surau. Hanya apabila bangunan berkenaan hampir siap barulah mereka menyedari mengenainya. Ibu bapa Orang Asli juga khuatir tentang anak-anak mereka yang tinggal di asrama JHEOA yang terdedah kepada ajaran Islam, walaupun Akta Orang Asli telah dengan jelasnya mengharamkan perbuatan sedemikian.

Tuan Yang di-Pertua, baru-baru ini Mahkamah Sesyen di Selangor telah memutuskan bahawa pihak berkuasa melakukan kesalahan kerana menukarkan agama seorang budak Orang Asli tanpa kebenaran ibu bapanya terlebih dahulu. Disebabkan oleh perbuatan cuba menukarkan agama budak-budak Orang Asli di asrama JHEOA inilah yang menyebabkan ramai ibu bapa Orang Asli enggan menghantar anak-anak mereka ke sekolah.

Tuan Yang di-Pertua, percubaan menukarkan agama yang dilakukan oleh Kerajaan ini merupakan sifat agresif dan langsung tidak menghormati kehendak dan perasaan Orang Asli. Apakah motif sebenarnya Kerajaan yang mahu menukarkan agama Orang Asli kepada agama Islam? Adakah Kerajaan mengiktiraf hak Orang Asli dalam

menolak aktiviti-aktiviti atau projek-projek yang mereka rasa tidak sehaluan dengan kepentingan mereka sendiri?

Sekian, terima kasih.

6.36 ptg.

**Setiausaha Parlimen Kementerian Pembangunan Luar Bandar [Dato Mohamed bin Jamrah]:** Tuan Yang di-Pertua, saya mengucapkan terima kasih kepada Ahli Yang Berhormat berkenaan yang telah membangkitkan beberapa perkara mengenai Orang Asli.

Salah satu dari perkara yang dibangkitkan ialah persoalan mengapa Kerajaan tidak menyelaraskan Tanah Simpanan Orang Asli supaya sama taraf dengan Tanah Simpanan kaum Melayu. Ingin saya menjelaskan bahawa mengikut perangkaan terdapat seramai 83,453 Orang Asli pada tahun 1990. Sekarang ini terdapat sejumlah 20,696.96 hektar tanah, iaitu satu jumlah yang agak besar yang telah diwartakan sebagai kawasan Rezab Orang Asli. Ada lagi kawasan cadangan rezab yang telah diluluskan sebagai Kawasan Rezab Orang Asli tetapi belum diwartakan. Sebahagian daripada kawasan tanah yang telah diluluskan tersebut antara 10% hingga 20% telah ditanam dengan tanaman kekal. Ini menunjukkan kesungguhan Kerajaan untuk menjaga kebajikan Orang Asli dan tidak tertinggal dalam segi pembangunan aset mereka.

Satu lagi perkara Akta 134, Akta Orang Asli 1954 disemak pada tahun 1974 di bawah Seksyen 8(3) membolehkan Pihakberkuasa Negeri memberi hakmilik atau dipajakkan kepada seseorang Orang Asli. Melalui peruntukan ini ada antara Kerajaan Negeri telahpun memberi hakmilik kepada individu Orang Asli dan juga secara perkumpulan seperti di bawah Rancangan Pengumpulan Semula. Untuk menyeragamkan pemberian hakmilik tanah bagi memenuhi hasrat

Orang Asli yang dahagakan pembangunan dan memahami bahawa ada antara Orang Asli yang bersedia memiliki tanah, Kementerian ini bersama dengan Kementerian yang berkenaan kini sedang merangka satu dasar menyeluruh pemberian hakmilik tanah kepada Orang Asli.

Menyentuh mengenai kuota khas untuk Orang Asli seperti yang dibangkitkan, kuota tersebut tidak diperlukan oleh kerana mereka sudah pun digulung sebagai bumiputera. Dan dari segi pentadbiran, tindakan-tindakan telahpun diambil untuk memberi peluang-peluang yang diperlukan oleh mereka dalam bidang-bidang pendidikan, peluang pekerjaan ataupun perniagaan, asalkan mereka sudah bersedia mencebur diri. Jabatan Hal Ehwal Orang Asli dan Kementerian Pembangunan Luar Bandar sentiasa mengambil perhatian dan membantu Orang Asli yang berminat untuk bekerja ataupun berniaga. Latihan-latihan kemahiran dan khidmat nasihat sedang diberi, terutama kepada belia-belia Orang Asli untuk menyediakan mereka mendapat pekerjaan atau memulakan perniagaan.

Berhubung pegawai pembangunan seperti disebutkan dan juga bangunan-bangunan yang dinyatakan seperti surau dan sebagainya, pegawai-pegawai yang dimaksudkan ialah penggerak-penggerak masyarakat yang akan berdamping rapat dengan masyarakat Orang Asli. Mereka itu akan membantu Jabatan Hal Ehwal Orang Asli dalam usaha membangun taraf sosio-ekonomi Orang Asli dengan lebih cepat. Ia adalah selaras dengan teras dasar pembangunan nasional supaya pembangunan kerohanian dapat diimbangkan dengan pembangunan kebendaan.

Berkenaan dengan masalah Islamisasi yang ditekankan oleh Yang Berhormat, kita di Malaysia mengamalkan kebebasan beragama dan akta-akta di negara kita sudah cukup

untuk membolehkan sesiapa mencabar Kerajaan sekiranya terdapat desakan ataupun paksaan dari segi Kerajaan mengislamisasi sesiapaupun. Seperti kes Yang Berhormat sendiri telah nyatakan dan ini membuktikan bahawa mereka bebas untuk memilih walaupun infrastruktur semua agama ada di sini, maknanya Orang Asli juga diberikan pendedahan dari segi kerohanian, tetapi mereka boleh memilih agama mana-mana pun. Dan sekiranya terdapat seperti yang dinyatakan oleh Yang Berhormat, program Islamisasi di kalangan anak yang tidak mendapat kebenaran daripada ibu bapa, akta dan undang-undang sudah cukup di negara kita untuk membolehkan yang berkenaan mendakwa Kerajaan sekiranya perkara itu benar.

Sekian, terima kasih.

#### **Hak Dan Kepentingan Pelabur-Pelabur di BSKL**

*6.40 ptg.*

**Tuan Lim Guan Eng (Kota Melaka):** Tuan Yang di-Pertua, saya ingin meminta dan menyeru kepada pihak Kerajaan supaya membela hak-hak dan kepentingan pelabur-pelabur kecil di Bursa Saham Kuala Lumpur (BSKL) supaya wang yang dilabur dalam BSKL ini kalau mereka ditipu boleh memperoleh pampasan balik.

Kes yang saya hendak sebutkan di sini ialah mengenai satu skim penipuan saham BSKL yang didagangkan secara haram di Tampin, Negeri Sembilan.

Tuan Yang di-Pertua, seperti yang dimaklumkan oleh pihak Kementerian, kes tipu dagang secara haram saham BSKL di Tampin berlaku pada tahun yang lepas di mana seorang ejen haram sebuah syarikat saham di Negeri Melaka telah mendagangkan saham kepada pelabur-pelabur kecil di Tampin. Ini adalah salah disisi undang-undang

khususnya Securities Industries Act, dengan izin, di mana semua syarikat-syarikat saham tidak dibenarkan melantik ejen untuk mendagangkan saham mereka. Walau bagaimanapun, kegiatan ini berleluasa bukan sahaja di Tampin tetapi di seluruh negara. Dan amalan ini telah diikuti oleh dua buah syarikat iaitu:

- (1) Tan Chow and Low Securities Sdn. Berhad; dan
- (2) Chua Khoo Securities Trading Sdn. Berhad.

Tan Chow and Low telah melantik ejen haram itu pada dua tahun yang lepas dan kemudian ejen haram itu telah menukar kepada Chua Khoo Securities Trading Sdn. Berhad. Apabila ejen haram itu menghadapi, dengan izin, cashflow problem, dia telah melarikan diri. Dan wang yang dia larikan adalah sebanyak kira-kira \$3 juta. Wang ini adalah kepunyaan kira-kira lebih daripada 100 orang pelabur, dan di sini saya hendak tekankan mereka semua ini adalah pelabur-pelabur kecil yang tidak fasih dan tidak faham tentang undang-undang syarikat saham dan juga selok belok peraturan-peraturan BSKL. Mereka membeli saham daripada ejen haram itu berdasarkan keyakinan yang diberikan oleh syarikat-syarikat saham itu sendiri, di mana pengarah-pengarah atau broker yang telah dilesenkan oleh BSKL datang berjumpa dengan mereka dan meyakinkan bahawa perdagangan ini adalah dibuat secara sah.

Demikianlah mereka membeli dan menjual saham menerusi ejen haram itu. Tetapi apabila ejen ini melarikan diri tentulah mereka mengalami kerugian. Dan di sini syarikat-syarikat yang melantik ejen haram ini, enggan menanggung kerugian yang dialami oleh mangsa-mangsa tersebut.

Oleh itu, saya ingin menyeru bahawa:

- (a) Bayaran pampasan dibayar kepada mangsa-mangsa tersebut;

- (b) Bahawa Yang Berhormat Menteri Kewangan menunaikan janji bahawa beliau akan mengarahkan kedua-dua syarikat saham yang terlibat iaitu Tan Chow dan Low Securities Trading Sdn. Berhad dan Chua Khoo Securities Trading Sdn. Berhad, yang bertapak di Melaka membuat pampasan, membayar wang ganti rugi kepada mangsa-mangsa tersebut; dan
- (c) Bahawa tindakan diambil ke atas kedua-dua syarikat tersebut dan juga memastikan bahawa sebarang tindakan yang diambil dikuatkuasakan.

Dan bukan seperti yang berlaku di mana seorang yang diharam, yang diberhentikan berdagang terus berdagang secara haram sebegitu sahaja tanpa menghiraukan pengharaman yang dikenakan ke atasnya oleh BSKL.

Di sini, saya juga ingin melahirkan perasaan kesan bahawa pihak BSKL tidak mengambil sebarang tindakan ke atas kedua-dua syarikat ini, dan juga BSKL enggan membantu mangsa-mangsa tersebut. Di bawah Securities Industries Act, dengan izin Tuan Yang di-Pertua, pelabur-pelabur saham atau pembeli-pembeli saham yang telah ditipu oleh syarikat-syarikat saham boleh membuat tuntutan dengan fidelity fund, dengan izin yang telah didirikan oleh BSKL.

Saya difahamkan bahawa fidelity fund ini sekarang mempunyai jumlah dana wang sebanyak \$3 juta. Tetapi tuntutan yang dibuat oleh mereka ke atas fidelity fund ini ditolak oleh BSKL, ini menunjukkan bahawa BSKL tidak serius untuk menjaga atau membela kepentingan pelabur-pelabur kecil dan lebih mementingkan hak-hak syarikat-syarikat saham yang besar. Dan saya harap perkara ini boleh dibetulkan dan pampasan dibayar menerusi fidelity fund ini agar kepentingan pelabur-pelabur

kecil dijaga. Harus diingatkan bahawa kebanyakan pelabur-pelabur di BSKL terdiri daripada pelabur-pelabur kecil dan kalau pihak Kerajaan ingin menggalakkan satu pusat saham yang sihat dan aktif, kepentingan mereka harus dijaga.

Di sini juga, saya merasa kesal bahawa pihak Polis dan juga pihak Kementerian tidak mengambil pendirian yang lebih tegas dalam perkara ini, hanya Pendaftar Syarikat yang telah mengambil tindakan ke atas kedua-dua syarikat ini. Dan saya juga menyeru sekali lagi bahawa peraturan-peraturan undang-undang di dalam Securities Industries Act dipinda dengan segera supaya hukuman yang lebih berat boleh dikenakan ke atas syarikat-syarikat saham yang menyalahgunakan kuasanya atau menipu atau menyelewengkan wang pelabur-pelabur kecil.

Yang Berhormat Timbalan Menteri Kewangan sendiri telah memberikan jawapan dalam Mesyuarat Parlimen yang lepas, bahawa hukuman yang dikenakan ke atas syarikat-syarikat saham ialah setakat \$5,000 sahaja, dan perlu difahamkan bahawa ini adalah satu jumlah yang sangat kecil. Wang \$5,000 ini saya ingat, boleh diperolehi dalam masa perdagangan satu jam oleh syarikat saham. Dan ini tidak akan menakutkan syarikat-syarikat saham, malah saya percaya akan menggalakkan mereka melakukan kepincangan seperti ini kerana pulangan yang boleh diperolehi oleh mereka adalah jauh lebih besar daripada hukuman yang akan dikenakan ke atas mereka. Sekian, terima kasih.

**Tuan Yang di-Pertua: Sila.**

*6.48 ptg.*

**Timbalan Menteri Kewangan (Tuan Abdul Ghani bin Othman):** Tuan Yang di-Pertua, saya terlebih dahulu mengucapkan terima kasih kepada Ahli Yang Berhormat daripada

Kota Melaka kerana membangkitkan perkara-perkara dalam Ucapan Penangguhan yang mengizinkan Kerajaan menjelaskan keadaan yang sebenarnya.

Tuan Yang di-Pertua, kita mempunyai undang-undang yang mengawasi perdagangan sekuriti di negara ini iaitu Akta Perindustrian Sekuriti 1983. Dan Akta ini, mempunyai peruntukan-peruntukan secukupnya untuk memberi perlindungan kepada pelabur-pelabur. Perlindungan dalam bentuk pampasan juga terdapat di dalam Akta tersebut.

Walau bagaimanapun, perlu ditegaskan bahawa tuntutan pampasan hanya boleh dipertimbangkan jika penipuan ataupun penyelewengan dilakukan oleh pemegang-pemegang lesen yang dikeluarkan di bawah Akta ini sahaja.

Berasaskan penyiasatan menyeluruh yang dibuat oleh Pejabat Pendaftar Syarikat sebagai penguatkuasa Akta tersebut adalah didapati bahawa pelabur-pelabur berkenaan telah berurusniaga dengan peniaga haram iaitu ejen berkenaan tidak dilantik oleh syarikat broker saham Tan Chow dan Low Securities Sdn. Bhd. dan Straits Securities Sdn. Bhd. seperti yang didakwa oleh kumpulan yang membuat aduan.

Peniaga berkenaan adalah peniaga haram yang melakukan kegiatan jual-beli saham tanpa lesen seperti yang dikehendaki di bawah Akta Perindustrian Sekuriti 1983. Oleh yang demikian, sekiranya pelabur-pelabur memilih untuk berurusniaga dengan mereka yang tidak mempunyai lesen, kerugian yang mereka alami tidak boleh dituntut di bawah Akta ini. Tujuan peniaga-peniaga saham dikehendaki mempunyai lesen ialah untuk memberi perlindungan kepada pelabur-pelabur. Jika pelabur-pelabur di semua peringkat walaupun sampai ke peringkat yang kecil

pun, memilih untuk berurusniaga dengan mereka yang tidak mempunyai lesen, siapa yang harus dipersalahkan?

Tuan Yang di-Pertua, perkara yang kedua. Untuk makluman Ahli Yang Berhormat, bayaran pampasan hanya dapat dibuat sekiranya syarikat-syarikat broker saham berkenaan, iaitu Tan, Chow & Low dan Straits Securities Sdn. Bhd. telah terbukti melanggar peruntukan di bawah Akta Perindustrian Sekuriti. Hasil daripada penyiasatan menyeluruh Pejabat Pendaftar Syarikat menunjukkan bahawa tidak terdapat bukti-bukti yang kedua-dua syarikat berkenaan melanggar mana-mana peruntukan di bawah Akta tersebut. Sebaliknya, pelabur-pelabur berkenaan telah memilih peniaga yang tidak mempunyai lesen untuk berurusniaga. Oleh yang demikian, soal bayaran pampasan tidak timbul.

Akhirnya, Tuan Yang di-Pertua, tindakan ke atas kedua-dua syarikat broker saham berkenaan, iaitu Tan, Chow & Low dan Straits Securities Sdn. Bhd. hanya dapat diambil sekiranya kedua-duanya terbukti melanggar mana-mana peruntukan di bawah Akta Perindustrian Sekuriti. Dalam hal ini, kedua-dua syarikat berkenaan telah terbukti tidak melanggar mana-mana peruntukan Akta tersebut. Oleh yang demikian, tindakan ke atas mereka tidak dapat diambil. Kerajaan dari masa ke semasa sentiasa mengawasi urusanniaga saham melalui peruntukan-peruntukan di bawah Akta Perindustrian Sekuriti. Seseorang yang menjalankan perniagaan jual-beli saham adalah dikehendaki mempunyai lesen yang sah seperti yang diperuntukkan di bawah Akta tersebut dan hanya mereka yang mempunyai lesen yang sah sahaja boleh dianggap sebagai agen.

Kerajaan juga tidak pernah membenarkan mana-mana agen yang telah diberhentikan terus membuat urusanniaga jual-beli saham. Kes penipuan

seperti yang berlaku di Tampin adalah merupakan penglibatan individu-individu berkenaan secara peribadi. Penipuan seperti ini dielakkan sekiranya pelabur-pelabur berkenaan lebih berhati-hati dalam membuat urusan mereka. Pelabur-pelabur berkenaan seharusnya membuat urusan secara terus dengan agen-agen yang sah yang dilantik oleh Bursa Saham Kuala Lumpur.

Terima kasih, Tuan Yang di-Pertua.

**Tuan Yang di-Pertua:** Ahli-ahli Yang Berhormat, berbalik kepada Usul iaitu Majlis mesyuarat ditangguhkan sekarang.

Usul dikemuka bagi diputuskan, dan disetujukan.

**Tuan Yang di-Pertua:** Mesyuarat ini ditangguhkan sehingga pukul 2.30 petang esok.

*Dewan ditangguhkan pada pukul 6.54 petang.*